

**NATIONAL ASSEMBLY OF
SEYCHELLES**

Tuesday 11th April, 2023

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou zofisye Lasanble ki pe asiste nou e manm piblik. E byenveni spesyal pou nou bann viziter ki dan Galeri.

E an se moman mon ava donn *MNA Glacis*, Onorab Esparon loportinite pou donn zot en mo labyenveni. Onorab?

HON REGINA ESPARON

Mersi Mr Speaker. Bonzour tou Manm Onorab ek tou dimoun a lekout.

Mr Speaker lo non nou Lasanble mon ti ava kontan *welcome* nou group sorti dan distrik Glacis ki konpri bann dimoun *golden age*. Akoz zot pa kontan apel zot trwazyenm az, zot apel *golden age* - akonpannyen par DA Christelle e osi mon clerk Samita Pouponneau.

Welcome pou nou deliberasyon bomaten. Mersi Mr Speaker.

(APPLAUSE)

MR SPEAKER

Mersi Onorab. Madanm Clerk nou ava fer prezantasyon dokiman.

MADAM CLERK

Mersi Mr Speaker. Bonzour Mr Speaker. Bonzour tou bann Manm, tou bann *staff* Lasanble e dimoun ki a lekout.

Bann papye ki pe ganny prezante *ce matin i comme swivan*;

Government Performance Report for the Year Ended 31st December, 2022.

Information Commission – Annual Report 2022.

Truth, Reconciliation and National Unity Commission Report, 2023. Mersi Mr Speaker.

MR SPEAKER

Mersi Madanm Clerk. Be nou a prosede avek *First Reading Public Bill*. Madanm Clerk?

MADAM CLERK

Mersi Mr Speaker. *This Act may be cited as the Public Service Salary (Amendment) Act, 2023 and amends the Public Service*

Salary Act 2013 (hereinafter referred to as the “principal Act”). Mersi Mr Speaker.

MR SPEAKER

Mersi Madanm Clerk. Nou’n pare pou *Private Notice Question*. Madanm raporter ou ava apel Minis e son delegasyon silvouple.

Bon byenveni, bonzour Minis Flavien Joubert, Minis pou Lagrikiltir, Sanzman Klima e Lanvironnman. E bann zofisyè ki pe akonpanyi ou byenveni egalman;

Mr Kevin Nancy, *Principal Secretary* pou Lagrikiltir, Mr Randy Stravens, *Chief Biosecurity Officer* dan Departman Lagrikiltir. E Mr Rodney Philo, *Chief Officer* pou *Animal Health and Livestock*.

Mersi pou zot prezans pou partisip avek nou dan kestyon. Laparol i prezan pou Onorab *Leader* Lopozisyon pou met son *Private Notice Question*.

HON SEBASTIEN PILLAY

Mersi Mr Speaker, bonzour. E bonzour tou dimoun ki a lekout. Bonzour tou koleg Onorab. E en bonzour spesyal pou tou bann zabitan Glacis ki la anler. Bokou zot in vwar mwan grandi e mon apresye ozordi bomaten ki zot la dan

Lasanble. Mon swet zot en bon lazournen isi dan Lasanble.

Mr Speaker, mon osi swet bonzour Minis ek son delegasyon e mon remerci Minis pou prezan dan Lasanble pou reponn mon kestyon.

Mon kestyon i lir koumsa:-

Akoz apre ki Gouvernman in konmans sa ki in apel mezir pou kontrol lisyen, ki plizyer lisyen in ganny trouve mor dan landrwa piblik dan bann kondisyon deplorab? Mersi Mr Speaker.

MR SPEAKER

Mersi Onorab. Minis ou larepons?

MINISTER FLAVIEN JOUBERT

Mersi Mr Speaker. Bonzour Mr Speaker, bonzour bann Manm Lasanble e osi bann dimoun ki sorti dan distrik Glacis ki dan Galeri e osi bann dimoun ki pe ekoute ozordi bomaten.

Mr Speaker, mon ti'n anvoy kot ou biro en demann pou osi fer en *Statement* lo sa size an vi ki lenportans, ki i en keksoz ki annan en lenportans nasyonal. E nou’n vwar en kantite lentere par manm piblik dan sa bann dernyen zour.

La ki en Kestyon Irzan in ganny propoze avek ou

permisyon Mr Speaker, mon pou enkli dan mon repons bann detay ki mon ti'n deza prepare pou mon *Statement*.

MR SPEAKER

Wi Onorab Pillay ki?

HON SEBASTIEN PILLAY

Mersi Mr Speaker. En pwen prosedir pou mon ganny ou gidans. Lefe ki Minis ti dir i ti'n ekrire ou lofis, nou pa ti'n ganny enformen ki in ekrire ou lofis pou ganny *Statement*. Petet ou ava fer nou ganny sa *request*.

Me dezyenman, lefe ki Minis i pou enkli serten pwen ki i pou fer dan son *Statement*. E letan ki mon ganny *allocated* pou en *PNQ*, eski ou pou pran sa an konsiderasyon pou *allow* bann kestyon siplemanter lo son larepons? Mersi.

MR SPEAKER

Well son *Statement* i pou pas koman dan son larepons. Alor i tonm dan letan normal pou son larepons *PNQ*.

So, Minis i a prosede avek son repons silvouple.

HON SEBASTIEN PILLAY

(Off-Mic)

MR SPEAKER

Onorab Pillay mon'n fini dil avek sa pwen silvouple. Wi?

HON SEBASTIEN PILLAY

Mr Speaker, pa ki mon le prolonz en lesanz ant mwan avek ou, be mon oule ganny li kler.

Si larepons Minis i long depandan lo ki lefe i ti pou fer en *Statement* ki i pou enkli dan mon kestyon. *Then* i pou vedir poudir nou riske napa letan pou kestyon siplemanter.

Se sa ki mon pe demann ou, si ou pou *allow* letan pou kestyon siplemanter? Mersi.

MR SPEAKER

Parey labitid nou pou pran *Private Notice Question* ziskan 10er. Mersi Onorab.

(Off-Mic)

MR SPEAKER

Bann Manm zot pe zis met retar prosedir. Onorab Aglae.

HON EGBERT AGLAE

Mersi Mr Speaker, bonzour Minis ek ou *panel* ek dimoun dan Galeri.

Mr Speaker akoz letan en Minis i vin fer en *Statement* dan Lasanble parey ti fer *last week*, tou Manm ti kapab demann kestyon. So se sa ki nou bezwen annan en distenksyon parske ...

MR SPEAKER

Wi be ganny kler, in dir lenformasyon ki i ti pou met dan son *Statement* i pe met dan larepons.

So, i larepons ki nou pe dil avek la silvouple. Mersi.

Minis prosede silvouple.

MINISTER FLAVIEN JOUBERT

Mersi Mr Speaker. Mr Speaker, sityasyon lisyen eran dan pei i tre serye. Sa in ganny konfirman dan en rapor finanse par *FIO* an 2020 ki apel en *Dog Ecology Study*.

Lisyen eran i prezant en risk enportan pou lasante piblik, aktivite ekonomik, espesyalman tourism, sekirite imen ek zannimo e osi lapropte.

Alor pou met sityasyon anba kontrol i nesese met an plas bann looperasyon pou kontrol popilasyon lisyen eran dan pei.

Sa travay par Departman Lagrikiltir ki sa lorganizasyon ki administre *Dog Control Act*, 2018 in ganny fer dan tou legalite. Metod ki'n ganny servi mon oule soulinyen, i ganny permet anba Lalwa dan bann ka parey. E metod i osi similar parey bann ki'n ganny servi pou plizyer lannen dan Sesel. Alor i pa en nouvo lenvansyon ki fek aparet dan sa departman.

Me selman Mr Speaker, mon pou bezwen dir ki i vreman regretab ki lisyen mor in ganny vwar eparpiye dan larout piblik Zedi bomaten. E mon bezwen admet devan Lasanble ki sa in koze par bann fot dan lafason ki *staff* in fer looperasyon kontrol.

I pa'n zanmen lentansyon Departman Lagrikiltir pou fer en looperasyon kontrol lisyen, vin en sityasyon ki atir latansyon piblik e agres sansibilite nou bann zabitan. E sa i enn bann rezon ki rikord lo kontrol lisyen i ganny garde dan departman san okenn piblisite.

Swivan sa lensidan, nou'n *investigate* e lo en baz preliminar nou konstate ki sa fot i annan pou fer avek kapasite ki ti annan lo teren pou fer sa travay e mankman swivi apre.

Normalman zofisye i reste dan landrwa e tou lisyen ek tou labwet i ganny ranmase deswit apre looperasyon kontrol. Labitid i annan 2 lekip ki fer sa looperasyon. Dan sa ka ti annan en sel lekip avek zis 3 dimoun e zot pa ti'n arive kouver e re kouver tou landrwa kot travay ti pe ganny fer.

Sa in fer ki lisyen in ganny kite ater ziska lizour avek portre ek reaksyon piblik ki nou tou nou konnen. E parey mon'n

dir, sa i en lensidan ki malerezman in arive.

Mr Speaker, sa departman pe fer son travay avek en lanvi pou delivre rezilta pou nou bann zabitan ki viktim sa problemn. E ki pe demande akoz ki nou pe les sa problemn lisyen agrave, e nou pa pe kapab met li anba kontrol?

Eski i pou korek Mr Speaker pou nou bann zofisyen sa Minister vin eksplike ankore enn fwa devan Lasanble, akoz mezir pa pe ganny pran pou fer avanse program kontrol lisyen?

Fot, nou konnen i kapab arive. E dan sa ka in arive akoz *staff* in tro forse e zot in souzestim lanplè sa loperasyon. Me i kler ki lentansyon bann zofisyen sete pa pou kre en senaryo avek lisyen mor, me pou anmenn en rezilta.

Letan bann lensidan parey i arive nou bezwen arete, e antre dan tou detay bann pratik ek prosedir, fer koreksyon e pran aksyon neser. Nou'n aktyelman aret tou loperasyon kontrol pou lemoman e nou pe revwar li dan tou son detay.

An menm tan reaksyon piblik lo metod ki pe ganny servi pou osi ganny konsidere e apre nou ava decide lo tou bann prosen demars.

Toudmenm sa lavertisman ki'n notifiye piblik pou gard zot zannimo kot zot pou reste anfers ziska lafen lannen, akoz lezot metod pou kontinyen ganny servi.

Mr Speaker, lisyen eran i en defi serten pou Sesel. E in ler pou nou koman en pei annan en diskisyon fran e onnet lo sa size, koumsa nou ava kapab bouz pli devan e aret fer sa size lisyen vin enn ki diviz nou popilasyon, parey nou'n vwar dan sa bann dernyen zour.

In ler parey bann reaksyon piblik in endike, pou nou adres metod kontrol lisyen eran. Me nou bezwen osi adres seryezman responsabilite nou sitwayen koman propriyeter lisyen.

In ler pou nou adres *dog breeding*. Sa kekyon konbyen lisyen en lakour i kapab annan i merit ganny aborde. Nou bezwen osi adres servis profesyonnel pou akonpany bann manm piblik dan zot responsabilite.

Mr Speaker, mon pou pas lo en kourt lalis zis pou ilistre en pe severite problemn dan pei e rezon ki zistifiye pran kekyon konmsi nou dan *emergency*.

Premye, dan zone lapes Ile du Port. Sityasyon 2022, prezans lisyen ti fer ki sa

landrwa ti kapab *fail* odit sanitasyon e perdi akreditasyon pou eksport pwason.

Dezyenm, latak lo zannimo laferm lo Mahe, Praslin ek La Digue i ankor pe arive. E plizyer endividi ek fermye in perdi volay, bef, koson e kabri aköz lisyen.

An 2022 en fermye lo Mahe, dan Sid Mahe in perdi plis ki 760 pti poul. E L'Union Estate 3 semen pase in perdi anviron 250 poul ponn aköz lisyen eran.

Touris e rezidan pa kapab fer *jogging* e osi malpropte lo lans Beau Vallon. E i annan touris ki'n menm dir zot pa pe retourn ankor aköz sa sityasyon lisyen lo lans.

Morde lisyen lo bann etranze. La Pointe Praslin, North East Point, Anse Royale in ganny rikorde dan bann letan resan.

Problenm agresyon kont dimoun ki fer legzersis lo *fitness trail* ouswa mars apye Providence ek Perseverance. E zis pou soulinyen Mr Speaker, ozordi departman pe ganny li apepre 10 konplent lisyen par mwan e sa i pe ale pou tou le mwan dan lannen.

Sa bann problenm ki mon'n nonmen i an plis ki bann problenm vwazinaz koze par lisyen ki marsaye e fer dega lo

propriyete lezot. Annou rapel nou ki dan *survey* 2020 twa kar lisyen ti ganny idantifye koman bann ki'n ne dan lanatir e pa atase avek okenn lakour.

Mr Speaker, lentansyon program kontrol se alor pou adres sa bann pwen kot i vremen annan problenm. E anmenn popilasyon lo en nivo kot i kapab ganny zere an servan lezot metod parey latrap ki pa donn en bon rezilta letan i annan en gran kantite lisyen pou kontrole.

Nou bezwen fer remarke ki dan plizyer lenstans bann latrap i osi ganny vole e kase par bann enkoni. E zis pou soulinyen Mr Speaker, 2022 nou komans avek 15 latrap e ozordi nou reste zis 8 latrap. E sa se aköz bann lensidan ki arive letan nou met latrap deor pou atrap lisyen.

Mr Speaker, mon oule fer kler ki kontrol popilasyon ti'n ganny prevwar koman en aktivite kour term e i enn parmi plizyer mezir ki departman pe met lanfaz lo la sa lannen. Departman in ganny donnen bann lobzektif ki Gouvernman i oule vwar progre lo la sa lannen.

Sa se rediksyon dan popilasyon eran e konsekaman rediksyon konplent serye konsernan lisyen.

Ogmantasyon dan lakantite lanrezistremman; Ogmantasyon dan lakantite sterilizasyon; E logmantasyon dan penalti pou lofans anba Lalwa *Dog Control*.

Apard bann lanons lo mezir kontrol, bann *staff* pe deplway mezir dan bann distrik lo lanrezistremman e sterilizasyon. Zofisye *Dog Control Unit* pe fer *door-to-door visit* kot bann lakour. E sa in fini komanse dan Was ek Sid Mahe pou sansibiliz dimoun pou vin pli responsab anver zot lisyen e pou anrezistre zot lisyen dapre Lalwa.

Dan lannen 2022, 536 lisyen an total in ganny anrezistre. E sa i en amelyorasyon lo lannen presedan me i pa ase.

Lo kote Lalwa, nou'n realize ki pa tou *staff* Lagrikiltir ki sipoze pe aplik Lalwa ki lo sa nivo, pou met an aplikasyon provizyon sa Lalwa *Dog Control Act*. Diskisyon in fini ganny fer avek lofis *Attorney Zeneral* e ansanm avek zofisye legal lanvironnman, Minister Lanvironnman, nou pou *train* bann zofisye pou mye ekip zot. Nou espekte i ava ed nou avek lobzektif ogmantasyon dan penalti. E pou sa *training* i sipoze komanse nenport ler.

I annan en konpanyi ki apel *Happy Tails* ki pou ganny

lanse lafen ouswa komansman Me pou ankouraz *dog owners* vin devan pou steriliz zot lisyen a en pri abordab. Sa pou ganny fer dan tou rezyon lo Mahe Praslin ek la Digue tou le mwan. E nou pe esper kargezon *anesthesia* ki'n fini ganny *order* pou nou komans sa konpanyi.

Sa aktivite pou ganny fer an kolaborasyon avek bann NGOs ek lezot lorganizasyon ki annan lentere lisyen a ker. Dan sa konpanyi nou pe osi edik dimoun pou vin pli responsab anver zot lisyen.

La Mr Speaker, mon ti ava oule lans en lapel avek piblik pou vin devan letan sa bann konpanyi pe ganny fer. I annan bann klinik resan ki departman in fer, omwen 14 e partisipasyon in vreman ba. Alor sa voyaz nou pe demann piblik pou vi devan e fer zot lisyen ganny sterilize pou ki nou annan mwens problem dan pei.

Diskisyon in fini ganny fer avek Departman Prizon pou nou travay ansanm avek zot ek lezot NGO pou steriliz bann lisyen ki zot sonnyen e kite dan prizon. Me osi pou get loportinite pou nou travay avek piblik. Nou annan plan pou travay avek Minister Ledikasyon e lezot lazans lo

fason pou edik bann zanfan vin pli responsab anver zot lisyen.

Departman Lagrikiltir an kolaborasyon avek Departman Lapolis i fek konplet en *training* entansif avek nou bann zofisyen pou pli byen ekip zot lo lafason pou zer lisyen.

Pou ogmant kapasite nou bann zofisyen dan *Dog Control Unit* nou pe al fer *training* anba sipervizyon veteriner pou ekip 9 *staff* avek konpetans, pou zot kapab aprezan fer prosedir sterilizasyon.

Sa pou ede pou ogmant lakantite sterilizasyon ki ganny fer dan pei e pou ede rezourd problemn lisyen eran dan pei, dan long term.

Aplikasyon Lalwa ek lenformasyon pou piblik i en lot morso ki nou pe travay lo la. Nou espekte ki avan lafen dezyenm kar lannen, departman i ava annan son prop zofisyen ki pou 100poursan konsantre lo ledikasyon ek lenformasyon.

Sa i ava ed nou fer sorti lenformasyon dan tou medya. Nou lekspektasyon se ki tou sa bann aksyon i ava ede pou anmenn nou - apre ki nou kapab stabiliz popilasyon lisyen eran - pou kre kondisyon pou plis kontrol ek mwens lisyen reste larg ek reprodwir dan lanatir.

Pou fini Mr Speaker, mon tourn ver mouvman par bann manm piblik ki'n ganny fer apre sa lensidan.

Mon'n resevwar korespondans *email* serten dimoun Sesel e osi an deor pei, ki konsernen par bann nouvel ki pe sirkile. E mon'n osi vwar en petisyon *online*. Mon'n osi ganny kopi en notis en lamars ki pou ganny fer anvil.

Mwan ek bann zofisyen Minister nou napa naryen kont sa bann linisyativ. Annefe Mr Speaker, nou krwar ki manm piblik i merit santi zot lib pou fer zot konsern sorti. E i enportan ki Lotorite i port latansyon lo sa ki zot pe dir.

Nou osi nou pe donn latansyon lo sa bann size, e i annan menm en group ki mon pe zwenn avek sa semenn. Me san demann personn pou sanz zot petisyon aköz sa i zot drwa, mon oule enform bann ki pou lir sa paz lo *change.org* ki sa ki mon'n dir pli boner lo loperasyon kontrol, i sel protokol ki ganny aplike Sesel.

Lezot lisyen dan latrap i ganny garde e apre 7 zour si napa opsyon i met dormi avek pikir egzaktaman parey i fer dan tou pei. E parey i ganny permet anba Lalwa.

Kontrerman avek sa ki'n ganny dir lo sa paz, napa okenn

lisyen ki ganny *beaten to death*, napa *fighting for hours and days* e napa okenn lisyen ki ganny brile ouswa ganny zete dan losean. Mersi Mr Speaker.

MR SPEAKER

Nou pou pran kestyon siplemanter pou letan ki permet. Mon demann bann Manm pou gard zot kestyon direk silvouple. E Minis silvouple pou nou pran otan kestyon ki posibil, gard ou bann repons direk lo kestyon ki'n ganny demande.

Onorab Wallace Cosgrow ou kestyon.

HON WALLACE COSGROW

Mersi Mr Speaker. Bonzour Mr Speaker, bonzour tou dimoun. E bonzour to Manm Onorab dan Lasanble.

Mr Speaker, Minis nou'n tann preski dir en *Statement* bomaten par Minis. Annefe Minis in dir li menm ki poudir i ti'n demann Lasanble pou vin fer en *Statement* lo sa size. Petet ti ava *avoid* tou sa bann zafer ozordi ki pe arive. Me nou pa sir akoz sa kominikasyon pa'n ariv kote nou *Caucus* isi.

Mr Speaker, dan menm laliny Minis i preski dir i annan en *media blackout* lo sa zafer. Bann Medya Nasyonal pa pe neserman koz lo la. Me

selman apre ki piblik in fer sorti zot konsern, ki'n annan serten keksoz ki'n pase lo medya.

Minis li menm son Minister in refize donn *interview*. I annan *Animal Welfare Societies* ki osi eksprim zot sa, me i pa'n pas lo *SBC*.

Mr Speaker, mon kestyon se ki Minis i kler ki i annan *bad planning* dan lafason ki sa in ganny fer e ou'n fer sorti bomaten.

So, dir nou *going forward* la ki zot pe fer pou asire ki zot re plan sa travay en pti pe pli byen pou ki napa sa *outcry* ozordi Sesel e osi aletranze anver tretman zannimo?

E osi Minis eski ou kapab eksplik nou en pti pe ou plan an sa ki konsern medya, pou enform bann dimoun lo bann keksoz koumsa, akoz i kler ki sa enn Minis ki la in *fail* total. E in annan tro bokou *outcry* par nou popilasyon Minis. Mersi bokou.

MR SPEAKER

Mersi Onorab. Minis ou repons?

MINISTER

FLAVIEN

JOUBERT

Mersi Mr Speaker. Mr Speaker, kot i konsern lenformasyon pou piblik, piblik ti ganny notifie. Sa nou bezwen dakor. Notifikasyon in ganny anvoye

avan bann lopeyasyon i ganny fer. E sa ou ava vwar dan medya, kopi i la.

Akoz ki nou pa'n sorti deswit avek en kominikasyon Zedi ouswa Vandredi? Akoz dan lepase ki'n arive se ki nou osi annan bann lensidan kot letan en lopeyasyon i ganny fer par Departman Lagrikiltir, i osi annan lezot dimoun ki profite e i fer serten aksyon an menm tan.

Nou bezwen vey byen ki nou napa sa bann kalite lensidan. Akoz nou'n deza rikorde dan lepase kot lezot i osi profite pou fer serten aksyon ansanm avek sa ki Departman Lagrikiltir pe fer.

E nou, nou pa ti a voudre *assume* responsabilite pou tou sa bann keksoz, alor nou'n get byen avan ki nou fer sorti lenformasyon. E nou enform zot ki Mardi nou pou donn zot tou lenformasyon lo la size.

Ki nou stratezi *going forward*? Parey mon'n dir nou pe aret tou lopeyasyon. Nou pe reviz prosedir, nou pe reviz protokol. E nou pe get tou nou bann metod ek tou nou bann fason fer. E lafason ki *planning* i ganny fer pou bann travay. E apre sa nou ava deside ki manner nou pou bouz devan.

Alor pou lemoman pou napa okenn lopeyasyon kontrol

ki pou kontinyen ziskan ler nou kapab konplet sa revi. E apre nou ava kontinyen bouz devan avek okenn lopeyasyon. Mersi.

MR SPEAKER

Mersi. Onorab Herminie ou kestyon.

HON WILBERT HERMINIE

Mersi Mr Speaker. Bonzour Mr Speaker. Bonzour Manm koleg Onorab. Bann zabitan Glacis dan Galeri e tou dimoun lekout.

Minis kestyon in vin lo en *Order Paper* pa pou diviz sa pep, me pou rod leklersisman e pas lenformasyon. Akoz vi ki zot pa ti pe donn okenn *interview* lo sa size e sa size i annan en lenportans nasyonal.

Eski Minis i kapab dir nou Lasanble ki kalite pwazon ki ti ganny servi? Enn.

De, eski sa i pou annan lefe advers lo lezot zannimo?

E trwa, kote zot pe mete sa bann pwazon? Mersi Mr Speaker.

MR SPEAKER

Mersi Onorab. Minis ou repons?

MINISTER FLAVIEN JOUBERT

Mersi Mr Speaker. Mr Speaker mon pou, avek ou permisyon pa al dan detay serten keksoz

asosye avek bann loperasyon akoz son lenplikasyon pli tar.

Nou servi serten prodwir byensir e nou ganny serten rezilta avek. Be selman Onorab si ou le detay nou ava asiz avek ou personnelman, nou ava koz lo la.

Me mon pa oule ki nou fer sa kalite diskisyon. Akoz i annan en kantite keksoz ki vin avek. E i annan en kantite dimoun pe ekoute deor. E nou pa ti ava voudre ki nou ouver en diskisyon lo sa size piblikman.

Me selman keksoz ki mon ti ava kontan dir ou se ki nou fer sir ki napa okenn restan pou fer okenn lefe lo okenn lezet zannimo apard sa ki nou pe targete. Mersi.

MR SPEAKER

Mersi Minis. Mon a pran kestyon Onorab Bastienne.

HON DESHEILA BASTIENNE

Mersi Mr Speaker. Bonzour Mr Speaker. Bonzour tou Onorab. Bonzour tou koleg. E bonzour tou bann zabitan Glacis dan Galeri.

Mr Speaker, dan Perseverance lisyen eran in peple e in vin danzere. Annan bokou dimoun ki ler zot in fatige, zot in nepli anmoure avek zot lisyen, zot vin larg dan Perseverance. E *witness* i

annan kot nou'n vwar zot pe fer sa aksyon.

Eski Minis i kapab dir avek Lasanble, lekel ki pou responsab letan lisyen eran in mord en zanfan oubyen en nenport zabitan, ou menm sa bann lisyen in andomaz propriyete bann dimoun tel ki desir zot kousen, dormi lo zot sofa, fer malpropte anba zot lavarang, vomi partou?

Mon ti ava kontan konnen Minis, lekel ki pou pran sa responsabilite e ki pare pou pey domaz sa bann tel ensidan ki ganny koze par lisyen eran dan Perseverance?

E osi Minis eski ou kapab dir avek nou Lasanble, si apre tou sa bann konplent ki'n anrezistre lo lisyen eran e plizyer ensidan ki'n arive partou lo lans, dan distrik, dan lavil Victoria, konbyen *pet lovers* ki'n vin devan avek en bon solisyon pou anmas sa bann lisyen?

E nou ti ava osi kontan konnen si i annan okenn *pet lovers* ki pare oubyen ki'n ofer pou vin ede anmas sa bann lisyen eran?

E eski osi parmi i annan posibilite ki sa bann lisyen eran i kapab annan bann maladi enfektyez ki kapab, ki apre ki en dimoun in ganny morde i kapab ganny enfekte, parey

lontan nou ti dir maladi laraz?
Mersi Minis.

MR SPEAKER

Mersi bann Manm. Limit zot
kestyon en pe silvouple. Permet
lezot Manm demann keston.
Minis?

**MINISTER FLAVIEN
JOUBERT**

Mersi Mr Speaker. Onorab ou'n
koz lo responsabilite pou lisyen
apre nou'n koz lo bann ki'n
pran lisyen pou *rehome* parey
nou dir e osi bann *risk public
health*.

Nou, nou toultan krwar ki
sa bann lisyen zot pa
neseserman en problem
koman en lisyen. Problem se
son met ki responsab sa
zannimo.

E nou toultan bezwen fer
rapel sa, se ki si nou pe koz labi,
welfare, sa lisyen i dan semen
akoz i pe ganny abize par son
met. In ganny abandonnen
ouswa i pe ganny abize e se pou
sa ki'n fors li kit kot li.

E mon krwar i enportan ki
dimoun i konpran poudir
responsabilite i retoun lo sa
dimoun ki annan sa lisyen. E lo
sa dimoun ki'n swa vin larg sa
zannimo. E nou vwar par
egzanp i annan dimoun i sonny
zannimo, letan i vann 2 piti,
apre larestan i abandonnen dan

sed. E sa i kre en problem pou
Perseverance.

Alor pou mwan
responsabilite se sa bann
propriyeter. Gouvernman li i
vini a lafen sa long parkour ki
lisyen i fer, letan napa solisyon,
letan lisyen i vin en nwizans. E
Gouvernman i bezwen *step in*
pou li kapab vin ek en solisyon
akoz solisyon napa e bann
dimoun in fer zot problem vin
en problem piblik.

Bann kantite *rehome* mon
ava demann mon bann koleg
pou donn en pe lenformasyon
konbyen ki' nou annan ki'n
ganny *rehome*. Me i pa bokou.
Akoz parfwa bann lisyen i
ganny anmase serten pa dan
bon eta e dimoun pa oule. E
alor i en pe konplike pou
rehome lisyen.

Risk public health, wi
Lasante in enform nou poudir i
annan bann problem avek
public health. Sirtou latansyon
in ganny mete lo leptospiroz
avek risk si laraz i ariv Sesel. E
nou konnen poudir i annan sa
bann problem e ki nou bezwen
osi met zefor pou nou evite ki
nou annan en kantite zannimo
ki pe sirkile partou dan pei.
Mersi, Mr Speaker.

MR SPEAKER

Ou ti pou donn laparol en zofisye pou donn serten detay? Oubyen pli tar?

MINISTER **FLAVIEN**
JOUBERT

Mr Speaker i 36 an 2022. Mersi.

MR SPEAKER

Bon, mersi. Mon ava pran kestyon Onorab Audrey Vidot.

HON AUDREY VIDOT

Mersi Mr Speaker. Bonzour Minis ek ou delegasyon. Tou Manm Onorab, bann dimoun dan Galeri e tou dimoun ki a lekout.

Minis mon'n ekout ou byen dan ou bann repons. Ou ladministrasyon in ganny en manda pou fer pli byen. Pli byen Minis e Lasanble i vot lo en Bidze ki sa bann *animal lovers* i kontribye dan *taxpayers money*. Pou zot enplimant en Lalwa pou kontrol e protez nou bann zannimo, enkli lisyen.

Alors Minis, dir mwan ki problemn ki ou ladministrasyon i annan? Mon'n vwar en pti *advert* dan *Nation* ki zot in mete. Pti *advert*. So ki problemn ki annan pou zot servi resours ki Bidze i annan i donn zot, pou zot kapab sansibiliz e edik petet lo program travay ki zot pe fer pou zot kapab anmas sa bann

lisyen eran. Vwar en lakour pou met zot, si napa annan en fason pli posib ki pli pa kriyote parey piblik pe vwar lafason pe ganny fer.

Servi resours ki zot gannyen Minis, kwa ki problemn ou Gouvernman pou kapab fer sa?

Nou pa pe kre divizyon nou. Nou anvi ki zot servi resours byen pou anpese ki i annan divizyon.

Akoz Minis ler zot pa vin devan piblik pou eksplik zot vre lentansyon, zot vre anvi ki zot anvi fer dan medya, dimoun pa pou konpran ki travay petet zot pe vin fer. Sa Minis. Mersi.

MR SPEAKER

Mersi Onorab. Minis ou repons.

MINISTER **FLAVIEN**
JOUBERT

Mersi Onorab. Mersi Mr Speaker. Mr Speaker, mon ti ava kontan koz lo sa bout divizyon ki mon krwar mon'n tann 2 fwa sa mo 'divizyon.'

Mwan mon'n met divizyon dan mon *text* pa pou target okenn Onorab aköz in met en pwen devan Lasanble. Me pou fer kler poudir sa size i en size Nasyonal e kontan, pa kontan nou pou bezwen dil avek nou tou, tou dimoun i bezwen dil

avek. So, i pa e kestyon ki i en dimoun pou target en lot.

Akoz sa problemn lisyen nou tou nou ganny afekte avek. En parti politik, en lot parti politik ou pou afekte ek lisyen parey. E lisyen pa swazir lekel ki i pou dil avek li.

So, i enportan pou nou get sa sityasyon divizyon, letan mon'n koz divizyon se nou pe les en problemn ki i en problemn nasyonal ki nou tou nou devret gard en lizye lo la, vin en zafer ki nou pe fer li vin en konfli.

I pa devret en konfli. I devret nou tou nou devret reflexir. Nou tou nou annan zannimo e nou tou nou bezwen responsab.

Resours Mr Speaker, lannen pase 8 program in ganny fer lo lisyen. Nou'n met bann lanons lo diferan medya e lo medya sosyal osi. E parey mon'n dir dan mon entervansyon, dezyenm kar lannen nou pou annan nou en zofisye *full time* pou fer ledikasyon.

Onorab ou ava realize ki kot Departman Lagrikiltir ti napa, pou en bon pe lannen in napa en dimoun ki dedye son letan pou li fer ledikasyon ek *outreach*. E nou, nou pe met an plas en dimoun la.

Ou'n dir mwan ladministrasyon i sipoze fer pli byen. Onorab nou pe sey fer plis. Se sa mon lentansyon, mon lentansyon se pa reste kot nou ete. E pa les bann zofisye zis asize e kontinyen konplent poudir nou pa kapab fer.

Nou bezwen fer plis, e nou bezwen donn plis rezilta. E se sa ki mon'n dir ou mwan dan mon repons, se nou annan en kantite dimoun pe demann nou ki ou pe fer? Akoz ou pa pe kapab met sa problemn anba kontrol? E nou bezwen fer kler poudir nou pe fer keksoz. E eski - non mon krwar mon ava aret la Mr Speaker. Mersi.

MR SPEAKER

Mersi.

MR SPEAKER

Mersi Minis. Kestyon Onorab Esparon.

HON REGINA ESPARON

Mersi Mr Speaker. Mr Speaker eski Minis i kapab dir nou apard sa metod met pwazon, i annan lezot metod ki kapab ganny servi pou elimin sa bann lisyen eran?

Si wi, eski i kapab ganny konsidere a lavenir?

E dezyenmman, ki kalite program edikasyonnel kontinyel ki Minister pe fer ou

anvize pou sansibilizasyon, pou pa zete lisyen dan gran semen e pou pran plis zot responsabilite vizavi zot *pet*. E ankouraz plis sterilizasyon anvi ki la zot in ganny zofisyè parey ou fek dir? Mersi.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker. Onorab mon krwar sa keston i en bon keston. Konsernan metod. Eski sa metod ki nou pe servi i sel metod ki nou kapab servi?

Non, i annan lezot metod ki nou kapab servi, me selman nou sityasyon lisyen eran i vremen serye. Lezot metod i pa donn sa kantite rezilta e nou napa tou bann lekiman ki nou bezwen, pou nou fer adisyonnèl kontrol pou nou kapab ganny sa kantite rediksyon dan popilasyon.

I annan par egzanp, mon'n al rode, sipoze annan en *blow pipe*. Detrwa *blow pipe* mon krwar ki sorti en dart ladan avek en *tranquilizer* ki kapab fer pou kapab anmas bann lisyen avek. Nou nepli annan, nou pe *order*. Nou annan osi *dart gun* ki i kapab ganny servi pou *knock down*

lisyen apre pou anmèn zot anndan. Nou napa pou lemoman, tousala nou bezwen fer vini.

Latrap parey mon'n dir. Nou'n deza annan en pe latrap, me nou'n fer agrandi lakantite latrap, me latrap pa ase. E i ganny kase tanzantan. E kotasyon ki nou'n gannyen pou latrap ozordi i apepre R20mil en latrap. E nou ti annan 15 i reste nou 8, nou bezwen al fer ankò en dizenn la. Pou nou kapab satisfè bezwen pou nou *trap* bann lisyen.

E bann lezot metod osi se atrape, sterilize e fer ki bann zannimo swa i ganny *rehome* swa i ganny large. Me selman i pou pran en bon pe zefor akòz ozordi nou napa tou sa kapasite.

Parey mon dir nou pe sey fer, nou pe akseler lakantite dimoun ki nou annan ki kapab fer sterilizasyon, e anba sipervizyon veteriner. E nou espekte ki sa lannen nou pou annan en bon pe ki pou fini *train* e *hopefully* la prezan nou ava kapab fer bann klinik ki ase larz, ki ase gran e ki prezan nou ava kapab ganny en bon rezilta lo kote sterilizasyon bann zannimo.

Me i pou pran letan akòz aktyelman nou napa sa kantite dimoun. E parey mon ti enform

Lasanble avan, i zis resaman ki nou ganny nou 3 *vet*. Nou ti napa ki menm *vet* kot Departman Lagrikiltir.

Me la nou annan e nou pou bezwen fer *training* pou nou kapab aranz nou bann dimoun e donn zot sa kapasite.

Ledikasyon, i annan en program ki nou pe *roll out* ki pou akonpany tou bann travay ki nou pe fer pou nou al dan distrik.

E ankor en fwa mon lans lapel avek piblik, pa zi ekout nou dan Lasanble me letan nou fer lanons pou fer sa bann keksoz, aktyelman vini anmenn zot zannimo.

Akoz bokou dimoun i dir ou wi, bokou dimoun i dir ou mon dakor ek lisyen, mon kontan. E nou ti ava kontan vwar zot devan akoz nou pou evite al dan bann mezir ekstrenm.

Me letan in ariv ler pou pran mezir, letan in ariv ler pou desann ek ou lisyen, pou vin anmenn li sterilize ouswa pou anmenn li anrezistre, la ki nou vwar problemm.

Problemm i pa ozordi pou nou fer komanter lo *social media*. Sa i fasil sa. Me anmenn ou lisyen pou sterilize, ouswa anrezistre ou lisyen ouswa kontrol li kot ou lakour. Donn li

en pe manze pou li pa marsaye. La ki problemm.

E mon krwar tou dimoun i bezwen santi poudir sa i en responsabilite tou dimoun, i pa ni menm politik sa. I ou avek ou zannimo ek ou responsabilite koman en sitwayen. Mersi.

MR SPEAKER

Mersi Minis. Kestyon Onorab Georges Romain.

HON GEORGES ROMAIN

Mersi Mr Speaker. Bonzour Minis ek ou delegasyon. Bonzour tou koleg Onorab e tou dimoun ki dan Galeri. Mersi.

Mr Speaker, mon kontan pou tann Minis fer resorti ki zot in arete sa loperasyon. E ki zot pe ekout manm piblik rod en pli bon fason pou rezourd sa problemm. Tre byen Minis.

Selman mon kestyon Minis i en pti pe dan menm laliny avek Onorab Esparon. Minis vreman mon osi mon annan lisyen dan lakour.

Mon santi kekfwa napa ase, parey ou'n dir ou napa ase travayer ki pou pas kot bann lakour, pou edik bann dimoun lafason ki mannyer pou, - mon pa dir, dir zot ki mannyer pou fer ek zot lisyen.

Be i annan dimoun pa pe tret byen zot bann lisyen. E se

sa ki sa bann lisyen aprezan i arive ki sa bann lisyen i sape kot zot, zot al dan bann landrwa piblik. Prezan sa bann lisyen byensir zot viv laba, zot rod manze, zot fer plis piti lisyen.

E se sa vremen sa problem. E i annan byensir ki pran zot lisyen zot menm zot al anmenn laba dan ban landrwa piblik.

Mwan Minis mon ti ava kontan ou fer sorti ozordi for dan sa Lasanble kot manm piblik pe ekout ou ozordi, ki vremen Minister pe fer pou rezourd sa problem kot bann landrwa, kot bann lakour pou evite ki sa bann lisyen i *end up* dan semen oubyen dan bann landrwa parey nou pe dir dan bann landrwa piblik?

Ki aksyon Gouvernman pou pran ek sa bann dimoun ki pa pe okip zot lisyen byen? Mersi Mr Speaker.

MR SPEAKER

Mersi Onorab. Minis.

MINISTER FLAVIEN JOUBERT

Mersi Mr Speaker, mersi Onorab. Onorab zis pou soulinyen ki letan bann zannimo i ganny anmase dan latrap, ozordi la laplipar bann zannimo i pa bann zannimo ki

annan swa en idantifikasyon, swa en *tag*, swa en kolye.

E savedir sa bann lisyen en bon pe zot i 100poursan bann lisyen eran ki'n ne an deor ki pa asosye avek okenn lakour.

Departman i pran aksyon avek lisyen ki nou konnen lekel son met. Savedir si letan ou pas en *reader* lo son likou, ou vwar poudir i annan en limero ki *pop up* savedir i annan en *chip* dan son likou, si i annan en kolye avek en meday e ouswa i la devan lakour en dimoun e i reste la, la ou konnen poudir sa son lisyen. Me si i napa idantifikasyon, i difisil pou ou kapab konnen pou ki e pou ou pran aksyon.

Alors sa i en keksoz ki vin en difikilte. E plis nou annan lisyen eran, plis sa travay i vin pli difisil. Me ki departman pe fer, i annan vizit 491 vizit ki'n ganny fer an 2022 kot bann lakour. E la nou pe fer li ankor plis. Nou pe ganny korperasyon avek bann *DAs* e nou pe al plis landrwa.

E parey ou'n dir, si i annan posibilite pou ganny sipor dan distrik nou ti a voudre ganny sipor. Akoz nou ti a voudre ki nou vizit preski tou dimoun ki annan en zannimo e pou koz ek zot lo lafason ki zot kapab pli byen *manage* zot zannimo.

So, mon krwar i enportan ki nou ganny korperasyon tou distrik. Nou ganny korperasyon tou bann MNAs ek tou bann DAs ek tou bann manm piblik pou nou kapab fer marse sa travay. Akoz zis zofisye lagrikiltir monte kot tou lakaz i pa ou fer en diferans.

I enportan ki bann dimoun ki annan zannimo, zot ki fer sa diferans. Mersi.

MR SPEAKER

Mersi Minis. Kestyon Onorab Sandy Arissol.

HON SANDY ARISSOL

Mersi Mr Speaker. Bonzour tou dimoun ki a lekout. Mr Speaker, mon ti a kontan letan nou pe koz lo lisyen, mon rapel Mr Naiken kot SSPCA, Mr Naiken menm mon krwar si mon apel byen, Padayachy. Ki ansarz laba, ti pe dir ti pe demann dimoun pou vin devan anmenn manze, donn zot en led avek delo, vin adopte lisyen.

Be zisteman vi ki pou annan en lamars konsernan bann dimoun ki kontan bann lisyen. La i en loportinite pou zot ed Mr Padayachy adopte en lisyen, pa zis fer lamars, donn li en pe manze, donn li en pe delo e sonny li byen pou li pa ganny ranmase aswar.

Mon 2 kestyon ki mon ti ava kontan demann Minis se, eski i fer premye fwa ki Sesel i antreprann en tel legzersis ki nou'n pas an traver la? Eski i fer premye fwa dan pei ki Sesel i pas an traver en tel legzersis kont bann lisyen eran?

Dezyenmman, konbyen bann etranze oubyen konbyen bann Seselwa ki sitan kontan bann zannimo, ki sitan kontan lisyen ki'n vin devan pou adopte en lisyen kot Mr Padayachy laba parey nou pe dir?

Oubyen pou vin devan pou donn serten lasistans manze, pou donn delo oubyen pou pas devan lakour bann dimoun atraver zot lorganizasyon, zot Lasosyasyon ki pou al fer lamars.

Pou zot pas devan lakour bann dimoun pou edik bann dimoun mannyer pou okip zot lisyen, ki mannyer pou pran swen avek, ki mannyer pou kit li kot lakour, ki mannyer pou tret li byen. Pou li pa ganny vwar, parey kestyon i dir dan lari piblik, dan en kondisyon deplorab? Mersi bokou Mr Speaker.

MR SPEAKER

Mersi Onorab. Minis.

MINISTER
JOUBERT

FLAVIEN

Mersi Mr Speaker. Mersi Onorab. Onorab mon'n mank ou premye kestyon. Selman ou'n demann mon sa enn dezyenm lo kote adopsyon. Konbyen bann etranze ek Seselwa ki'n adopte?

Parey mon dir ou lakantite i vreman ba. I 30 ekek lisyen 2022. E i annan pou fer avek mon krwar kondisyon bann lisyen letan i ganny atrape.

Me selman petet repet avek mwan si ou pa *mind* sa premye pwen ki ou'n demande.

MR SPEAKER

Mersi.

HON SANDY ARISSOL

Mr Speaker, mon premye kestyon mon ti demann ou si i fer premye fwa ki sa levennman i arive dan pei? mersi.

MR SPEAKER

Mersi.

MINISTER FLAVIEN JOUBERT

Non Onorab, sa aktivite i bann loperasyon ki letan i annan problem in ganny fer e in ganny fer plizyer lannen. Pa zis la, me in ganny fer plizyer lannen dann lepase.

E menm avan 2020 wi byensir. In ganny fer en kantite fwa, me i pa en keksoz ki

normal pou nou donn piblisite. Me selman en keksoz ki nou vwar li koman i neserer parfwa depandan lirzans sityasyon.

Me nou pa ganny plezir ladan en. Mon bezwen fer kler poudir okenn zofisyè, okenn dimoun ki fer sa bann louvraz, zot pa trouv okenn plezir ladan.

Me selman en dimoun i bezwen fer sa travay a en moman letan sityasyon in vreman kritik. E se sa ki pe arive.

So nou pou bezwen aksepte ki i annan serten moman kot serten dimoun pou bezwen fer serten travay ki difisil e ki pa tou dimoun ki dakor avek.

Me byensir nou bezwen sansib lo tou bann sansibilite ki dimoun i annan letan sa i ganny fer e pran plis prekosyon posib pou ki i pa koz okenn problem dan sosyete. Mersi.

MR SPEAKER

Mersi. Kestyon Onorab Loze.

HON JOHAN LOZE

Mersi Mr Speaker, bonzour Mr Speaker. Mr Speaker, Minis dan sa *Statement* 14 minit ki ou'n fer la koman ou larepons *PNQ*. Ou'n refer lo ou Lalwa koman *Control of Dogs* an de repriz, e ou'n omit mansyonn sa morso *protection of dogs*. And

protection. Ou'n blanm ou *staff* an trwa repriz dan sa larepons ki ou'n donn *Minister*.

Minis zot in fer zot en loperasyon kot zot in abandonn kadav lisyen mor an mas dan lanatir, lo semen partou. Sa in arive.

An menm tan ou dir nou ki zot in al netway pwazon dan lanvironnman, sa pwazon misterye ki ou pa kapab dir nou. Selman kadav zot in kite, pwazon zot in nobou netwaye.

Now, klerman sa sosyete pa kapab fer zot konfyans pou zwe ek pwazon Minis. Akoz lafason fer se lafason en zanfan 5an.

Now, Minis eski ou pou kapab asiz avek bann lezot *stakeholders* e trouv en meyer fason fer? Sa bann *pet lovers* ki pe ganny blanmen, sa bann Lasosyasyon ki nou pe blanmen. Akoz i paret mwan ou'n *stuck* lo latrap ek lo pwazon. E *until* ki Onorab Regina ti poz son kestyon, ou pa'n mansyonnen bann lezot fason.

Eski ou pou pare pou asize annan en lesanz avek tou dimoun konsernen ki nou *find* en *way forward* ansanm, kot sa bann mo konfli, bann mon divizyon pa lev ankor me nou trouv en fason fer ki nou tou nou agree lo la?

Akoz ou dir nou ou'n met notis, ou notis i dir kontrol. I pa'n dir touye e abandonn kadav dan lanatir kot mon zanfan Perseverance pou vwar. Mersi Mr Speaker.

MR SPEAKER

Mersi. Minis i annan en kestyon.

MINISTER FLAVIEN JOUBERT

Mersi Mr Speaker. Mersi Onorab Loze pou 3 pwen. Mon pa'n nonm *protection* dan mon entervansyon. Mon pa'n nonm sa Lalwa an antye mwan Mr Speaker. Si ou ava realize mon pa'n ni menm spesifye tou detay dan sa Lalwa. Mon'n zis dir poudir i en Lalwa, *Dog Control Act*.

Akoz mon pa'n oule al - *I mean* letan mon pe ekrir mon pa'n met li ladan. Me selman i pa en keksoz, en omisyon ki mon'n fer par ekspre akoz mon le tir *protection*.

Onorab mon krwar i annan en keksoz ki enportan e mon krwar ou'n vwar sa lo *Facebook*. Zis fer sa kler silvouple.

I annan bokou dimoun in asosye laparans en dimoun avek serten konportman. Mon pa dakor mwan. Pa fer ki ou pe kontribye dan sa diskisyon pou

fer krwar poudir mon en kalite boug ki pa kontan lisyen e ki pe fer en keksoz akoz mon laparans.

Non Onorab, mon'n anmas en lisyen mwan. Mon'n fer li vin en lisyen ki'n koupe e ki'n ganny anrezistre e ki mon'n pran ka avek se mwan san ki mon'n fer -

(APPLAUSE)

MINISTER FLAVIEN JOUBERT

Non, non. San ki mon'n kontribye dan problem lisyen eran dan pei. E mon pa'n zis koze mwan, mon'n pran ka ek en zannimo mwan.

Mwan osi mon'n annan lisyen. E mon pa dakor sa kalite lapros ki ou pe vin avek pou fer krwar ki mon en kalite boug, e mon pe touy lisyen zis pou plezir.

Nou pe sey fer en louvraz. Mon ti ava kontan delivre lo sa louvraz mwan. So annan pa fer sa pou zis blanm mwan pou dir mwan konmsi ou pe sey donn sa portre.

Akoz mon doute poudir sa zafer ti pou monte. Konmsi nou pe sey montre lo sa portre ki mwan mon annan en problem e mon en kalite boug ki pe touy lisyen par plezir. Non, non Onorab *sorry*.

Mr Speaker, kot i konsern blanm *staff*, mon'n senpleman admet poudir nou annan en problem. E mwan letan mon vin devan Lasanble mon dir ek Lasanble sa ki vre mwan. Mon pa vin akont zistwar.

Mon ti kapab akont en zistwar.

(APPLAUSE)

MINISTER FLAVIEN JOUBERT

Mr Speaker, mon ti kapab fer letour sa problem mwan. E dan lepase personn pa'n dir poudir nou pe servi pwazon. Mon bezwen koz laverite.

E mon bezwen dir Lasanble poudir nou loperasyon ki nou ti pe fer ki'n deza ganny fer dan lepase ki personn pa'n koz lo la, in annan en problem avek la. E nou bezwen koriz sa bann problem ki'n arive.

Prezan lo kote metod. I annan en ta metod ki nou kapab servi, me selman nou pa'n zanmen pratik li dan lepase. E sa mon pa konnen si mon pou blanm sa ki ti la, ouswa i pou lev en lot diskisyon.

Me selman mon pa oule ki i vin en keksoz divizyon. I devret en keksoz ki nou tou nou dakor nou bezwen met solisyon lo la.

Me mwan mon pare pou asiz ek tou dimoun mwan. Parey mon'n dir ou, sa semenn i annan en group ki pe zwenn ek mwan. E mon pare pou zwenn en tou dimoun pou nou vin avek solisyon pou sa problemn.

So annou pa fer li vin en zafer kot ou pe target mwan koman en move dimoun ki pe vin la. Onorab mon'n vin la pou donn laverite mwan. Mersi.

MR SPEAKER

Mersi.

(APPLAUSE)

MR SPEAKER

Mon pe termin kestyon. Mon pe termin kestyon siplemanter la. Onorab ou kestyon in ganny reponn. Ou satisfé.

(Interruption)

MR SPEAKER

Mon pou pran kestyon Onorab. Onorab Loze, mon pe demann ou reste trankil. Ou kapab annan ou kestyon si ou le, me ou'n lev lanmen dernyen e mon napa letan pou li.

Onorab, Onorab Pillay ou kapab poz ou kestyon siplemanter.

(Interruption)

MR SPEAKER

Onorab Gabriel mon pa pe pran ou kestyon silvouple. Onorab -

(Interruption)

MR SPEAKER

Onorab, Onorab Gabriel mon pe demann ou sorti dan lasal silvouple. Sorti.

(APPLAUSE)

MR SPEAKER

Onorab Gabriel, mon pa aksepte ki ou *argue* avek mwan. Sorti dan lasal silvouple.

Mersi. Onorab Pillay ou siplemanter.

HON SEBASTIEN PILLAY

Mersi Mr Speaker. E mersi Minis pou ou bann larepons ki ou'n donn nou. Mon pou retourn lo serten pwen ki Minis in demande, in pran dan son kestyon.

Premyerman Minis ou'n fer serten admisyon an relasyon avek sa program ki zot in etabli. So, mon ti a kontan ou donn nou serten klarifikasyon lo la e ki mannyer pou keksoz pou bouz devan.

Lentansyon sa kestyon se pa pou target ni ou, ni bann zofisye ki pe fer zot louvraz, ni

Gouvernman, ni bann *pet lovers*.

Lentansyon se ki nou vwar en *way forward* ki dan lentere tou dimoun. Ou a note Mr Speaker ki mon'n reste trankil pandan tou sa bann lesanz. E mon kestyon in senp, mon pa fer okenn komanter. Piblik i ava zize lekel ki fer son komanter dan lafason ki i fer.

Premyerman Mr Speaker, ou'n admet ki ou annan ou en *lack of capacity*. Ou enplimant en program *poison baiting*. Akoz ou annan diferan program anba Lalwa ki ou kapab enplimante e ou Lalwa i prekonize ki an relasyon avek bann lisyen ki ou vwar an deor en lakour, ou bezwen *move towards* sterilizasyon apre *euthanizations*. Ou bezwen sey atrap sa lisyen.

So, ki ou pe fer pou adres sa mankman kapasite si ou annan lentansyon al ver en program similer ankor, oubyen pou ou adres lezot program ki ou annan an plas pou kontrol bann lisyen?

Prezan Minis ler ou'n koz lo lisyen eran ou'n mansyonn *tag*, ou'n mansyonn *collar*. Be lamazorite dimoun ki'n bezwen fer, mon'n bezwen fer parey, ou'n bezwen *microchip* nou bann lisyen.

So, avan sa bann lisyen ki'n ganny touye par egzanp, eski zot in regarde sa i annan en *microchip*? Eski in annan en tes ki'n ganny fer pou annan en *microchip*? Minis mwan mon konnen i pa'n ganny fer.

So eski sa osi i kapab vin en fason ki nou dil ek sityasyon pou nou regard sa *microchip*, ki ganny mete dan likou sa lisyen, akoz i pa pou vizib akoz i par anba son lapo?

En lot keksoz ki ou'n anonse se ki ou'n koz lo serten *mistake* ki zot in fer lo preparasyon zot program.

Eski zot in zwenn *NBA National Bio-Security Agency* pou vwar kote zot bann defayans i ete? Swa eski zot napa transpor pou fer letour dan bann landrwa ki zot sipoze fer pou anmas sa bann kadav lisyen, oubyen swa zot napa ase *personnel* pou zot kapab adres sa sityasyon?

Prezan Mr Speaker,

MR SPEAKER

Onorab ou'n demann 3 kestyon. Permet Minis reponn silvouple. Permet Minis reponn ou'n demann 3 kestyon. Mersi. Minis.

HON SEBASTIEN PILLAY

Mr Speaker avek tou respe ki mon annan pou ou, ou kapab

les mwan fini mon dernyen pwen silvouple *and* Minis i ava reponn?

MR SPEAKER

Ou'n demann 3 kestyon. Ale fini ou katriyenm e pa al pli lwen ki sa. Mersi.

HON SEBASTIEN PILLAY

Mersi bokou Mr Speaker. Ou'n koz lo lefe ki sa program pou arete. Me ou notis dan *NASYON* dir ou program pou depi Mars ziska lannen antye.

E ou'n dir poudir program *poison baiting* i sipoze ganny fer lo en baz tanporer. Me sa pa en baz tanporer si i lannen antye.

So, eski ou pou retir sa notis dan *NASYON* e fer sorti en lot notis ki ava enform popilasyon lo ki vre lentansyon *National Biosecurity Agency* e Gouvernman an relasyon avek sa sityasyon? Mersi Mr Speaker.

MR SPEAKER

Mersi Onorab. Minis ou repons.

MINISTER FLAVIEN JOUBERT

Mersi Mr Speaker. Mr Speaker mon ti ava profite pou petet demann leskiz Lasanble. Mon'n en pe azite aköz bann komanter ki'n leve. E i ...

(*Interruption*)

MR SPEAKER

Tre byen.

Order! Bann Manm i ava aret kriye silvouple. Minis zis prosede avek ou repons mersi.

MINISTER FLAVIEN JOUBERT

Zis pou klarifye avek Onorab, sa dernyen pwen ki in leve konsernan lanons. Lanons se kontrol e se pa *poison baiting*. Sa lanons se program kontrol.

E program kontrol i enkli par egzanp *trapping*. Savedir *trapping* i pou kontinyen. Ek lezot metod kontrol pou kontinyen.

Me parey mon'n dir *poison baiting* i zis en parti kontrol e i sipoze ganny fer lo en baz irzan dan bann landrwa kot i annan problem e osi lo en baz tanporer e nou pa ti pe espekte fer *poison baiting* partou pou sa 9 mwan ki vini.

Konsernan ou lot pwen, sipor ek *personnel*. I annan en pe *personnel*, me selman *internally* osi nou annan en pe keksoz pou nou gete aköz pa tou *personnel* ki pa toultan i konfortab avek bann loperasyon ki annan pou fer par egzanp avek destriksyon lisyen.

E nou bezwen balans en pe nou bann dimoun. Me nou pe osi gete ki mannyer nou kapab ganny *additional personnel* pou travay lo la, akoz nou bezwen. Pou en konpany sa groser nou bezwen plis dimoun pou fer sa kalite program.

Microchip, 334 lisyen in ganny *microchip* an 2022. E i deza annan *microchip* dan stok e nou lentansyon se fer ki i annan bokou plis lisyen ki ganny *microchip* sa lannen pou ki nou vreman kapab vwar en rezilta. E letan nou atrape nou kapab idantifye sa bann lisyen e retourn kot zot propriyeter.

Ki nou pou fer *moving forward* avek sa *issue*? Parey mon'n dir *internally* nou bezwen fer sir ki sa semenn nou konplet tou nou bann travay ki annan pou fer avek retourn dan detay sa *case*. *Investigate*, vwar ki'n arive, eksetera. Me apre sa nou pou revwar nou bann protokol. Nou pou revwar metod, nou pou revwar lafason ki nou bann *staff* i fonksyonnen lo teren pou zot fer bann louvraz. E apre nou pou osi ganny diskisyon avek bann partner pou nou met, pou nou koste pli pros ansanm.

Akoz mon'n nonm divizyon akoz pou lemoman nou apar, nou lwen apar e tou

dimoun i annan son lopinyon. E nou pa oule blanm kanmarad. Akoz *once* ki nou blanm kanmarad keksoz i pa marse.

Alor i enportan ki nou kapab koste, rapros avek tou dimoun e fer ki nou annan en konversasyon lo sa size pou nou ganny en pli bon rezilta. Mersi Mr Speaker.

MR SPEAKER

Mersi. Mon pou termin kestyon la. Minis mon pou demann ou eklersi en sel pwen. En sel pwen avan mon terminen.

Eski ou kapab dir Onorab si ti annan *microchip* dan bann lisyen ki ti ganny anmase mor? Mon krwar sa ti enn dan son kestyon.

MINISTER

FLAVIEN

JOUBERT

Mr Speaker ti napa.

MR SPEAKER

Ti napa. Mersi.

(Interruption)

MR SPEAKER

Sorry, mon pe termin, mon pe termin kestyon la. Minis mon pou remersye ou ek ou delegasyon pou zot partisipasyon, e mon swet zot bon kouraz e bon kontinyasyon

dan zot travay. Mersi e bonn zournen.

(APPLAUSE)

MR SPEAKER

Wi Onorab Pillay mon ava pran ou *point of order*.

HON SEBASTIEN PILLAY

Mr Speaker, mwan mon pa krwar lafason ki ou pe fer bomaten i akseptab, *ok*. Mon pa krwar i akseptab.

Mon pou dir ou aköz i pa akseptab Mr Speaker. En Minis in vin dan Lasanble pou li reponn en kestyon. Minis i en gran garson byen entelizan ki kapab reponn tou son kestyon.

Minis pa bezwen ni proteksyon Speaker, ni proteksyon personn. Ou'n donn Minis letan pou fer en *Statement* dan mon kestyon. Apre ou'n koup tou bann Manm pou demann kestyon siplemanter e pou nou kapab ganny klarifikasyon lo kwa ki pe pase, nou pa pe kapab gannyen.

MR SPEAKER

Meri Onorab. Mon'n tann ou *point of order*. Mon'n don kestyon letan reglemanter ki nou abitye donn *Private Notice Question*. Letan in terminen,

mon'n pran tou kestyon ki ti posib pou donneren.

Sa i mon *ruling* silvouple. Onorab.

(Interruption)

MR SPEAKER

Onorab. Onorab Pillay. Onorab Pillay mon pa aksepté ou komanter. Mon krwar i mank respe, alor mon pe demann ou sorti dan lasal. Mersi. Ale.

(Interruption)

(APPLAUSE)

(Hon Lemiel, Hon Gosgrow, Hon Uranie and Hon Aglae and Hon Herminie left the House)

MR SPEAKER

Mon krwar. Atann. Onorab mon pa ankor fini dil avek sa ki mon pe dil avek. Ou ava espere silvouple.

Mon krwar konportman Onorab Pillay i pa akseptab lefe ki in leve, in kriy ek Speaker ler mon'n dir li sorti. Mon pe demann bann Manm konsider aksyon an regar avek Onorab Pillay.

E mon pou relev sa pwen. Mon pou relev sa pwen apre ki mon'n konsilte *Standing Orders*. Me selman pour lemoman mon oule dir, mon oule dir anba *Order 52* mon

konsidere ki lefe ki mon'n met Onorab Pillay, mon'n demann li pou kit lasal e in fer sa avek en kantite kriye e in akiz mwan.

Mon pe demande ki sa Onorab, Onorab Pillay i ganny 'name'. Alor *Standing Order 52* i dir "*whenever a Member has been named by the Speaker immediately after the commission of the offence of disregarding the authority of the Chair or of contravening any orders of the Assembly by persistently and wilfully obstructing the Assembly otherwise, then:- if the offence has been committed in the Assembly the Speaker or the person presiding shall forthwith put the question on a motion being made, no amendment, adjournment or debate being allowed, that such a Member be named*".

Alor mon pe dir mon met Mosyon ki *that* Onorab Sebastien Pillay *be suspended from the service of the Assembly*.

Onorab Georges.

HON BERNARD GEORGES

Mersi Mr Speaker.

(Interruption)

MR SPEAKER

Mon pa ankor fini. Onorab Vidot mon pa ankor fini. Onorab Georges.

(Hon Vidot left the House)

HON BERNARD GEORGES

Mersi Mr Speaker. Mr Speaker.

(Disruption)

(Interruption)

MR SPEAKER

Onorab Loze sa ki ou'n fer i an kontravansyon avek *Order Lasanble* e ou'n mank respe pou *Lasanble*. Mon pe dir ou reste trankil. Onorab Georges.

HON BERNARD GEORGES

Meri Mr Speaker. Mr Speaker anba *Order 52(2)(a)* lefe ki ou'n 'named' Onorab Pillay bomaten. *Order 52(2)(a)* i *provide* ki en Mosyon i ganny propoze e ou'n propoz sa Mosyon e mon ti a kontan ki sa Mosyon i vin lo mon non. E *in moving the Motion* ki mon ava siport ou Mosyon.

E *in fact* etandonnen ki se ou ki'n anmenn sa Mosyon, mon ava *second* sa Mosyon e mon ava demande anba *Order 52(3)* ki etandonnen ki sa i premye lokazyon ki Onorab Pillay i ganny sispann pou en *sitting*. Mersi.

MR SPEAKER

Mersi. Sa Mosyon in napa deba. Eski nou bezwen vote lo sa Mosyon?

HON BERNARD GEORGES

Yes. Mr Speaker nou bezwen premyerman regard 52(2). *“The Speaker shall put a question on a Motion being made”*.

Alor mwan mon pe propoz sa Mosyon. *I am making the Motion ki ou, ou ava put to the House pou en vot e mon demann en Manm segonn sa Mosyon ki Onorab Pillay after having been named is suspended from the Assembly for one sitting.*

MR SPEAKER

Mersi. Mon ava demann en segonnman pou sa Mosyon. Onorab Henrie.

HON GERVAIS HENRIE

Mersi Mr Speaker. Bonzour tou dimoun. *I gladly and happily second the Motion. Thank you.*

MR SPEAKER

Mersi. Mon ava demann bann Manm pou vot lo sa Mosyon silvouple. Manm ki an faver lev lanmen? Mersi. Manm ki kont?

En Manm ki kont wi.

Lo Mosyon pou *suspend* Onorab Sebastien Pillay *from one sitting of the Assembly.* 24

Manm in vot pour, 1 in vot kont e zero abstansyon. Donk sa Mosyon in aprouve e Onorab Pillay *i suspended for the sitting of the Assembly.*

Onorab Loze taler ou'n kriy atraver lasal, mon'n dir ou poudir sa pa akseptab e mon pe demann ou pou pa fer li ankore.

Eski ou annan en lot *point of order?*

HON JOHAN LOZE

Wi Mr Speaker. Mersi Mr Speaker. E ou ava note Mr Speaker ki Onorab Woodcock osi ti pe kriy atraver lasal, ofet i ti pe kriy avek Onorab Vidot koman 'Audrey.' Mon ti pe zis koriz li.

Mr Speaker, prezan pou mon *point of order*, i vin anba *Order 8* lo fason ki ou *conduct* biznes Lasanble.

Mr Speaker mon le port a ou latansyon, ki *the Minister who is a stranger in the House* in anmenn bann eleman *Facebook* ki ti napa naryen pou fer ek mon kestyon. In defann son lekor kont bann lakizasyon *Facebook* a la menm enstan ki in akiz mwan, ki mwan mon'n fer sa bann propo kont li kont son laparans.

Be mwan dan mon kestyon ti napa okenn eleman laparans Minis. Be mon pa pe *take umbrage* a sa ki Minis in

fer mwan. Sa ki ofans mwan se ou konportman Mr Speaker ki *as the* Chair ou sipoze la pou protez Manm e ou pa'n kestyon sa ki Minis in fer dan okenn fason pou protez ou Manm!

E mon pe prezimen ki dan ou kapasite koman sef *LDS*, Prezidan *LDS* sa i *ok* avek ou. Zis parey dan ou kapasite koman Prezidan *LDS* ou'n *move* pou penaliz Onorab Pillay ozordi. E sa Mosyon in ganny segonde par ...

MR SPEAKER

Onorab, Onorab, Onorab ou pa kapab refer mwan dan mon desizyon dan lasal koman Sef *LDS*. Mon Speaker e mon fer desizyon koman Speaker.

(APPLAUSE)

MR SPEAKER

So, mon pe demann ou, mon pe demann ou pou *retract*, *retract* sa silvouple.

HON JOHAN LOZE

Bon Mr Speaker. Mersi Mr Speaker. Mr Speaker ou'n *resign* koman Sef *LDS*?

MR SPEAKER

Mon pe demann ou pou *retract*.

HON JOHAN LOZE

Mon *retract* laverite alors. Mon *retract* laverite.

MR SPEAKER

Mon pe demann ou pou *retract* lefe ki ou'n adres mwan dan en desizyon ki mon'n fer koman Speaker. Si ou'n *retract*, ou *retract*.

HON JOHAN LOZE

Non, mon a *retract*, selman ou Sef *LDS* ou?

MR SPEAKER

Silvouple napa plis largiman ki sa. Mon pou reponn ou *point of order*.

HON JOHAN LOZE

Larealite pa en largiman Mr Speaker, ou Sef *LDS*!

MR SPEAKER

Mon pou reponn ou *point of order*. Minis in donn en repons an rezilta en kestyon ki in demande e in donn repons ki i ti konsidere apropiye.

Donk mon pa vwar naryen pou mon obzekte ladan. Mersi.

Bon nou'n termin la.

(Hon Loze left the House)

MR SPEAKER

Nou pou kontinyen avek sesyon kestyon. E premye nou annan kestyon pou Minis pou

Lapes e *Blue Economy*, Minis Jean-Francois Ferrari. Mon a demann raporter apel li silvouple.

Bonzour Minis Ferrari, Minis pou Lapes ek *Blue Economy*. E avek Minis mon *welcome* osi Mr Derrick Monthly, *Property Manager Seychelles Fishing Authority* e Mr Nel Richard, *Project Leader Seychelles Fishing Authority*.

Minis nou ava pran kestyon bann Manm. Mon pou *pass* kestyon 22 aköz loter kestyon pa la. Kestyon 23 Onorab Regina Esparon.

HON REGINA ESPARON

Mersi Mr Speaker. Bonzour Minis ek ou delegasyon. (Be, mon pa konnen Minis, si bann *US* in tande ou pe vini, zot tou zot in maron.) Mr Speaker, mon ti a kontan si Minis, eski i kapab dir Lasanble, kan ki sa proze *gear store* e lezot lenfrastruktir pou peser Glacis pou komanse? Mersi.

MR SPEAKER

Mersi Onorab. Minis ou repons?

DESIGNATED MINISTER JEAN-FRANCOIS FERRARI

Mersi Mr Speaker. Mr Speaker, bonzour, e bonzour tou bann Manm, e mon pa konnen ki'n

arrive la. Oli *ces messieurs?* Mr Speaker, mon larepons pou Onorab Alcindor i koumsa.

MR SPEAKER

Eskiz mwan. Oule dir Onorab Esparon?

DESIGNATED MINISTER JEAN-FRANCOIS FERRARI

Onorab Esparon, wi, mersi Mr Speaker pou koriz mwan. Mr Speaker, proze Glacis i an se moman dan staz *tender*. Tou plan e dokiman nesaser in fini finalize, e *SFA* i prevwar ki lafen Me sa lannen, sa proze pou komanse. Mon ti a kontan eksplik avek Onorab, ki pou evit kas proze, e annan diferan porsyon *tender* e konstruksyon, ki en metod travay ki dan lepase in anmenn nou plizyer difikilte pou nou kapab asir en bon *management* e transparans.

Management SFA sa voyaz in deside pou *tender* e devlop sa proze dan son totalite. Se pour sa rezon ki'n prolonz en pe letan pou komanse. Sa proze an antye Onorab pou enkli konstruksyon en miray balizaz. Sa i form parti en kondisyon ki nou ti'n fer avek propriyeter later ki a kote. Donk, en miray balizaz, en *boundary wall* pou ganny konstrir.

I annan en semen larantre ki pou permet pyeton e transpor kapab akse sa landrwa. E pou osi annan en, sa ki nou apel en *culvert* ki pou permet drenaz, ki pou ganny konstri. E *gear store* pou bann peser. Sa se bann *gear store* permanan ki pou ganny konstrir pou ranplas sa bann ki egziste la pou le moman e ki tanporer.

Donk sa devlopman i enn ki en pe kompleks. I annan plizyer bout. Me selman nou pou sey fer fason pou nou fer tousala *tender*, e fer bann plan final ki'n fini fer. Ki nou pou fer sa dan en sel *batch*. Donk sa devlopman, Onorab i ekspekte terminen dan 1an. E parey mon'n dir, nou ti a kontan vwar li konmanse dan mwan Me, sa lannen. Mersi.

MR SPEAKER

Onorab Esparon, ou siplemanter silvouple.

HON REGINA ESPARON

Mersi Mr Speaker. Mr Speaker, eski Minis i kapab dir nou si zot pou menm konsidere pou le moman, anvi ki nou'n ganny sa bazar o bor ki bann peser pa pe tro servi. Zot pou konsidere petet met en baraz pou soley, swa en rido. Parski, akoz bann peser pa pe servi sa bazar? Parski i annan soley ki tap lo zot

pwason dan 5er, e i kree en pe difikilte. Premyerman sa.

E dezyenmman, si zot pou antre an negosyasyon avek *SLTA* pou kapab met *speed bumps*, oubyen *raised crossing* vizavi sa bazar ek sa larantre kot pe al ganny fer la. Parski i annan sa danze. Parski sa landrwa i dan en kontour. I annan en pti pe, i en *blind spot*. I fer en pe difikilte. I annan sa danze ki letan bann peser pe koup semen avek zot bann materyo. Zot kapab ganny tape.

E trwazyenmman, nou annan sa bout later dan ou kote drwat. Eski Minister pe mazin antre an negosyasyon avek sa *landowner*, pou regarde si pa kapab ganny ankor en morso later dan son kote drwat. Mon konnen zot in ganny en later Mr Mancham dan kote gos, pou kapab konmsi annan plis fasilite pou sa bann peser. E dernyerman, konbyen *gear store* zot pe al anvizaze konstri anba sa proze? Mersi.

MR SPEAKER

Mersi, Minis ou repons silvouple.

DESIGNATED MINISTER **JEAN-FRANCOIS FERRARI**

Mersi Onorab. Onorab, ou premye kestyon i fer referans avek lefe ki sa bazar ki nou'n

fer, ki nou'n livre avek distrik Glacis lannen pase, pa pe ganny servi osi byen ki nou, nou ti a kontan. Bomaten la, ou'n donn mwan en komansman en lesplikasyon ki ou krwar akoz i pa pe ganny servi byen.

E mon ti a kontan kapab pourswiv sa diskisyon avek ou e Lasosyasyon Peser, pou nou zisteman rod en solisyon, pou fer sir ki nou ankouraz bann peser pou servi sa fasilite. E si i en proteksyon kont soley dan apre midi, mon ti a kontan diskite sa e rod meyer solisyon posib.

Me selman mon ti a kontan dir Onorab, i enportan ki bann peser Glacis i montre zot bonn volonte pou zot komans servi sa fasilite. Akoz, zisteman nou fer sa bann fasilite pou nou anpese, oubyen pou nou dekouraze ki peser i vann pwason o bor semen, lo palet. Akoz i pa izyenik.

Anfen, lontan ti napa bokou maladi dan pei. Konmela pei i evolye. Ou tande poudir i annan tel problem, tel problem. Transpor i pase lanmenm la. Lontan ti napa bokou transpor. I anvoy karbonn lo bann pwason.

Tousala se bann keksoz ki Minister Lasante in pran kontak, e nou'n komans diskite

pou vwar poudir, ki mannyer nou kapab dil avek sa problem.

Alors, mwan, bann peser i konnen poudir mon pa en dimoun ki servi gro marto. Me, mon en dimoun ki servi ledikasyon e mon rod en fason pou mwan *convince* bann dimoun pou servi sa fasilite.

E la, vi ki nou pe fer ankore en pe devlopman dan Glacis, mon ti a vremen apresye ou led Onorab. Ou led, ou lasistans pou *convince* bann peser pou nou, fer sa ki annan pou nou fer. Pou nou protez zot avek soley. E apre zot *move* lo sa bazar.

Akoz, enn fwa ki travay pou'n ganny fer lo *gear store*, lot kote semen, mon pa krwar pou dir nou kapab aksepte ki i ankore annan pwason ki vann lo palet dan bor semen.

Donk, annou bouze, annou vin en pe pli modern. Annou fer kalite sa pwason ki nou pe fer pli bon, e son valer plis. E lekel ki pou benefisye? Konsonmater pou benefisye avek en pli bon kalite. E sa peser li menm li i kapab benefisye avek en prodwi de meyer kalite. Donk sa i mon premye repons pou ou premye kestyon siplemanter.

Dezyenm kestyon, i konsern *raised crossing*. E

fason pou nou fer sir ki dan sa devlopman ki nou fer, nou pa koz bann problem trafik, e i kapab annan aksidan dan sa kontour. E vre sa kontour i en kontour kot motoris par ler i al en pe vit. Alors, mon mazine ki nou ava pran mon 2 teknisyen ki avek mon la. I ava pran sa nide ki ou pe propoze. Nou ava met devan avek *Land Transport*, ki dayer nou pe angaz bokou avek zot.

E si nou'n tard en pti pe osi, se aköz nou'n anmenn zot *onboard* pou nou fer sir ki, sa ki nou fer dan sa kontour, sa akse la, i enn ki *safe*, ki sen e sof parey nou dir, pou bann itilizater, ki pyeton, ki pou bann dimoun ki dan loto. Donk sa i pou dezyenm kestyon.

Onorab mon apresye ki ou pe, dan ou trwazyenm kestyon ki ou lager pou ou bann zabitan dan Glacis. Koman nou fini fer en pti travay avek ou, ou vwar en lot travay ankor pou ou vin fer. Mwan, mon ti a kontan dir ou, pez en pti pe ou fren, aköz i annan plizyer lezot landrwa ki ... plizyer lezot distrik ki zot ti a kontan vwar en fasilite pe ganny fer. E nou bann fon ki nou annan i en pe limite, e nou bezwen fer fason ed en pe tou dimoun, tou distrik.

Aküz Sesel parey nou dir, i pour tou son distrik, i pour tou

son zanfän. E nou bezwen fer sir ki dan nou fason, ler nou partaz bann proze, nou sey fer li pou tou bann distrik. I pa'n ariv... I ankor annan bann difikilte pou le moman. I annan lezot landrwa ki ankor pe espere. E ler nou ava kapab fer en pe progre lezot landrwa, pa bezwen trakase Onorab. Nou ava komans apros sa propriyeter later a kote, pou gete si i napa en lot litilite, nou ava *move in* lo la pou nou gete ki mannyer nou kapab donn ou sa servis. Mersi Onorab.

MR SPEAKER

Mersi. Mon napa siplemanter lezot Manm. Alor nou a kapab bouz lo prosen kestyon. Onorab Wavel Woodcock.

HON WAVEL WOODCOCK

Mersi Mr Speaker. Bonzour Minis, ou delegasyon, tou Manm e tou dimoun a lekout. Mon kestyon i *comme* swivan. Eski Minis i kapab dir Lasanble kan ki tou bann proze pour devlopman lapas artisanal ki enkli kouvèrtir lo nouvo *ice plant*, *gear stores*, renovasyon e lagrandisman lasose e *desilting channel* Grand Anse, Praslin pou konplete? Mersi.

MR SPEAKER

Mersi Onorab. Minis, ou repons?

DESIGNATED MINISTER
JEAN-FRANCOIS FERRARI

Mersi Mr Speaker. E mersi Onorab Woodcock. Onorab Woodcock, mon vwar poudir ou'n pran en leson dan liv Onorab Esparon. Ou osi ou lalis i agrandi tou le...Sak fwa nou zwenn, i annan enn de bout ki ganny azoute lo ou lalis. Me selman sa mon mazine poudir i en bon pratik, e nou tou nou bezwen rod sa ki pli meyer pou nou distrik.

Onorab, pou mon kouver bann pwen ki ou'n leve. Mon ti a kontan dir ki kouvertir sa *ice plant* ki deza an operasyon, ti ganny met lo *tender* dernyerman. Me vi ki bann rezilta *tender* pa'n satisfere bann kriter nesese dan en fason konpetitiv;- Par egzamp, kantite aplikan ki pa ti ase e bann kotasyon ki ti desot estimasyon entern, alor *SFA* in bezwen relans sa prosedir.

Ou konnen nou pe fer en kantite proze, e nou bezwen fer sir ki nou *manage* nou larzan, nou Bidze, tre byen. E nou bezwen fer sir ki piblik i ganny pli bon valer pou bann larzan ki nou pe depanse. Alors, enn bann pwen ki mon ti a kontan fer konsernan bann Onorab ki

Praslin ek La Digue, se pou demann zot pou ankouraz bann kontrakter Praslin ek La Digue, pou vini, vin devan.

Akoz nou pa vwar zot ase ki pe vin devan pou zot fer zot bann *tender*. E nou konnen ki par ler i annan en pti pe grensman, aköz *tender* i ganny donnen avek bann dimoun sorti Mahe. Be i annan bann dimoun Praslin ki kapab fer sa louvraz. Alors, mon ankouraz zot pou zot vin devan.

Mon annan avek mwan sa 2 teknisyen ki la. Mr Monthy avek Mr Richard, ki ansarz nou bann proze, nou bann propriyete. Sa bann dimoun ki pare pou donn zot en kantite sipor, en kantite leksplikasyon lo bann *tender*, e lo bann detay bann *tender*. Pou zot kapab ranpli zot *tender* byen mannyer i devret fer. E, aköz si i ganny fer, si i annan plis dimoun ki pe vin devan, nou kapab ganny en pli bon pri, e nou kapab ganny en pli bon kalite prodwi. Alors sa i en lankourazman ki mon lanse pou bann kontrakter Praslin.

Lo kote konstriksyon *gear store*, Mr Speaker. En pe retar in vini, apre ki enzenyer in propoz serten louvraz ranforsisman lo fondasyon batiman, ki ti bezwen ganny modifye e ki ti bezwen ganny

fer. Parey ou konnen, Onorab, sa konstriksyon pe ganny fer dan en landrwa ki pros avek delo sale. E tou mezir prekosyon pe ganny pran, pou fer sir ki omwen, omwen lo kote enzenyer, tou mezir i ganny pran pou asire ki kalite travay i bon. E ki sa fasilite ki nou pe ofer, i enn ki dirab e ki anmenn valer pou nou larzan.

Gear store i en striktir ase lour e nou bezwen fer sir ki nou ganny son bann striktir enzenyer byen. Alors, sa bann modifikasyon ti bezwen ganny anvoye kot *Planning* dernyerman pou zot laprouvasyon.

E avek konstriksyon ki'n re demare resaman, mon krwar Onorab, ou okouran ki nou'n relanse avek en lafors enkrwayab. Sa proze *gear store* ki osi enkli en lofis, i sipoze pli tar konplete. Pli tar an Out, Septanm, Oktob - dizon plito, annou met li Septanm sa lannen.

So, fotespere nou pa ganny okenn lezot difikilte. Si tou keksoz i al byen, mon mazine an Septanm sa lannen nou pou kapab rann sa louvraz.

Lezot proze ki pe ganny diskite, tel ki enkli renovasyon lagrandisman lasose. E *desilting* sa *channel* ki peser i servi, pou ganny konsidere

Onorab, dan en lot faz. Mon krwar ki Praslin in ase byen pase. Akoz, Praslin i en zil kot i annan bokou peser. Lapes i en profesyon ki dan disan, ki dan fanmir tou bann Pralinwa. E in annan bokou proze dan lepase ki'n trenn, trennen, ki'n trenn, trennen, ki'n tarde pou fer. Pou fer, pa pou fer, e pa'n ganny fer. E pandan plizyer lannen nou pa'n kapab annan sa bann proze. Me la, nou'n re lanse.

E parey zot vwar e mon kontan ki Baie Ste Anne nou pe al byento lans. Nou pe al byento inogir enn bann pli zoli proze ki nou'n fer. E alors, servi li byen. Servi sa bann fasilite byen. I kout en kantite larzan, e nou ava fer sir ki zot ganny rekonpanse a lavenir.

Lasose e *desilting* bann *channel*, Onorab, i en proze ki mon'n diskite. Mon menm mwan ler mon'n al Praslin. I pou pran en pti pe larzan, me selman annou tenir, annou tenir, annou fer sir. La nou pe ganny en bon pe fasilite. Mon krwar bann peser i ase satisfè dapre mannyer mon bann nouvel i ariv Mahe.

SFA e Minister Lapes pe demande ki, avek ou Onorab e tou bann distrik ki pe esper sa bann proze pou, parey mon'n dir pli boner, annan en pe pasyans. Si nou fer premye faz

sa lannen, nou bezwen espere. E nou pou esey satisfè en pe tou dimoun parey nou dir. Sa i lentansyon Gouvernman, e krwar mwan ki nou pe servi sa larzan dan en fason tre efikas. Mersi.

MR SPEAKER

Siplemanter, Onorab Woodcock.

HON WAVEL WOODCOCK

Mersi Minis pou ou larepons. Wi, i annan. Dan selman 2an, i annan en kantite proze ki'n ganny antreprann lo kote Grand Anse avek Baie Ste Anne. Minis, zis en pti siplemanter. Sa proze lasose, *is it SFA* ki pou antreprann sa proze ouswa Lotorite por? Eski i annan diskisyon *or the second phase*, se *SFA* ki pou *bear the full cost of* proze lasose? Mersi.

MR SPEAKER

Mersi, Onorab. Minis, repons?

**DESIGNATED MINISTER
JEAN-FRANCOIS FERRARI**

Mersi Mr Speaker. Mr Speaker, e Onorab, enn bann nouvo metod travay ki nou'n adopte kot *SFA*, kot Minister Lapes, se ki nou sey travay an kolaborasyon avek bann lezot lazans. Ki nou pa fer keksoz sakenn pou li. E enn bann bon

legzanp - e mon ti pe espere avek bokou enpasyans pou mon reponn sa kestyon lo La Digue.

Me vi ki bann Manm in maron, mon ti a kontan zis dir ki La Digue i en bon legzanp kot nou travay avek por. E menm travay avek Minister Lagrikiltir, pou nou ler nou fer fasilite pou peser, nou gete ki mannyer nou kapab fer fasilite pour bazardye, pou lagrikiltir.

La Digue nou pe travay tre pros ler por pe devlop. Por komersyal e Por Plaisance, Por Touris. An menm tan, nou pe zwenn avek zot pou nou fer en devlopman pou por, pou bann peser kapab antre pli pre avek ater e mouy zot bato en pe pli pre.

Donk, mon mazine poudir nou pou annan en konversasyon avek *Seychelles Port Authority*, lo ki mannyer nou pou fer sa travay Grand Anse, Praslin. E i bezwen en travay ki pou satisfè tou dimoun. Peser, koman lezot kalite transportater. Bann dimoun ki annan bann bato *charter*, bann keksoz koumsa. Nou fer en proze entegre. Nou pa travay sakenn dan son kwen.

Se pou sa rezon ki par ler nou vwar nou bann proze i en pti pe tarde, aköz nou fer en

kantite konsiltasyon. Piblik i demande ki i annan konsiltasyon pou le moman, e se pou sa ki nou fer sir ki nou pran kont tou bann bezwen e tou bann lide sorti dan tou sekter. Mersi Onorab.

MR SPEAKER

Mersi. Mersi Minis pou sa larepons. Minis, ou annan keksoz pou azoute?

DESIGNATED MINISTER
JEAN-FRANCOIS FERRARI

Wi, avek ou permisyon Mr Speaker. Onorab Esparon ti demann mon konbyen *gear store* ki nou pe fer Glacis. Glacis pou annan 12 *gear store*, e Grand Anse, Praslin pou annan 9.

Donk, mon annan bokou konfyans ki pou le moman i pou sifizan. I pou menm en pti pe an plis ki nou'n fer, me nou pe prevwar pou lavenir. Pou popilasyon peser ki kapab grandi. Alors 12 Glacis, 9 Grand Anse, Praslin i en bon sif pou nou komans avek. Mersi.

MR SPEAKER

Mersi Minis pou larepons. Bon nou a termin sa sesyon kestyon pou Minis Lapes e Lekonomi Ble, la. Mon remerisye Minis ek son tim pou zot partisipasyon. Mon swet zot bon kouraz.

Lasanble i a pran poz, e nou a rebran Lasanble 11er 05.

(BREAK)

MR SPEAKER

Madanm Raporter i ava apel Vis-Prezidan e son delegasyon silvouple, pou nou prosen seri kestyon.

Onorab Lemiel, wi?

HON SYLVANNE LEMIEL

Mersi Mr Speaker. Mr Speaker, mon ti annan en konsern *or en matter* mon ti le *raise* devan ou ozordi ...

MR SPEAKER

Un instant.

HON SYLVANNE LEMIEL

... baze lo sa ki'n arive bomaten.

MR SPEAKER

Bon, bonzour Vis-Prezidan, e avek ou pou kestyon in annan Mrs Shella Mohideen, *Chief Secretary - Public Service Bureau*. Nou pe al pran kestyon, me mon pe ekout en *matter* leve par Onorab...Oule konsern? Klarifikasyon? Ale, prosede Onorab.

HON SYLVANNE LEMIEL

Mersi Mr Speaker. Mon a profite pou mon dir bonzour *VP*, avek Mrs Mohideen ki avek nou dan

Lasanble. Permet mwan Mr Speaker, pou mon pas mon konsern koman *Chief Whip, Caucus LDS*. E osi ...

(laughter)
(APPLAUSE)

HON SYLVANNE LEMIEL

Sorry, I mean Chief Whip US. Mon pa pou zanmen vin Chief Whip, Caucus LDS. I'm so sorry. LDS i annan son Chief Whip. I'm the Chief Whip of US Caucus. E mon annan en konsern lo lafason ki deroulman keksoz pe deroule dan nou Lasanble.

I vreman domaz ki bomaten nou'n bezwen vwar *Leader* Lopozisyon in ganny fer sorti dan Lasanble, enn. Me nou'n vwar ki son pinisyon in vin 2 fwa. In double. E in ganny *named*. In ganny *named* par ou, e in ganny *named* ankor par *LGB* dan Lasanble.

E i fer ki nou santi - mwan de lapar mon *Caucus* - mon santi ki lafason ki nou *Caucus* pe ganny trete dan Lasanble. E koman sa minorite dan Lasanble, i pa byen Mr Speaker. Mon santi ki nou *Caucus*, nou bann Manm dan *Caucus*, nou pa pe ganny tou sa bann drwa ki *Standing Orders* li menm i donn nou.

Mon konpran ou bann *ruling* parfwa ki ou donner. Wi,

ou le met serten kontrol disiplin dan Lasanble. Me selman mon krwar Mr Speaker, keksoz i merit ganny zize pli *fair*, lo tou lede kote.

(APPLAUSE)

HON SYLVANNE LEMIEL

Bomaten in annan en kantite *disturbing* dan Lasanble letan Minis in vin reponn son kestyon. Lo kote *LDS* in annan en kantite. Lo nou kote in annan, nou'n sey demann kestyon, lo lot kote pe opoze. In toultan koumsa. Me selman, toultan ou tann plis lo nou kote, ki lo kote *LDS* !

Mon ti ava enplor ou ki keksoz i ganny fer *fairly* lo tou lede kote, en pe pli *fair*. E ki nou ava kapab vwar, par egzanp lo kote *US*, Manm i annan son kestyon, i lev son lanmen pou *matter of privilege*. Mazorite letan ou pa donner, e sa i kree bann diskisyon, i kree bann *havocs* ki deroule dan Lasanble.

E i fer ki ou prezan ou pou bezwen servi *Standing Orders* pou ou pran bann desizyon. Ki petet ennlér mon, mon vwar i serten desizyon ki *too harsh*. Ler mon gete i *too harsh* lo zis kote *US*, selman.

Selman mon ti a kontan ki keksoz i ganny revwar par ou

menm ou, Mr Speaker. Keksoz i ganny revize, i ganny zize *more fairly*. Mersi.

(APPLAUSE)

MR SPEAKER

Onorab mon'n ekout ou pwen. Mon pou envit ou, si oule, met ou bann pwen an detay, ann ekir. Koumsa mon kapab etidye egzakteman kisisa ki'n al mal. Pou le moman, mon pe reste lo mon pozisyon, e mon krwar poudir desizyon ki mon'n pran bomaten i zistifye. Si ou met ou bann pwen, i a permet mwan donn ou plis an detay mon bann rezon akoz mon fer sa bann desizyon. Mersi pou ou konsern.

Nou pe pran kestyon pour Vis-Prezidan. Onorab Georges, ou annan en pwen?

HON BERNARD GEORGES

Yes, Mr Speaker.

MR SPEAKER

An relasyon avek sa ki'n pase?

HON BERNARD GEORGES

Wi, en pti pwen klarifikasyon lo sa ki Onorab Lemiel in dir. Mon pa oule antre dan detay sa ki in dir. Me, i pa korek ler Onorab Lemiel i dir ki Onorab *Leader* Lopoziyon in ganny *named 2*

fwa, en fwa par ou, en fwa par mwan.

Mon, mon napa okenn drwa *name* personn dan Lasanble. Zis Speaker ki annan drwa *name*. Mwan tou sa ki mon'n fer se ...

(Interruption)

MR SPEAKER

Silvouple, Onorab.

HON BERNARD GEORGES

In dir in ganny *named 2* fwa. En fwa par Speaker, en fwa par Onorab Georges. Mon anvi zis met sa pwen devan. Mon pa oule antre dan okenn polemik. Sel keksoz ki mwan mon'n fer se, parey *Standing Orders* i dir, en fwa ki ou'n *name*, mwan mon'n *move* Mosyon *following the naming*. Mersi.

MR SPEAKER

Mersi. Mon lenterpretasyon *Standing Orders* i anliny avek sa ki Onorab Georges in eksplike. Mersi.

Lo kestyon. Nou'n ariv lo kestyon 25, e sa i dan non Onorab Francois Adelaide. Onorab, ou kestyon silvouple.

HON FRANCOIS ADELAIDE

Mersi Mr Speaker. Bonzour Mr Speaker, bonzour Minis, bonzour Mrs Mohideen, tou

koleg Onorab. Mon kestasyon i al koumsa pour Minis, eski Minis responsab pour Servis Piblik i kapab raport avek Lasanble Nasyonal lo bann mekanizm ki sa departman in met an plas, pour asir en servis o nivo dan bann servis Gouvernman e bann lakonpanyen paraetatik? *Thank you.*

MR SPEAKER

Mersi Onorab. Vis-Prezidan, ou repons.

VICE-PRESIDENT AHMED AFIF

Mersi bokou Mr Speaker. Bonzour Mr Speaker, bonzour *Leader* Biznes Gouvernman, tou bann Manm Lasanble Nasyonal e tou dimoun a lekout.

Mr Speaker, an Out 2021, *Conseil des Ministres* ti decide ki *Results-Based Management* pou ganny lanse atraver Servis Piblik. *Results Based Management*, ki nou apel li *RBM*, i konpri 4 konponan. Plan stratezik, Bidze baze lo program, sirveyans, evalyasyon e *performance contract* ki mezir performans endividyel. Tou le 4 konponan i mars ansanm dan en sistenm entegre.

Bann Minister i fer en plan pou 3 a 5an baze lo priyorite ki

Gouvernman dizour i determinen pour son manda. I bidzete konbyen i pou koute pou fer sa ki in *plan*. Idantifye lobzektif, target e endikater pou mezire, si i pe reisi, oubyen si i pe ariv lo son target.

Sak lorganizasyon i bezwen apre fer son plan anyel ki dekoul dan sak divizyon, seksyon ou *unit*, ziska i ariv kot sak travayer. Ki zot pou bezwen fer pou asire ki lorganizasyon in reisir dan sa ki i ti'n plan fer pou sa lannen? Ki rezilta zot oule vwar lafen lannen? Sa se *performance management*. Alor ki nou, nou pe fer?

En seri *training* ti ganny fer an 2022 pour prepar tou Minister, Departman, e Lazans lo sa 4 konponan *RBM*. Apre sak konponan *training*, tou lorganizasyon ti annan aksyon pou zot al fer. Par egzanp, konplet zot plan stratezik, met an plas zot komite *RBM*, fer en evalyasyon dan zot lorganizasyon lo zot sistenm, prosis e prosedir pou vwar ki mannyer zot kapab amelyor lo la. Zot ti ganny ankouraze pour sirtou gete ki mannyer zot kapab servi plis teknolozi dan zot bann prosis pou amelyor servis.

Pou fasilite sa, Biro Servis Piblik ti entrodwi en *performance contract*, kot tou

travayer i siny en kontra avek zot anplwayer kot i agree kwa ki i pou fer pou sa lannen. E a ki nivo ou standar i devret ganny delivre. Pandan lannen, i annan sipervizyon kontini pou asire ki son *staff* pe delivre a la oter, e dan dele ki zot ti'n fer zot plan. Kot i bezwen donn son *staff* plis sipor, i fer li. Ouswa i met a dispozisyon fasilite pou *training*.

Lobzektif pou entrodwi *performance contract* sete pou amelyor servis ki ganny delivre avek tou manm piblik. Sa i fer osi ki sak Sef Egzekitiv, i vin pli konsyan zot responsabilite, parske zot bezwen rann kont pour rezilta son lorganizasyon. I ede amelyor nivo efikasite e asire ki bann resours i ganny mete lo bann priyorite Gouvernman. An menm tan, kot sa kiltir performans i ganny enkilke dan Servis Piblik.

Alors, i responsabilite sak sa bann lorganizasyon pou met an plas sa bann mekanizm, pour fasilite pli bon servis.

Biro Servis Piblik i la pou met Polisi e prosedir an plas. Bann lorganizasyon zot, zot bezwen devlop zot prop standar e fer zot *RBM* marse. I enportan pou note ki *performance contract* i devret ganny servi pou fer tou travayer vin pli

prodiktiv, e non pa zis pou pey trezyenm mwan saler.

Ki bann defi ki nou pe rankontre? Onorab, atraver ou Mr Speaker. Serten defi ki pe ganny rankontre an se moman. I annan lorganizasyon ki pe vremen fer en zefor. E zot in eksplik tou zot bann *staff*. I annan ki ankor pe ganny difikilte. Zot pa pe mobiliz zot *staff* parey zot ti devret. I annan ki mank serten nivo kominikasyon.

I osi annan en mankman *skills* dan sirveyans evalyasyon lo nivo Gouvernman, kot napa konsistans pou met lobzektif, e sa ki nou apel *baseline indicators* avek bann *output target* ki fer li vin difisil pou mezir progre.

I osi annan en lackin dan anmas e servi *data*. Sa ki nou apel *data management*. PSB ek lezot lazans pe travay pou kontinyen donn *training* e lezot sipor tou lezot lorganizasyon. Dan bann paraetatik Onorab, lo sa kote zot annan zot *Board*, ki li, sa bann *Board*, zot etabli bann standar e *PMC* ki li i azir koman zot regilater. Mersi bokou Mr Speaker.

MR SPEAKER

Mersi Vis-Prezidan. Onorab, ou annan siplemanter?

HON FRANCOIS ADELAIDE

Mersi Vis-Prezidan pou ou larepons. Selman mon annan en pti siplemanter, petet ou ava kapab ed mwan. Prezidan ti vini dan Leta Lanasyon. Ti dir poudir i annan bokou fristrasyon *in regards to* Servis Piblik. E mon koman *MNA* Baie Lazare mon osi, mon bann dimoun i sorti en pe lwen pou zot vin anvil. E zot ekspekte annan bann bon, bon servis avek Gouvernman.

So, eski dan kour term zot annan bann fason pou zot evalye si petet bann Minister (mon konnen i pou pran en pe letan pou zot, ou'n dir lan) bann imedyat, pou ou kapab konpran kote ki annan problem. E petet en nide se i annan bann *reporting slip* ki nou kapab met bann landrwa ki bann dimoun i kapab fer komantr lo zot servis, pou ki nou vreman konnen kote problem i ete dan limedya. E *then* pli tar nou ava kapab travay lo plan lonterm.

Eski zot annan bann lezot teknik parey bann *report slip*, ouswa bann keksoz byen senp ki dimoun i kapab dir poudir, la i annan problem, la i napa problem? *Thank you.*

MR SPEAKER

Mersi Onorab. Vis-Prezidan.

VICE-PRESIDENT AHMED AFIF

Mr Speaker, avek ou permisyon, mon ti a kontan ki Ms Shella, ki *Chief Secretary* kot *Public Service Bureau*, i ganny sans petet donn en pe plis detay teknik lo sa size.

MR SPEAKER

Mersi. *Chief Secretary*, ou annan laparol.

CHIEF SECRETARY PUBLIC SERVICE BUREAU SHELLA MOHIDEEN

Ok. Bonzour Mr Speaker, bonzour tou Onorab e tou dimoun a lekout. Mersi Onorab pou ou kestyon. Wi, nou pe vwar poudir nivo Servis Piblik, i pa alaoter ki nou ti ava oule. E i annan serten travay ki nou pe ganny fer. Sa ki Mr VP in eksplike i pou anmenn rezilta. Me petet i pa pou anmenn rezilta toudswit. Me selman i en *tool* ki si ou pou fer resers, ou pou vwar poudir i en *tool* ki marse. I pou marse.

Bokou pei, si *again* letan ou pou regard resers ki'n servi *Result-Based Management* ek *Performance Management*, in annan en gran amelyorasyon dan Servis Piblik. E ou kestyon se, kwa ki nou kapab fer en pti pe *short term*?

Avan ler ou komans fer en *survey*, i enportan pou nou *set* bann standar. Sak lorganizasyon ki delivre Servis Piblik, nou bezwen konnen ki servis zot bezwen donnen, e a ki oter. Akoz si nou napa standar, letan ou ganny *feedback from* ou bann *customers* la. Annandler *feedback* i bann *feedback* ki lo standar. Me osi nou annan piblik ki si zot pa ganny larepons ki zot anvi tande, sa lekspektasyon ki zot, zot anvi tande, zot kapab osi fer konplent.

So, i enportan pou nou kapab, letan nou anmas lenformasyon, konnen lekel bann lenformasyon ki vreman pe dir ki servis pa alaoter. Me osi, nou bezwen konnen kan ki nou pe anmas *feedback*, se akoz en keksoz ki en dimoun in anvi gannyen, in demande. E letan larepons i non, annandler osi nou kapab fer konplent.

So, travay ki nou pe fer la, se pou nou fer sa bann standar, *set* sa bann standar. E letan sa bann standar i fini ganny fer, la apre nou a kapab antre dan sa ki nou apel *Customer Satisfaction Survey*. E *Customer Satisfaction Survey* konmela i pa parey avan. I annan teknolozi ki nou kapab servi. Par egzanp, ou kapab devlop bann *application*, bann *app* pou

dimoun ki kapab toudswit donn servis letan i fini.

Me nou osi konnen petet i pou annan serten dimoun ki pa ankor abitye ek teknolozi. La nou ava kapab met an plas bann lezot mekanizm, par egzanp bann, ou konnen ki zot kapab siny en keksoz, kit dan lorganizasyon. Me selman i enportan ki avan nou fer sa bann *Customer Satisfaction Survey*, nou *set* sa bann standar.

Mr Speaker, les mwan azoute ki, pou nou kapab *improve service delivery* dan *public service*, i annan lanfaz ki nou bezwen mete. Sa ki mon apel lo *leadership*. Lo sa bann dimoun dan Gouvernman ki nou apel bann *supervisors*. Nou annan en bon pe dimoun dan *supervisory position at the moment* ki *focus* en kantite lo zot travay teknik. Zot pa pe *monitor* travay ki pe ganny fer dan Gouvernman.

So, si nou kapab fer en pe sa *shift* kot bann *leaders* i fer zot louvraz teknik, me zot osi regarde ki servis ki pe ganny delivre, sa osi i en keksoz ki nou kapab vwar rezilta en pti pe a *short term*. Mersi.

MR SPEAKER

Mersi *Chief Secretary*. Mon a eksplik bann Manm ki mon

annan 15minit par kestyon ozordi la bomaten. E mon'n ganny notifiye ki *Bills Committee* pe *meet* midi edmi. Donk mon pou termin sa sesyon par midi edmi.

So, mon pou annan 15minit pou bann kestyon ki'n ganny soumet, e i annan osi en Kestyon *Without Notice*, e sa i pou depan lo letan ki *available* ler nou'n fini avek sa bann premye kestyon. Mon a pran kestyon siplemanter, Onorab Gervais Henrie.

HON GERVAIS HENRIE

Mersi Mr Speaker. Bonzour tou dimoun. Mon kestyon orizinal i osi tous lo bann lakonpanyen paraetatik. E mon kestyon i. Mon oule demann *panel*. Eski zot dan en pozisyon ki zot kapab dir nou poudir zot satisfè ki bann lakonpanyen paraetatik i pare, e konpran pou *embrace* sa sanzman ki nouvo ladministrasyon i le anmennen, partikilyerman atraver *Public Enterprise Bill*?

Ouswa menm entrodwi en *salary grid* pou *public sector*? Akoz pou en kantite letan, *public sector ... I mean SOEs* in preski dir konmsi, zot bann pti lanpir lo zot menm. Eski nou dan en pozisyon kot nou satisfè poudir wi, zot pare pou *embrace* pou dir, zot pa prive zot. Zot pou

pep seselwa e zot bezwen rann kont parey *public service* i pe fer? Mersi.

MR SPEAKER

Mersi Onorab. Vis-Prezidan.

VICE-PRESIDENT AHMED AFIF

Mersi bokou Mr Speaker. Mersi Onorab. Wi, larepons i wi. Eski bann paraetatik zot konsyan ki Gouvernman i anvi ki zot osi zot delivre alaoter. Larepons i kler Onorab. Wi, se Gouvernman ki apwent bann *Board*. E i annan serten *Board* ki zot apwentman i ganny fer atraver Lalwa. Dizon CAA parey *Chairman*, eksetera. Me tou sa bann Direkter, finalman zot ganny en *brief* atraver Gouvernman, ki zot bezwen delivre zot servis a lekspektasyon piblik Seselwa. Non pa zis sa ki Gouvernman ti a kontan.

E alor, i annan serten zot bann paraetatik ki zot, par natir zot loperasyon, zot bezwen delivre. Par egzanp si ou en Labank Gouvernman, e ou pe *compete* ek lezot labank, otomatikman ou bezwen delivre ou, parske ou pou ganny bate dan sa biznes si ou pa fer byen.

I annan lezot ki dan en biznes, kekfwa i napa bokou konpetiter. Me selman i osi annan en bi pou li kapab fer pli

byen posib. I annan lezot ki ganny sibvansyonnen. Me selman, enn bann target ki nou souvan met avek zot se ki kliyan Seselwa, ki kliyan zeneralman dan Sesel, i satisfè avek nivo servis ki zot pe gannyen.

Alors, sa i en kriter ki mon krwar tou bann lorganizasyon paraetatik i konnen, parske depi zot pli o nivo ki zot *Board*. Depi zot *CEO*, ziska bann *Supervisors* ek bann *Managers*, i konnen poudir Gouvernman pe met en gro lanfaz lo delivre servis alaoter. Alor wi, nou pe fer tou sa ki nou kapab pou nou kapab fer sir sa i ganny fer.

Mon krwar sa kiltir kot bann paraetatik deplizanpli pe fer sa ki zot le, i en kiltir ki'n konsern nou, e nou'n fer bokou pou nou kapab met li anba kontrol. E pli bon fason met li anba kontrol se annan bann *Board* ki ekout Gouvernman, ki pran sa lentere, e bann lobzektif Gouvernman, met sa a ker. E fer sir dan zot *management*, sa i ganny enplimante.

I osi byensir i annan lankadremman ki'n ganny mete atraver *PEMC*, kot sa bann *Board* i bezwen fer serten rapor. Zot bezwen montre bann endikater, progre ki zot pe fer. E sa regilyerman prezan, ou annan en lorganizasyon ki apel *PEMC*, dan Gouvernman, ki

prezan li a son tour i fer sir poudir sa bann endikater pe ganny swiv. Kot i annan defayans, i annan en lorganizasyon dan Gouvernman ki tir lizye lo la, ki port sa latansyon Gouvernman. Pou kot i fodre, i kriy sa *Board* ou *Management* i dir, be ou annan serten keksoz ki ou bezwen adrese.

Nou pe sey met tousala annord pou ki nou pou annan nou en *civil service*, e bann lorganizasyon paraetatik, ki si oule i delivre selon oter pep Seselwa ki zot pe ekspekte. Mersi bokou.

MR SPEAKER

Mersi *VP*. Mon a pran kestyon Onorab Aglae.

HON EGBERT AGLAE

Mersi Mr Speaker. Bonzour *VP* ek Ms. Mohideen. *VP*, ou'n nonm poudir anba *performance management system* ou'n fer *training*. Mon ti a kontan petet konnen lekel bann kad ki'n swiv sa bann *training*? Lo ki nivo lenstans kot i konsern *management* li menm? Akoz i annan bann *heads of unit* ki ozordi la nou Avril. Dapre *performance management*, ou bezwen annan sa konversasyon komansman lannen.

E zot, zot pa ankor fer sa konversasyon. Eski zot in ganny sa *training* pou zot kapab fer sa, ki mannyer lafen lannen ou kapab ale pou dir, pou ou ganny ou trezyenm mwan saler, vwala ou *benchmark* ki'n set.

E dezyenmman, mon ti a kontan petet eklersi mwan en pti gin lo kot in konsern performans li menm, *ok*. Eski zot in met an plas sirtou mon pa konnen, si tou departman pou bezwen fer koumsa, en sistenm kot ou kapab annan sa bann evalyasyon lo en baz kontinyel? Petet *mid-year*, ou kapab *review* sa departman. E avan lafen lannen i vini ou osi ou ava kapab *relate* pou ou kapab fer bann *informed decision* lafen lannen lo merit drwa sa travayer pou li ganny sa ki i sipoze pe gannyen? Mersi.

MR SPEAKER

Mersi Onorab. Vis-Prezidan?

VICE-PRESIDENT AHMED AFIF

Mersi bokou Mr Speaker. Mr Speaker, parey mon ti dir lo komansman. I annan serten lorganizasyon ki pe enplimant *performance management* pli vit ki lezot. E wi, mon aksepte ki i annan detrwa ki en pti pe pli dousman. Me selman sa ki enportan se ki, nou pe donn zot

sa latansyon kot fodre donn zot plis resours oubyen *training*, nou pe fer sa.

E, eski i annan bann revi ki pou ganny fer pli regilyerman? Wi, i pou annan bokou revi ki pou bezwen ganny fer. Sirtou ler i annan diferan staz, ki diferan lorganizasyon pe pas atraver. So, nou pou bezwen fer en revi ase regilye. Avek ou permisyon, Mr Speaker, petet mon a permet *Chief Secretary* pou donn lezot detay teknik. Mersi.

MR SPEAKER

Wi, *Chief Secretary*. Ou a donn lezot detay?

CHIEF SECRETARY PUBLIC SERVICE BUREAU SHELLA MOHIDEEN

Ok. Mersi Mr Speaker. Onorab, *Performance Management Training* in ganny fer avek tou bann *leaders* dan Gouvernman. Vedir tou bann *executive officers*. E osi nou'n fer avek tou bann *HR*. *Ok*.

Osi, ki nou'n dir avek lorganizasyon. Si zot bezwen sipor, zot kapab *call Public Service Bureau*. Nou annan dimoun ki nou'n *train*. Nou annan en group dimoun ki nou'n ganny *train*, pou nou kapab la dan lorganizasyon pou zot donn sipor.

E a sa nivo, si ou pe dir mwan i annan dimoun ki pa ankore fer sa travay, mon lofis pou bezwen ... e mon konsernen. Akoz, nou ti'n donn en *deadline* pou tou dimoun fer zot travay, e pou fer lofis konnen pou nou kapab donn sipor neser pou fer sir ki tou dimoun in siny zot *performance contract*.

Mon krwar mon oule repas lo en pwen ki mon'n pase oparavan Mr Speaker, ki nou bezwen regard en pti pe dan *leadership* ki nou annan dan Gouvernman. E *leadership*, si nou le ki Servis Piblik i ogmante, nou bezwen pran responsabilite. E letan nou pou pran aksyon, mon krwar ki dimoun pou bezwen konpran ki tou dimoun in ganny sans pou prouve, pou delivre. E nou pa pou kapab kontinyen ek sityasyon kot ou ganny serten fonksyon pou fer, e ou pa delivre bann fonksyon ki ou annan pou fer.

When it comes to performance contract. Actually, sa sistenm, i en sistenm ki ongoing li. I pa en appraisal ki ou fer zis a lafen lannen ki ti pe ganny delivre dan Servis Piblik o paravan. I en sistenm modern ki komansman lannen ou set ou bann target, e i bezwen annan en swivi kontinyel. En

dimoun i bezwen konnen kote i pe byen fer. *Feedback* i bezwen ganny donner. E i bezwen konnen osi kote i kapab fer pli byen, e sipor pou li fer pli byen i devret ganny donner.

E sa dimoun li, li osi i annan sa loportinite pou li evalye son lekor. Sa ki nou apel sa *self-evaluation*, pou li osi konnen kote i pe byen fer e kote i pe mal fer. E a lafen pa devret annan *surprise*. A lafen lannen sa dimoun i devret li, konnen ki manner in performen. Akoz in set son bann *target*, in set son bann lobzektif, e i pe kontinyen ganny *monitor* avek son *supervisor*.

So, i pa sipoze annan en ta *grievance* a lafen lannen si sa *Performance Management System* pe ganny enplimante *the way that it should be implemented. But having said that*, mon dakor ki nou pou bezwen donn en pti pe plis sipor. E sipor i la. I responsabilite lorganizasyon pou zot *come forward*, pou zot demande, pou nou kapab donn zot sa sipor. Mersi Mr Speaker.

MR SPEAKER

Mersi *Chief Secretary*. Bon mon napa letan pou lot siplemanter pour sa. Mon pas lo keston 26. Onorab Gervais Henrie.

(Off-Mic)

MR SPEAKER

Mon napa letan Onorab, nou'n pas 20 minit lo sa kestyon plis. Onorab Henrie ...

HON GERVAIS HENRIE

Mersi.

MR SPEAKER

Met ou kestyon ann ekrir. Ou a ganny ou repons!

HON GERVAIS HENRIE

Mersi Mr Speaker. Kestyon 26 i lir koumsa. "Eski Minis...Mon pe get *panel*, Mr Speaker. Mon pe get *panel*. Pa merit sanze zofisyé pou kapab reponn mon kestyon?"

MR SPEAKER

Oh! Mersi. Kestyon...Mersi pou fer mon remark sa. Lo kestyon 26, wi. Nou pou dir orevwar *Chief Secretary* Mohideen. Mersi pou ou partisipasyon, e Madanm raporter, ou ava apel delegasyon pour kestyon 26 ek *27 please*.

Bon, bonzour e byenveni Mr David Andre, Sekreter Zeneral pour *Seychelles National Institute for Culture, Heritage and the Arts* e Ms Cecille Kalebi *Principal Secretary* pour sa menm lenstiti. Nou a prosede avek

kestyon Onorab Henrie. Kestyon numero 26.

HON GERVAIS HENRIE

Mersi Mr Speaker, e mon ava dir ankor enn fwa bonzour tou dimoun, spesyalman *panel* ki'n fek zwenn nou. Kestyon numero 26 i lir koumsa, eski Minis pour Kiltir i kapab dir Lasanble ki sipor Gouvernman pe aport e ofer bann artis lo en baz endividyel, enkli bann artis lar vizyèl, ekriven e poet? Mersi.

MR SPEAKER

Mersi. *VP* ou a diriz ou *panel* si ou pou reponn. *Yes VP*.

VICE-PRESIDENT AHMED AFIF

Mersi bokou Mr Speaker. Mon a donn larepons. Manda Lenstiti Nasyonal pour Kiltir Leritaz ek Lar, i ofer sipor pou ed bann artis baze lo resours imen e resours finansyel ki a zot dispozisyon. Sa bann diferan sipor i ganny ofer par 3 lazans ki tonm anba sa Lenstiti.

Sa i Konsey Nasyonal pour Lar e Lartizana, Lazans Kreativ Sesel e trwazyenmman, Lakademi Kreol. I bon note ki sa bann lazans pe osi travay an etrwat kolaborasyon avek bann Minister, e serten partner kle ki osi ede pou kontribye anver devlopman bann artis. Mon pou

donn detay bann diferan sipor ki ganny ofer par sa bann diferan lazans.

Mr Speaker, manda Konsey Nasyonal pour Lar e Lartizana, se pou asir devlopman bann artis amater e emerzan, ziska zot ariv lo nivo profesyonnel. Konsey Nasyonal pour Lar e Lartizana i ofer sipor administratif e osi donn konsey artis pou zot devlopman.

Par egzanp, asiste zot avek fer montaz zot profil, kart biznes, lasal pou renyon, fasilite grafiks pou fer zot bann *posters, banners*, tiket bann levennman. Asiste artis amater, e emerzan ki ganny konsidere koman otreman kapab, avek bann materyo pou lar.

Teat Nasyonal i ganny met a laporte artis. Organiz bann latelye avek bann program edikasyonnel pandan vakans pou diferan form lar, pour devlop konesans e lentere parmi bann zenn, pou ki zot kapab konsider lar e lartizana koman en metye pou zot lavenir.

Tou le lannen sa Konsey i lans son lapel piblik pour son bann program *grant*, ki ofer artis ziska R25mil *maximum* pour proze artistik. Zot osi organiz bann *forum* pou anmenn bann diferan akter relye ek devlopman lar pou

partaz zot konesans e osi propoz bann solisyon. Zot donn sipor e gidans pou montaz e lorganizasyon bann legzibisyon pou bann artis emerzan, e sa fasilite *Carrefour des Arts* i ganny mete a zot dispozisyon.

Mr Speaker, Lazans Kreatif Sesel i annan *comme* manda pou kree, ofer fer loportinite, donn sipor, e kolabor ek bann artis dan tou form lar, pou anmenn zot prodwi lo en nivo enternasyonal. Lazans Kreatif Sesel i donn bann sipor swivan.

Fasilit partisipasyon bann artis dan bann lafwar artistik lo nivo lokal e enternasyonal. Sa i donn bann artis loportinite pou ganny ekspoze e vann zot travay. Sa artis i osi met serten kontribisyon.

Atraver bann levennman artistik ki sa lazans i organize, bann artis i osi ganny loportinite pou partisipe e vann zot travay. I organiz bann latelye pour anrиси konesans bann artis dan inovasyon dan lar. E bann letap dan lemonn profesyonnel artistik pou met zot o fe avek bann zouti neserer ki egziste lo rezo sosyal, pou zot kapab *market* zot lekor. E sa i ede pour kontinyelman elev zot standar. Zot standar dan lar e osi vin avek bann nouvo prodwi.

Kontinyelman ouver bann lespas artistik tel parey *Val des Près Gallery*, pou met a laporte tou artis profesyonnel e amater. Pou met zot travay an egzibit e an vant. A tre byento Galeri Nasyonal pou osi ouver, pou ofer en loportinite adisyonnèl pou bann artis profesyonnel egzibit e vann zot lar. *Network* ek bann lezot Lenstitisyon Artistik aletranze pou rod bann loportinite pou artis pers lasenn enternasyonal.

Mr Speaker, finalman manda Lakademi Kreol anba direksyon Lenstiti Nasyonal pour Kiltir Leritaz ek Lar, se pou prezerv sofgard promouvwar, e devlop lalang Kreol ek kiltir Seselwa. Lo kote artis, mizisyen, ekriven, Lakademi Kreol Sesel i asiste zot avek resers lo tradisyon kiltirel. Tel ki tradisyon oral, pour sit koman legzanp avek en mizisyen partikilye, en travay resers pe fer lo size romans.

Mr Speaker, Lakademi Kreol Sesel i osi fer latelye travay avek bann ekriven. Lasosyasyon Ekriven, *Bling, Bling*, Lar San Frontyer. La sipor teknik, literer, lengwistik i ganny donner pou bann ki enterese.

Mr Speaker, Lakademi Kreol Sesel pe organiz bann konkour literer, avek bi pou

ankouraz bann zenn pou devlop zot talan an servan zot lalang maternel.

Konkour literer pri Regina Melanie, i ofer etidyan Pti Anfans ziska P2, P3, P4, ek P5, P6, loportinite pou partisip atraver lapoezi. Pou kategori adilt, i annan konkour literer pri Antoine Abel. Sa lannen nou'n fini lans son senkyenm edisyon. Fodre note ki pou 3an sa konkour ti lo en poz aköz COVID-19. Partisipan in annan pou partisip dan 5 kategori. Sa se bann kategori swivan ;

Teat, la poezi, zistwar kourt, tradiksyon, pardon, ek romans. Tou sa bann konkour literer i annan pri larzan ki ganny donner koman rekonpans pour prodiksyon e kreasyon literer bann partisipan, e zot travay osi pibliye par lakademi.

Mr Speaker, an plizyer repriz, Lakademi Kreol Sesel in eksprim son bann konsern kot i annan pou fer avek lenplimantasyon son manda. Parmi i annan kontrent bidzeter ki paraliz parfwa sa lenstitisyon. Par egzanp, resours finansyer i limite pou premyerman rekrit zofisye pou travay avek bann ekriven ek santer. Dezyenmman pou asiste finansyerman bann

ekriven ek santer ki anmenn zot travay pou ganny asiste.

Lenstiti pou kiltir i osi ofer sipor atraver son Fon Nasyonal pour Lar e Kiltir. Sa fon i annan bi pour siport proze ki annan en lenpak nasyonal e ankouraz devlopman, transmisyon e promosyon kiltir e lar Seselwa.

Atraver sa fon, diferan artis, diferan form lar, ekriven, poet, istoryen, i ganny asiste pou diferan kalite proze ;- tel ki piblikasyon, proze resers lo kiltir, listwar Sesel e osi bann prodiksyon artistik.

Zis resaman, ti annan lansman en piblikasyon 'Koze, Koze!' par *Seychelles Art Foundation* avek sipor sa fon. E sa semenn osi pou annan en lot liv ki pou ganny lanse lo listwar Sesel par en istoryen byen renonmen.

Pour de rezon bidzeter, Fon Nasyonal pour Lar e Kiltir pa kapab donn lakantite sipor ki i ti a swete pour bann proze. Me sak lannen, sa fon i met en *target* pou siport 3 piblikasyon.

Mon profite pou lans en lapel osi avek bann *sponsors*. E osi tou Manm Lasanble isi prezan, pou kontribye dan en Fon Nasyonal pour Kiltir, ki kapab ede pou realiz plis proze ki pou anmenn plis lenpak pozitiv pou nou pei. Mersi bokou Mr Speaker.

MR SPEAKER

Mersi. Vis-Prezidan in donn en repons byen detaye. Mon sipoze sa i ann reponn plizyer kestyon. Mon a pran siplemanter Onorab Henrie.

HON GERVAIS HENRIE

Mersi Mr Speaker. Mersi pou larepons donner par Vis-Prezidan. Mon ti ava touzour kantmenm kontan konnen, eski *panel* i dan en pozisyon pou dir nou tou sa bann sipor i tradwi dan ki sif? Nou pe koze pou nou kapab regard vizavi Bidze pei, e ki poursantaz nou pe met dan lar avek kiltir? Akoz i enportan pou nou kapab nourri nou pep avek lar e kiltir. So, mon anvi konn si nou annan en nide, i *translate* an kwa, dan en sif?

Dezyenmman, nou'n fek pe koz lo *RBM* avan *panel* i vini. Mon anvi konnen si sa bann sipor ki nou pe met a dispozisyon nou kominote artis, i pe tradwir dan en keksoz tanzib, kot nou vwar aktyelman. Akoz si nou pe donn delo, nou pe kas later avek lar e kiltir, kot nou vwar sa plan pe grandi e nou pe vwar transformasyon. Eski nou kapab mezire la sa moman?

E, finalman Mr Speaker, mon anvi konnen depi kan ki ti

annan en restriktirasyon ki'n met en *maximum* R25mil ki NAC i donnen koman *grant*? Akoz mon persyade ki dan lepase i annan dimoun, artis endividyel ki'n ganny bokou plis ki R25 koman *grant*.

E R25mil menm pou mwan, mon vwar li pa sifi. Parski i annan proze lar ki oule fer, i pou kout bokou plis ki R25. So, sa i 3 kestyon siplemanter mon ti ava kontan met atraver *panel*. Mersi.

MR SPEAKER

Mersi. Vis-Prezidan. Nou a donn bann repons silvouple. En pe bref si ou kapab.

VICE-PRESIDENT AHMED AFIF

Mersi bokou Mr Speaker. Mersi Onorab. Onorab, avek permisyon Speaker, mon a kapab petet adres serten lezot parmi sa 3 kestyon. Me petet, mon, mon a vin lo sa size *grants* R25mil, e ou sizesyon se petet R25mil i pa pou ase pou bann keksoz ki ozordi nou bezwen aste.

I posib, wi, si ou pe mazin ki avek R25mil ou pou fer lenvestisman konplet pou tou sa ki sa artis pou bezwen. Be selman i osi dan serten ka i kapab ede, akoz souvandfwa ler ou al kot en labank i demann ou

en kontribisyon lo ou lapar. E sa osi i difisil.

Me avek R25mil, petet labank i kapab donn ou 50mil ou 60mil. E a longer ditan ou osi ou kapab repeye si ou bann proze pe mars byen. Alor i toultan ede.

Byensir avek, si nou ti kapab ogmant sa sonm baz, depan lo ou Bidze e resours ki nou annan, nou ti pou tre kontan pou nou fer li. Me nou toultan ganny gide par sonm ki ganny met dekote anba *Appropriation Bill* e resours pei zeneralman.

Lo sa konponan, si lezot in deza ganny plis ki 25, avek ou permisyon Mr Speaker, mon a petet pas, swa avek SG oubyen PS. Me selman, mon krwar PS petet i kapab adres premye pwen lo ki kantite ... Met en sif lo sa sonm, e eski nou vwar sa pe vremen anmenn en kontribisyon. Mersi bokou.

MR SPEAKER

Mersi. PS. Ou pou donn repons?

PERMANENT SECRETARY CECILE KALEBI

Mersi Mr Speaker. Atraver nou 2 fon, Fon Nasyonal pour Kiltir avek sa Fon *Grants* ki NAC i gannyen, i vin en total apepre en 2milyon. So, parey ou pe

vwar i pa neserman sifi. Spesyalman akoz piblikasyon i koute pou fer. E bann proze ki nou pe sey asiste avek, nou pa kapab donn *as much*, kantite ki nou ti a kapab.

E nou toultan demande ki bann dimoun ki fer laplikasyon osi i annan en konponan kot zot mete, ki zot kontribisyon osi zot pe fer ladan. E alors sa i *limit* en pe nou bann proze ki nou kapab ede par an. Mersi.

MR SPEAKER

Mersi. Mersi *PS*. Mon annan kestyon Onorab Roucou. *VP*, ou annan keksoz pou azoute?

VICE-PRESIDENT AHMED AFIF

Mersi bokou Mr Speaker. Zis lo sa kestyon *grant*, mon krwar avek ou permisyon, *SG* ti le azout en bout.

MR SPEAKER

SG, yes.

SECRETARY GENERAL DAVID ANDRE

Bonzour Mr Speaker, bonzour tou Manm Onorab. Mersi. Zis pou mon azoute ki Lenstiti Lar ek Kiltir, Leritaz ek Lar, i ganny en Bidze ek Gouvernman pou fer son bann aktivite. Be selman i osi en keksoz ki nou pe mazine pou fer, e ki nou'n

komans planifye pou fer. Se ki, ki mannyer nou kapab *raise* larzan pou siport sa ki Gouvernman in donn nou.

E parey toultan mon'n dir, kiltir i biznes tou dimoun. So, nou anvi ki tou dimoun dan sosyete. Sirtou bann biznes. Bann dimoun ki annan biznes. E bann dimoun ki siport bann *art*, bann *philanthropist*, ki i zwenn nou pou nou kapab kree sa ki nou apel en *Seychelles National Cultural Fund*. E sa en aktivite ki nou pe komanse.

Au faite nou pe fer en aktivite *State House* sa Sanmdi ki vini, kot nou pe envit en bon pe bann dimoun pou en sware, pou eksplik zot sa bann zafer. Ki i en premye pa pou nou demann lakominote, biznes sirtou e dimoun an zeneral ki siport lar, pou kapab ed nou kree sa fon ki nou kapab siport bokou plis bann *projet* artistik e bann artis ki bezwen sipor. Vwala, en keksoz *tangible* ki nou pe fer la. Mersi.

MR SPEAKER

Mersi, *SG*. Wi, Onorab Roucou, mon a pran ou kestyon. Fer li bref silvouple, vitman.

HON MICHEL ROUCOU

Mersi Mr Speaker. Mr Speaker, anefe *SG* in reponn mon premye kestyon an term lo kote,

si zot ti pou apros bann biznes prive lokal pou kapab ed zot avek en fon?

E mon dezyenm kestyon i an term lo kote...I annan bann dimoun ki pe fer bann lar vizyel la deor dan kominote. Eski zot pe mazin zot osi pou al en pti pe pli pre ek kominote, pou zot kapab ganny bann artis osi pou vin devan?

E osi lo kote sa finansman ki zot donnen, mon asire poudir i annan bokou bann artis la deor ki petet ki pa ti okouran lo la. Mersi.

MR SPEAKER

Mersi. *VP*, silvouple.

VICE-PRESIDENT AHMED AFIF

Mr Speaker, mersi bokou. Mersi Onorab. Avek ou permisyon, mon a demann *PS* Kalebi pou reponn sa kestyon.

MR SPEAKER

Wi. *PS*.

PERMANENT SECRETARY CECILE KALEBI

Mersi Mr Speaker. Mersi Onorab pour sa kestyon. Wi, nou annan bann zofisye ki fer bann travay avek bann artis dan lakominote. Mon'n kontan pou vwar enn 2 semenn pase kot nou ti fer enn ki nou pa ti

konn zot. Mon krwar i fer premye fwa osi zot fer zot legzibisyon. E mon mazin sa avek sa piblikasyon e sa promosyon ki annan, bokou bann artis i ava vin devan prezan osi, pour kontakte nou lofis.

Wi, lo kote finansman nou fer bann *call* lo *NASYON*, lo *social media* osi. Me selman par kont si annan okenn bann artis ki pe ekout nou *or* bann dimoun ki enterese pou fer zot proze, zot kapab pran kontak avek nou lofis. Nou annan bann zofisye ki la pour pare pou asiste zot e pou donn zot gidans lo ki mannyer sa fon i marse, e ki kalite proze nou siporte. Mersi.

MR SPEAKER

Mersi. Bon mon preski *out of time*. Selman mon a fer en pti letan pour Onorab Georges. Ou kestyon.

HON BERNARD GEORGES

Mersi Mr Speaker. Mon pa lev lanmen souvan Mr Speaker, alor mersi. Mr Speaker, mon ti a kontan koz en parol pou bann ekriven e demann en kestyon siplemanter pou zot.

Parmi bann artis, mon krwar ekriven se zot menm zot ki fer mwens larzan, akoz liv pa vann bokou parey nou konnen. I kout bokou pou prodwi e ou

fer li par lanmour. E se pou sa kategori dimoun ki mon ti a kontan demann avek *panel 2* kestyon, avek ou permisyon.

Premyerman, eski i annan okenn *move* pou ed bann ekriven ki anvi ekrir dan en lalang *autre* ki Kreol? Akoz mon vwar ki Lenstiti Kreol, Lakademi Kreol prezan i ed bokou bann ekriven Kreol. E sa mon 100poursan siporte. Me mon ti anvi regard en pti pe bann ki anvi avan tir zot dan en lot lalang. Angle oubyen Franse? Si i annan okenn mwayen pedagozik, okenn sipor ki zot kapab servi pou zot devlop zot lekor dan sa?

E dezyenm keksoz se, eski *panel* oubyen, eski Lasosyasyon Kiltir, Leritaz eksetera ... Lenstiti Leritaz ek Kiltir. Eski zot in mazine pour kree en *maison d'édition* isi Sesel? Mon vwar Moris i annan Edisyon Losean Endyen. Bann keksoz koumsa ki permet bokou ekriven pibliy zot liv, avek sipor en *maison d'édition*.

Eski zot pe mazin fer sa isi, kekfwa atraver sa fon ki zot pe leve pou ankouraz bann ekriven annan en *outlet* pou kapab pibliy zot liv, avek sipor editoryal ki kapab vin avek? Mersi Mr Speaker.

MR SPEAKER

Mersi Onorab. VP.

VICE-PRESIDENT AHMED AFIF

Mersi bokou Mr Speaker. Avek ou permisyon, mon a demann SG pou adres tou lede kestyon.

MR SPEAKER

SG, Yes. Ou annan laparol.

SECRETARY GENERAL DAVID ANDRE

Mersi, Onorab Georges pou ou kestyon. Vreman tre enportan, tre enteresan. Wi, nou annan 3 lalang Nasyonal. Angle, Franse e Kreol. Lakademi Kreol i la pou siport bann piblikasyon, bann travay lalang Kreol. Me definitivman pa pou *détriment* Angle ek Franse. E sirtou Franse par egzanp ki en lalang pe en pe disparet. E mon personnelman, nou lenstiti, nou ti a kontan vwar bokou plis dimoun ekrir an Franse.

Nou annan enn bann oter, Antoine Abel, sa lepok ki'n ekrir bann keksoz an Franse. E mon ti a kontan vwar bokou bann dimoun pli zenn ki pe ekrir an Franse. E Lenstiti Nasyonal pour Lar ek Kiltir i definitivman pou siport sa bann kalite proze.

E enn bann rezon akoz, mon retourn ankor, ki nou pe lans en linisyativ pou nou annan en Fon Nasyonal pour

Kiltir, kot nou kapab siport sa bann lezot keksoz, enkli, par egzant en *maison d'édition* ki avek bann dimoun prive, dan biznes prive, i kapab siport nou. E mon ti a kontan vwar en *maison d'édition* isi Sesel ki pibliy bann travay literer par bann *auteur* Seselwa. Definitivman. Mersi.

MR SPEAKER

Mersi.

(Off-Mic)

MR SPEAKER

Onorab Loze, ou *point of order*?

HON JOHAN LOZE

Mersi Mr Speaker. Mon annan en *point of order* anba *Order 8*, lo fason ki ou pe *conduct* biznes Lasanble. Nou kote boner, letan ti *out of time*, nou'n ganny demande pou met ann ekrir. La Onorab Georges ou donn li laparol, in fer son kestyon, mon napa naryen kont sa.

Selman nou ti a kontan annan en *fair, even and equitable treatment* nou osi koman minorite dan sa Lasanble! Onorab Georges in byen fer son pwen konmkwa rar i lev son lanmen dan Lasanble. Nou pa kapab ganny pini akoz Onorab Georges i pas tou son letan devan Lakour e i pa lev

son lanmen dan Lasanble! Mersi Mr Speaker.

(APPLAUSE)

MR SPEAKER

Mersi ti'n dir mon *almost out of time*, me selman mon'n met kestyon Onorab Georges. Mon'n plizyer fwa, mon'n *extend* letan ki mon'n kapab pou permet en lot Manm demann kestyon. Mon pa krwar poudir ou vreman annan en *point of order* la.

Mon a pas lo prosen kestyon, numero 27. Onorab Gervais Henrie.

HON GERVAIS HENRIE

Mersi Mr Speaker. Mon kontan pour table mon kestyon an ekrir, koumsa mon pa vey dan lapas dan Lasanble. Kestyon numero 27 i lir koumsa, eski Minis pour Kiltir i kapab dir nou Lasanble ki sipor sak Lasosyasyon Artistik pe resevwar avek Leta e ki kontribisyon Gouvernman i oule sa bann Lasosyasyon i fer dan devlopman nou sosyete? Mersi.

MR SPEAKER

Mersi Onorab. *VP* ou repons silvouple.

VICE-PRESIDENT AHMED AFIF

Mersi bokou Mr Speaker. Mersi Onorab. Tou Lasosyasyon Artistik ki an konformite ek Lalwa Lasosyasyon, i ganny sipor atraver en *desk officer* kot Konsey Nasyonal pour Lar e Lartizana, ki asiste zot dan fason administrativ kan i neserer. Lasal pou renyon, parey mon ti eksplike, *photocopy, print* zot bann dokiman, lavertisman pou zot bann renyon, akse ek teat Nasyonal ler i neserer.

Tou Lasosyasyon Artistik ki an konformite ek Lalwa Lasosyasyon, i osi ganny en led finansyel pou zot bann proze ki zot soumet. Nou ekspekte ki bann lasosyasyon i regroup bann lezot artis ki annan lentere pour devlop zot lar, e fer bann program ek bann aktivite ki a donn plis vizibilite zot lar.

Nou lekspektasyon ki zot groupe e koz menm lavwa dan en fason pozitiv i anmenn devlopman devan avek lar. Nou osi ekspekte ki zot fer bann program o nivo nasyonal, oubyen distrik, pou propaz zot lar e pou enfluyans bann zenn dan en fason pozitiv, e ankouraz zot pou zwenn zot Lasosyasyon.

Nou ekspekte ki zot vin devan avek proze kiltirel, ki pou ed devlopman zot lar e fer en lenpak pozitiv dan zot kominote. E osi anmenn reveni pou zot lasosyasyon.

Mr Speaker, mon oule osi lans en lapel avek tou bann Lasosyasyon Artistik e Kiltirel. Mon oule dir zot ki Lenstiti pour Kiltir i la e pare pour angaz ek zot pou nou travay ansanm. Parey mon'n toultan dir ki kiltir i biznes tou dimoun. Alors nou regard li lafason ki nou pe fer, e ki nou kapab fer pou asire ki nou kiltir e ki nou bann artis i kontinyelman bouz devan.

An konklizyon, avek nou resours, Mr Speaker, ki nou annan. Lenstiti pour Kiltir i fer son *maximum* pou ed bann artis. Alor nou ti a swete ki biznes prive i zwenn nou dan sa zefor e osi ki Gouvernman i investi plis resours dan devlopman kiltirel bann artis, pou ki a lavenir nou ava rekolte en pli gran retonm ekonomik e sosyal. E nou kont lo tou Manm Onorab isi prezan pou donn nou zot sipor letan nou prezant Bidze. Mersi bokou.

MR SPEAKER

Mersi VP. Onorab Henrie, ou siplemanter lo sa kestasyon.

HON GERVAIS HENRIE

Mersi Mr Speaker. Mon bann kestyon siplemanter i *comme swivan* ; Premyerman VP in dir ki bann lasosyasyon i osi ganny en sipor finansyel avek lenstiti. Donk, mon oule konnen konbyen sak lasosyasyon pe gannyen par an, e total? Setadir lekel sa bann Lasosyasyon ki pe gannyen baze lo kriter ki ou'n dir, fodre zot *in good standing with The Office of the Registrar General?* Sa i mon premye kestyon.

Dezyenm kestyon, eski *panel* i ava kapab konsidere pour antre dan en partenarya avek *Local Government*. Parski *Local Government* ozordi ler nou pe koze, zot annan en *Animators Scheme*, ki zot annan en larzan ki zot mete kot bann dimoun ki kapab fer en travay en pe volontarya dan kominote.

Selman zot ganny en *some sort of allowance*. Mon krwar R2mi, R3mil par mwan.

So, si bann Lasosyasyon i serye, zot ti kapab *nominate* zot bann manm pou fer sa bann zafer. Montre marmay Mont Buxton zwe gitar. Montre marmay Au Cap fer kapatya, *whatever* ki Au Cap i santi pli enportan pou li. Sak distrik i get son zafer li menm.

E finalman, ki nou kapab fer pou ankouraz bann artis atraver zot lasosyasyon, *give*

back to the community. Akoz tro souvan. E la parey nou'n fer evidaman ozordi, demande ki Leta pe fer pou zot, demande ki Leta pe fer pou zot. Me ki zot, zot fer pour kominote? Par egzanp letan *La Fête de la Musique* le 21, *Juin*. Zwe en kou dan sak kominote pou naryen. Apre nou, nou a vin isi nou a dir donn zot ankor en pti keksoz pli tar. *It's a give and take*. Mersi.

MR SPEAKER

Mersi Onorab. VP, ou repons silvouple.

VICE-PRESIDENT AHMED AFIF

Mersi bokou Mr Speaker. Avek ou permisyon, mon a demann petet PS pou reponn premye parti. E ansanm avek Sekreter Zeneral, petet zot kapab adres sa dezyenm bout; Kolaborasyon ek Gouvernman Lokal, e partisip en pe plis avek distrik. Mersi bokou.

MR SPEAKER

PS, ou annan laparol.

PERMANENT SECRETARY CECILE KALEBI

Mersi Mr Speaker. Mersi Onorab pou ou kestyon. An se moman i annan apepre en 6 lasosyasyon ki pe ganny sipor atraver NAC. E zot kontribisyon

ki zot gannyen i a 25 a 50mil par an. E sa i baze lo proze ki zot soumet. Si zot pa soumet proze, zot pa pou ganny asiste. I baze lo proze ki zot soumet. Mersi.

MR SPEAKER

SG ti pou azout keksoz?

SECRETARY GENERAL
DAVID ANDRE

Wi, mersi bokou Mr Speaker. I enportan pou fer konnen poudir bann lasosyasyon, zot bann ... I groupman bann artist lib. Bann artis zot bann dimoun ki zot pa pe ganny anploye avek Gouvernman, oubyen avek nenport lezot, sa.

Lenstiti Kiltir i pare pou donn zot en sipor baze lo bann proze ki zot vin devan. Lenstiti Kiltir i pa en landrwa kot i donn en *welfare* sak lasosyasyon konmsi pou dir. Nou donn ou R50mil, prezan ou fer sa ki oule avek. Non. Akoz nou bezwen *accountable* pou sa ki ou fer.

En lasosyasyon i vini, i annan en proze pou son bann manm. Nou donn zot sa sipor baze lo sa proze ki zot ti'n met devan. Letan nou pe koz lo partenarya avek Gouvernman Lokal, par egzanp. Sa en keksoz ki nou'n angaze avek. Me selman sa ki enportan se ki, nou, nou donn bokou sipor,

dan lesans ki nou kapab *train* bann dimoun.

Par egzanp si nou koz lo Gouvernman Lokal, dan distrik zot anvi form en group kot zot oule montre dimoun dans kanmtole, ki en keksoz ki nou pe siporte. Be Gouvernman Lokal, i pa kapab ale pran zis nenport ki dimoun, Tom, Dick *and* Harry dan distrik pou fer dans kanmtole. I bezwen fer sir ki sa dimoun pe fer sa keksoz, i konnen sa size, e nou la kot nou antre. Akoz nou pa pou kapab annan en dimoun pou al dan tou distrik.

La kot distrik i donn bann dimoun ki zot pe propoze, *then* i kapab travay avek nou. Nou annan dimoun ki kapab fer sir ki sa bann formasyon ki zot pou donn bann zenn, oubyen bann lezot dimoun dan distrik i bann keksoz korek, ki'n vwar sa keksoz pe ganny fer byen. En dimoun i anvi donn en leson gitar dan distrik Mont Buxton, ou pa kapab pran nenport ki dimoun dan en kwen ki zis konn 2 lakle lo gitar ou dir li vin sa, ou pey li. Non.

Nou, nou kapab propoz bann dimoun ki montre sa dimoun ki mannyer i zwe *gitar properly*. Oubyen si nou annan en dimoun kote kot nou ki vini pou fer. Sa ki mon pe dir se ki, nou bezwen fer keksoz byen.

Nou pa kapab fer keksoz dan en fason *amateurish*, kot finalman napa rezilta. Zis nou pe donn larzan dimoun, en dimoun naryen fer i vini i fer keksoz, epi ki napa nivo. Nou Lenstiti Kiltir, nou la osi pou fer sir ki nou asire i annan serten nivo. I ganny fer dan en fason organize e byen, o nivo distrik. Vwala, mersi.

MR SPEAKER

Mersi, SG. Mon a pran kestyon Onorab Wavel Woodcock.

HON WAVEL WOODCOCK

Mersi, Mr Speaker. Bonzour SG ek ou lekip. VP mon kestyon i baze lo sa size *grant*. Ou konnen, i annan plizyer konplent dan lepase konmkwa ti annan bokou labi lo sa size *grant*. Menm *grant* pou bann lasosyasyon, pou bann diferan proze.

Eski ou kapab donn en pe detay, vreman ki bann kriter ki zot servi ozordi? Eski zot annan en sistenm pou swiv, pou *follow-up*, pou fer sir ki sa bann larzan ki zot pe donner pe ganny servi byen? E ki Bidze ki zot annan par lannen pour sa bann *grants*, pou proze, ouswa pou bann artis or lasosyasyon? Mersi.

MR SPEAKER

Mersi Onorab. VP, wi. Yes, VP.

VICE-PRESIDENT AHMED AFIF

Mersi Mr Speaker. Avek ou permisyon, mon a demann PS pou reponn sa 2 kestyon. Mersi.

MR SPEAKER

Thank you. PS.

PERMANENT SECRETARY CECILE KALEBI

Mersi Mr Speaker. Mersi Onorab pou ou kestyon. An tou, total ki nou annan pou *grant* ki donner kot NAC ansanm ek Lasosyasyon i tonm 1milyon. 1milyon, wi. Avek Fon Nasyonal pour Kiltir, i osi annan 1milyon. So, sa i sa 2 fon ki nou servi pour ed bann artis.

Pour bann *grants*, nou fer bann *call* o piblik. I annan son dele letan. I annan son *form* ki ou ranpli, e osi i annan en *panel* ki pas lo sa bann proze e i aprouve. E a lafen sa bann proze, zot bezwen soumet bann rapor avek osi levidans konmkwa sa bann proze i ganny fer.

E laplipar sa bann proze parey zot vwar, i ganny mete lo medya. Zot vwar, nou dir konbyen sa proze in arive, e ki mannyer sa larzan in ganny depanse. E nou fer sir bann resi i ganny anmase, i ganny

kolekte. Laplipar letan bann lasistans ki nou donnen. Parey piblikasyon. Nou pey sa *publisher*. Sa larzan pa al direkteman dan lanmen sa dimoun. *Basically*, nou pey ou *publisher*. Si ou annan ou *CD*, nou pey ou *label* or nou pey sa *studio* ki pou fer sa travay. Mersi.

MR SPEAKER

Mersi *PS*. Bon, avek sa nou'n termin kestyon pour kiltir. E mon remersye Mr Andre e Ms Kalebi pou son partisipasyon. Mon a swet zot bon depar. Nou a gard *VP* pou prosen kestyon.

(The delegation was excused from the House)

MR SPEAKER

Nou pas lo prosen kestyon nimerò 28, dan non Onorab Egbert Aglae.

HON EGBERT AGLAE

Mersi Mr Speaker. Bonn apre midi *VP*. Kestyon *comme* swivan. Depi ki Departman Lenformasyon in ganny aboli, eski Vis-Prezidan i kapab dir ek sa Lasanble lekel antite dan son Gouvernman ki responsab pour dil ek bann konsern ki relye ek medya ouswa zournalis? Mersi.

MR SPEAKER

Mersi Onorab. *VP*, ou repons.

VICE-PRESIDENT AHMED AFIF

Mersi bokou Mr Speaker. Mersi bokou Onorab. Mr Speaker, swivan restriktirasyon Gouvernman apre Eleksyon Oktob 2020, parey nou'n deza dir, nou ti aboli Departman Lenformasyon koman en antite. Akoz nou ti santi ki nou ti kapab fer bokou plis an term lefikasite. Nou ti deza annan 2 antite prensipalman ; - Komisyon Medya Sesel e Komisyon pour Akse ek Lenformasyon, ki ti deza pe desarz zot fonksyon. E sa ti fer rol en lot departman pou lenformasyon vin bokou mwen relevan.

Parey zot konnen, rol *Media Commission* se pou sofgard medya an zeneral dan Sesel, pou fer sir ki zot tou zot pe fonksyonn selon Lalwa e regilasyon ki annan Sesel. *Media Commission* i annan en kod kondwit pour gid zournalis selon norm ki nesese dan en sosyete demokratik. Evantyelman mon mazine ler lankadremann medya i ganny revize, i posib pou nou ranforsi li ankor. Zot a rapel ki nou'n dekriminaliz defarmasyon atraver sipor osi ki *Media*

Commission in donnen dan sa direksyon.

Avek *Media Commission* ozordi, li i kapab resevwar konplent par nenport ki, ki santi ki medya in afekte son drwa. Annefe i annan en sistenm kot i kapab arbitre ant bann diferan parti ki ganny afekte. Sa i ede parfwa pou zot evit bann ka legal, e plito rezourd zot problemn dan fason bokou pli senp.

Komisyon Lenformasyon - Akse ek Lenformasyon. Li i fer sir ki piblik an zeneral i ganny akse ek lenformasyon ki tonm dan serten paramet Lalwa. Alor, tou lede lenstisyon zot tonm anba parasol en Minister. E dan sa ka sa 2 antite, se Biro Vis-Prezidan ki annan sa responsabilite. Byensir, sa se landrwa kot zot kapab anmenn propozisyon lo Polisi, Lalwa ou regilasyon ki nou devret konsidere. Zot ganny drwa osi konsilte ek lezot antite Gouvernman.

Mon anvi fer kler ki napa en Departman Gouvernman ki ansarz medya. Mon oule fer rapel ki menm SBC, ki Medya Nasyonal, kot i konsern son rol editoryal. Sa i ganny gide anba Seksyon 168 nou Konstitisyon. Ki li i dir ki okenn medya Leta ki ganny finanse par Gouvernman, i bezwen kapab

zer son travay san enterferans politik, premye.

Dezyenmman i dir ki sa medya a son tour li, i bezwen osi permet prezantasyon bann pwennvi diverzan. Alor vwala kot nou debout ozordi vizavi medya ek zournalis, Mr Speaker. Mersi.

MR SPEAKER

Mersi. Onorab Aglae, ou siplemanter.

HON EGBERT AGLAE

Mersi Mr Speaker. Mersi *VP* pour ou larepons. *VP*, rol Medya Komisyon i azir parey en *watchdog*, pou fer ki bann kod kondwit ki ganny set, i ganny swiv par bann *Media Houses* enkli son bann zournalis. Konsern se ki kote ki sa bann zournalis zot menm zot, zot pou ale si zot annan bann konsern ki reel, ki zot santi pe ganny afekte dan desarzman zot travay?

Akoz, Medya Komisyon i ganny mandate e osi i ganny nominen par Leta li menm. E, so, i annan en *checks and balances* ki bezwen ganny fer avek fason ki travay ki ganny fer. Sa i enn.

E dezyenmman, *Media Commission* li menm son manda ti fini Desanm e i pa ankor ganny en nouvo *Board*.

Eski in annan ekstansyon, ouswa zot pe revwar? Akoz i annan bann endividi ki *aspire*. La parey i annan Ms Henderson ki pare pou pran en rol ladan. So, eski sa travay pe ganny fer pou ki zot kapab ganny en *new Media Commission*?

E dernyen pou mon eklersi, kot i konsern sa komisyon ki donn lenformasyon. Nou ti pas Lalwa isi dan sa Lasanble pour sa. E sa in vize plis ver piblik kapab ganny akse ek lenformasyon, i pa en zouti ki medya li menm li pe servi.

So, eski petet *VP* zot pe mazin osi *extend* sa sipor avek bann *Media Houses* pou zot osi servi en pe sa komisyon, pou zot kapab fer zot travay?

E dernyen *VP* se, bann *Media Houses* osi ti a kontan, petet ou koman Minis ki pe vwar kominikasyon ek lenformasyon, rann zot en *visit*, asiz ek zot, ekout zot en kou. Mersi.

MR SPEAKER

Mersi. Onorab in annan 4 kestyon. Mon rapel bann Manm poudir zot siplemanter i devret ase limite. *VP*, ou kapab adres bann kestyon silvouple.

VICE-PRESIDENT AHMED
AFIF

Mersi bokou, Mr Speaker. Kote bann zournalis i ale? Mon mazine, laplipar zournalis i travay avek en lorganizasyon. E dan tou lorganizasyon, si i annan serten difikilte ki zot annan, zot annan en lankadremman pou zot rezourd.

Si zot annan problem ki annan pou fer avek zot keksoz editoryal, zot annan zot tim editoryal.

Apard zot tim editoryal, mon mazine i bezwen annan zot *supervisor*. Apart zot *supervisor*, i annan en *CEO*. Par lao en *CEO* i annan en *Board*. E mon mazine apre sa i annan *Public Service Appeal Board*. Mon mazine i kapab annan. I posib, i posib zot kapab al Ankour. Tousala i egziste.

Mon krwar i annan bokou rekour pour tou zournalis. Nenport ki landrwa. Si ou *freelance*. Si ou santi poudir i annan en keksoz ki'n arive avek ou. Mon pa konnen ki'n kapab arive koman en zournalis. Be si ou *freelance* ou pe travay pou en zournal. Si ou annan en problem kontra ant sa dimoun ki ou pe travay avek. Tou rekour legal i touzour la. Ou pa bezwen en departman spesifik pou al dil ek sa.

So, mon mazine mon'n kapab reponn sa premye kestyon. Lo kote *Media*

Commission, wi, nou rekonnèt poudir zot manda in ekspire, me nou'n *extend* manda sa *Board* ziska ler nou kapab finaliz son lapwentman. Alor, zot pe travay. Sa mon kapab dir ou.

Kot i konsern akse ek lenformasyon, eski bann zournalis zot osi zot kapab ... ? Parey nenport ki Seselwa, si zot pe rod lenformasyon, zot annan toutafe...Ki zot *freelance*, ki zot travay. Zot annan toutafe drwa pou al demann serten lenformasyon. Sa i form parti sa lankadreman ki nou'n mete, ki donn latransparans ki fer Gouvernman rann kont. E mon kapab konfirman poudir tou dimoun i annan akse avek sa Lalwa, e zot kapab benefisye avek tou sa ki ganny mete ladan.

An term *visit*, wi, mon touzour pare e disponib pou mwan zwenn avek tou bann *Media Houses*. Mon fer li baze lo mon *availability* byensir. E mon pare pou mon koz ek tou dimoun ki konsernen. Mon zwenn zournalis detanzaot. Mon zwenn zot. Si mon bezwen zwenn bann *Media Houses* zot menm direkteman, mon pare pou fer li, parski nou toultan kontan dyalogue. Nou toultan kontan konnen kote problem i ete, e ki mannyer nou kapab

rezourd tou sa bann keksoz ki egziste ozordi. Mersi.

MR SPEAKER

Mersi, *VP*. Bon nou a termin la avek sa kestyon. Lo *Order Paper* mon annan en *Question Without Notice*. Mon fer zot rapel ki *Question Without Notice* i dapre diskresyon Speaker. E i devret lo en *matter of public importance*, ki mon sipoze nou kapab vwar en serten lenportans ladan. E i osi depan lo letan.

Me koman mon annan en pe letan la, mon a pran kestyon Onorab Vidot. E Minis si i dan en pozisyon pou li reponn, i a donn en repons. Onorab Vidot.

HON AUDREY VIDOT

Mersi Mr Speaker pour aksepte mon Kestyon *Without Notice*. Kestyon pour Vis-Prezidan, ki zistans Gouvernman in arive avek mezir pour retir politik dan landrwa travay? Mersi.

MR SPEAKER

Mersi, Onorab. *VP*, si ou annan en repons.

VICE-PRESIDENT AHMED AFIF

Mersi bokou Mr Speaker. Mersi Onorab. Mr Speaker, pour komanse les mon a dir ki sa zafer met politik dan travay ti

en pratik ki ansyen Gouvernman. E mon kapab dir zot kategorikman, ki sa Gouvernman in met en fren avek sa prensip anmenn politik dan travay.

(APPLAUSE)

VICE-PRESIDENT AHMED AFIF

Me, nou bezwen aksepte ler ou vin zwenn en sistenm, ki'n pran li koman son pratik pou servi sistenm Gouvernman pou fer politik, sa travay pou tir politik dan travay in vin en latas ase enorm.

Mon krwar pep Seselwa in vwar pou zot menm ki sa Gouvernman pa'n siport okenn pratik anmenn politik dan travay. Depi ki nou nou'n vin dan Gouvernman koman *LDS*, dirize par Prezidan Ramkalawan, napa person ki kapab dir in ganny viktimize lo baz politik.

Sepandan, wi in annan bann ka kot sa ki ti pe met politik dan travay zisteman, nou'n dir zot sa i pa akseptab e zot in ale. I annan lezot ka kot nou ti retir bann pos *Special Advisor*, ki nou konnen sete pirman bann pos politik dan diferan Minister, wi. Dan lezot ka, nou'n vwar serten dimoun o plase, ki ti form parti striktir

Parti Lepep, *US*, ki'n demisyonnen, san nou met okenn presyon lo zot.

Tou sa bann ka Mr Speaker, pa apel viktimizasyon. Sa i form parti lo en kote, bann reform enportan ki nou'n anmennen. E lo lot kote i form parti swa serten dimoun ki krwar zot nepli kapab kontribye dan Gouvernman. Nou respe zot swa.

Lo nou kote Mr Speaker, nou kontinyen sirvey nou Servis Piblik pou fer sir ki napa okenn aksyon ki ganny pran avek en bi pirman politik partizan. Mon kapab asir ou Onorab, ki kan nou pran desizyon dan Gouvernman, i pa zanmen pou favoriz okenn group dimoun ki'n siport *LDS*, oubyen Gouvernman.

Pareyman, zanmen nou pou pran en desizyon pou defavoriz okenn dimoun, akoz nou konnen ou krwar, oubyen nou krwar ou pa ti siport *LDS*. Sa i kont nou prensip. I kont tou sa ki sa kote politik in lager kont pandan 43an.

Kot nou ete? Ou kestyon pou retir politik dan travay. Nou pe kontinyen nou Polisi parey mon'n eksplike. Si nou vwar move zesyon, nou pran aksyon. Mon pa konnen konbyen dimoun in ganny plante pou travay kont nou. Petet Onorab i

konn sa bokou pli byen, parske dan enn bann *meeting* politik zot ti dir, pran politik anmenn li met dan bis, anmenn dan biro. anmenn dan travay partou kot zot ete. Alor, mon pa konnen konbyen ki pe fer sa. Me sa ki nou asir zot, se nou pa pou zwe politik dan travay. Si ou siport *US*, me ou fer ou travay drwat, avek respe, e kourtwazi tout an respektan tou nou sitwayen, ou kapab reste asire, Onorab, ki personn pa pou fer ou ditor akoz ou en travayer ki siport *US*.

Mon bezwen profite pou a sa pwen donn en *warning*. Parey Prezidan Larepublik ti fer kler dan son diskour Leta Lanasyon, ki nou konnen, malerezman ki annan dimoun ki pe fer kanpanyan dan landrwa travay. Zot prefere pa fer desizyon, kan en desizyon i senp. Dir ou vin en lot zour, kan i ti kapab fer fini deswit. Pas remark parey, “Be ou Prezidan ki pe *run border*. Nou, nou pe swiv son lord nou. Pa ou ti *tick* anler ou? Be nou ankor la. Be prezan, pa konplent”. Tousala, i arive dan landrwa travay.

Kantmenm par ler zot vwar nou pe, nou pe *cool easy*. Nou fer li parske nou konnen Sesel i pour tou son zanfan. Me, si sa zanfan li menm i krwar Sesel i pa pour tou son zanfan,

i bezwen ganny korize. Pa krwar nou pa konnen kan sa bann keksoz i arive. Pa krwar nou pa obzerve ki ariv ennler dan lapolis, oubyen bann servis kot piblik i la toulezour. E pa krwar ki sa latitid pou ganny tolere kot nou, nou anvi ale.

An gro, Onorab, sa Gouvernman pe travay pou anmenn sa pei devan. Kot desizyon i ganny fer selon nou manda. Kot lanfaz i reste lo devlopman Sesel, e pa en parti politik. E kot Seselwa ki pou fini venker. Ki ou siport *LDS*, ou nenport ki lezot parti politik. Mersi bokou Mr Speaker.

(APPLAUSE)

MR SPEAKER

Mersi *VP*. Ou siplemanter Onorab Vidot.

HON AUDREY VIDOT

Mersi Mr Speaker. Mersi Vis-Prezidan pour ou repons. Mr Speaker, mon oule dir avek Vis-Prezidan, byensir ou ladministrasyon in ganny eleksyon pou fer pli byen. E menm si ou'n dir zot napa viktimizasyon, wi, i annan dimoun ki pe eksprim konsern ki i ankor annan viktimizasyon dan Servis Piblik. Gouvernman i ankor pe pratik en pwa demezir. E kekyon,

Akoz, eklersi nou, ki ler en o zofisye Servis Pibli - mon donn en legzanp, parey en *Chief Nursing Officer*, ki atraver li son louvraz i annan travayer ki swa, i siport ou Gouvernman, oubyen i kont ou Gouvernman. Ki swa pasyan ki siport e kont ou Gouvernman, i tonm anba son lanmen. E li piblikman i kapab fer serten komantr e montre son konfirmasyon son lwayote anver son parti, ki li i pa ganny dir naryen. *It's business as usual.*

Me ler en travayer ki li, ki swa i en siporter, oubyen i en aktivis *US* ki pe fer son louvraz dan ou ladministrasyon, swa i ganny kriy a kote pou ganny *warning*, swa i ganny mete lo komite pou ganny zize, swa i ganny forse pou li demisyonnen, oubyen son kontra pa ganny renouvle.

E, Vis-Prezidan, ou'n dir ki nou Gouvernman *US*, nou ti dir fer politik partou. Mon le zis met a ou latansyon ki ou Prezidan dan enn ou bann konferans avek son bann siporter, enkli zot bann aktivis, ti dir avek zot, al dan travay, al dan zot landrwa travay, konfirman poudir zot en aktivis *LDS*. Mr Speaker.

(Interruption)

MR SPEAKER

Onorab.

HON AUDREY VIDOT

Mon pa ankor fini demann mon kestyon.

MR SPEAKER

Order! Order!

HON AUDREY VIDOT

Si vre i annan senserite dan parol ki Prezidan Larepublik in dir dan son *SONA*, an referans pour aret annan viktimizasyon, an referans ki napa lenterferans politik dan travay, i bezwen annan zis fer e arete annan en pwa demezir dan Gouvernman. E koman en Prezidan li ki dirize ...

MR SPEAKER

Onorab, arete silvouple!
Onorab!

(Interruption)

MR SPEAKER

Onorab! Onorab, in pran loportinite en kestyon siplemanter, pou fer en trale alegasyon ki mwan mon pa vwar ki in okenn fason zistifye. Mwan, mon krwar i en move pratik pour *Question Time* al dan alegasyon lekel zofisye ki'n fer kwa. Ki repons zot in gannyen, ki soz i la. E mon pa

pe vwar poudir Onorab ti vremen anvi en repons senser lo sa.

So, mon pe *disallow* son kestyon. Mon pe *disallow* son kestyon. *VP* i la. *VP* mon pou pas lo prosen kestyon, e mon pou pran ankor 1 kestyon siplemanter, oubyen 2 ziska midi edmi. E apre mon pe termin kestyon siplemanter.

(Interruption)

MR SPEAKER

Mon pe termin kestyon siplemanter! Mon pou donn Onorab Bastienne, si ou annan en siplemanter ki lo sa size, poz li silvouple.

HON DESHEILA BASTIENNE

Mersi Mr Speaker. Bonzour *VP*, e bonzour ankor enn fwa tou dimoun. *VP*, lo sa kestyon Onorab Vidot. Eski ou annan ...?

MR SPEAKER

Sorry. Sorry, sorry! Kestyon Onorab Vidot i pa'n ganny *allow*. Ou pa kapab demann en kestyon lo kestyon Onorab Vidot. Si ou annan en kestyon, ou pe demann lo kestyon orizinal? *Yes*, silvouple.

HON DESHEILA BASTIENNE

Orizinal. *Ok*.

MR SPEAKER

Mersi.

HON DESHEILA BASTIENNE

Minis, eski ou annan en repons pou mwan personnelman ki kapab soulaz mwan lo sa kestyon orizinal, lo akoz an Out 1984 mon ti ganny pouse *Teacher Training College*, koman en etidyan ki ti byen anbisyé? Mon ti pe *look forward* pou mon vin en *teacher* sertifye.

(Interruption)

HON DESHEILA BASTIENNE

E ankor an 1987...

(Interruption)

MR SPEAKER

Order! Order! Mersi! Onorab, Onorab, lo sa kestyon, i pa rezonnab ki ou demann en kestyon ki ti arive lo en ka an 1984. I zis pa rezonnab. Si ou napa lot kestyon, silvouple *release* mikro.

HON DESHEILA BASTIENNE

Wi, Mr Speaker. Vi ki mwan koman en ... Mon ti ganny pouse 2 fwa akoz politik dan travay. Sanmenm ki mon ti anvi demann Minis ...

MR SPEAKER

Tre byen.

HON DESHEILA BASTIENNE

... si pou li i ti krwar - Si pou zot sa letan sa ti ok, e ki Minis i krwar poudir sa ti byen?

MR SPEAKER

Onorab.

HON DESHEILA BASTIENNE

Mersi.

MR SPEAKER

Mersi. Byen. Mon pa vwar. Mon osi mon pa vwar ki kestyon Onorab Bastienne in relevan avek sa ki Gouvernman pe fer la konmela. Mon santi poudir lapant ki sa kestyon, bann kestyon siplemanter in pran, pe al dan direksyon ki napa naryen pou fer avek kestyon orizinal. E, mon sipoze poudir Manm napa kestyon lo kestyon orizinal.

(Interruption)

MR SPEAKER

Me, mon sipoze. Me an plis ki sa, letan pou sa kestyon in terminen. E mon termin sa kestyon la. Mersi, mersi! Kestyon in terminen. VP mon remersye ou pou bann repons ki ou'n donner. E mon swet ou bonn kontinyasyon.

(The Vice-President was excused from the House)

MR SPEAKER

Bon, zis en pti lanons parey mon ti'n dir ...

(Interruption)

MR SPEAKER

Order please!

Onorab Gabriel, wi ou'n lev lanmen. Ki annan?

HON CONRAD GABRIEL

Yes, Mr Speaker. Mersi pou akord mwan 2 pti mo. Mon santi koman en Manm dan Lasanble, mon privez bomaten ...

(Interruption)

MR SPEAKER

Order!

HON CONRAD GABRIEL

... in ganny afekte.

(Interruption)

HON CONRAD GABRIEL

Ou'n les...

MR SPEAKER

Onorab Gabriel, wi. Ki pwen ou pe fer?

HON CONRAD GABRIEL

Mon privez dan Lasanble bomaten in ganny afekte Mr Speaker. Ou'n donn Mr Georges laparol, malgre letan ti'n fini. Mon pe zis ...

(Interruption)

HON CONRAD GABRIEL

Mon pe zis enform ou ki ou bezwen annan en nivo *bias*. In dir byen rar i lev lanmen. Byen rar i lev lanmen, e mon osi byen rar mon lev mon lanmen dan sa Lasanble. So, ou ti kapab *extend* mwan sa *courtesy* pou mwan demann mon kestyon, Mr Speaker.

MR SPEAKER

Mersi.

HON CONRAD GABRIEL

Mersi.

(APPLAUSE)

MR SPEAKER

Onorab! Onorab ti'n lev son lanmen apre en long lalis ki mon ti annan. E kestyon ti'n fini terminen. Mon pa ti pe pran lezot kestyon.

Bon en pti mo lo *Order Paper* pour ozordi. Parey zot konnen, nou annan en *Bill* ki nou pe met pou *First* ek *Second Reading*. *Bills Committee* in

demann letan pou travay lo la, e osi zot ti'n fer demann pour pran sa *Bill* demen *matin*. Ki mon krwar i rezonnab, akoz i a permet zot fer zot konsiderasyon lo la. E i osi i a permet lezot Manm letan pou *frame* zot pozisyon lo sa *Bill*.

Donk, apre midi, mon pou demann Manm pou prezant en Mosyon pou nou sanz biznes lo *Order Paper* anba *Order 25*, pou nou pran Mosyon apre midi, e *Bill* demen *matin*. La pou le moman nou ava *adjourn*, nou a pran poz e Lasanble i a rebran 2er. Mersi.

(BREAK)

MR SPEAKER

Bonn apre midi tou Manm, nou *staff*, tou piblik. Byenveni pou nou travay apre midi. Parey mon ti anonse. Annakor avek *Order* ki nou pou pran Biznes, ki nou pou pran *First* ek *Second Reading* sa *Bill*, mon propoze ki nou anvoy *Bill* pou demen, e ki nou fer Mosyon ozordi.

Alor i demande ki nou prezant Mosyon pou *suspend Order 25* pou nou kapab pran Mosyon avan *Bill*. Onorab Georges.

HON BERNARD GEORGES

Mersi Mr Speaker. Bonn apre midi Mr Speaker. Bonn apre

midi tou bann Manm e tou dimoun ki a pe swiv nou. Mr Speaker, pou permet ki Mosyon Onorab Samynadin, ki en *Motion With Notice* i ganny pran apre midi, avan en *Bill* ki deza lo *Order Paper*, avek ou permisyon, mon pe demann ... Mon pe *move* en Mosyon anba *Order 97 (1)* pou ganny ou permisyon pou sispann *Order 25 (2)* pou permet sa arive. Mersi.

MR SPEAKER

Mersi. Mon a ganny segonnman pour sa Mosyon. Onorab Sandy Arissol?

HON SANDY ARISSOL

Meri Mr Speaker. Bonn apre midi tou dimoun ki a lekout. Mosyon i ganny segonde. Mersi.

MR SPEAKER

Mersi. Nou a vot lo Mosyon. Manm ki an faver lev lanmen silvouple? Mersi. Tou Manm in vote. Napa Manm ki kont.

Lo Mosyon pou *suspend Order 25 (2)*, 17 Manm in vot pour, 0 kont, e 0 abstansyon. Donk Lasanble in aprouv sa Mosyon, e nou a pran Mosyon anmennen par Onorab Kelly Samynadin. Onorab, ou annan laparol premye pou soumet ou Mosyon.

HON KELLY SAMYNADIN

Mersi Mr Speaker. Bonn apre midi tou dimoun ki a lekout, e tou mon bann koleg Onorab. Mr Speaker, Mosyon i lir *comme swivan*;

Sa Lasanble pe demann avek Gouvernman, pli spesifikman Minister Zafer Entern pour entansifye patrol ek vizibilite bann zofisye dan lakominote, espesyalman dan bann distrik ki pa ekipe avek en Stasyon Lapolis, avek bi pour elimin bann ka vol ek lezot aktivite kriminel ki pe kontinyelman ogmante dan en fason alarman. Mersi Mr Speaker.

MR SPEAKER

Mon a ganny segonnman pou sa Mosyon silvouple. Onorab Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi tou Onorab. Mr Speaker, mon segonn Mosyon anmennen par Onorab Samynadin.

MR SPEAKER

Mersi, Mosyon in ganny segonde. Onorab Samynadin i kapab prezan adres son Mosyon.

HON KELLY SAMYNADIN

Mersi ankor enn fwa Mr Speaker. Mr Speaker, lasante en pep, pli spesifikman en kominote, i tre esansyel letan nou pe konsider krwazman ekonomik e stabilite sosyal en pei. Dapre sit *web Head to Health*, en kominote ki an sekirite i annan lyen avek besman dan to maladi mantal, pli bon enteraksyon sosyal, ensi ki konfyans kominoter.

Konstitisyon Sesel i fer plizyer provizyon pou asire ki sak sitwayen Sesel i viv en lavi ki an sekirite dan zot kominote. Premyerman, Lartik 16 i dir, sak dimoun i annan en drwa pou ganny trete avek dinyite ki vo en et imen, e pa pou ganny soumi a okenn tortir, tretman ou pinisyon kriyel, inimen, ou degradan.

Lartik 17(1) i dir ki sak dimoun i annan en drwa pou pa ganny garde dan lesklavaz. Lartik 18(1) i dir ki sak dimoun i annan en drwa pou laliberte ek sekirite sa dimoun. Lartik 27(1) i afirmen ki sak dimoun i annan en drwa pou proteksyon egal, ki enkli zwisans bann drwa ek laliberte ki'n ganny met devan dan sa *Charter*, san okenn diskriminasyon lo okenn fondman, eksepte parey neser dan en pei demokratik.

Malgre sa, Mr Speaker, i touzour annan en serten group

ki nou apel bann *perpetrators*, ki pou plizyer rezon pa oule obeir Lalwa ki'n ganny met an plas. E set a sa bann lenstans ki lentervansyon lafors i vin en parti entegral, pour kapab mentenir lape e re anmenn stabilite.

Mr Speaker, nou tou nou annan bezwen imaniter ki merit an retour fer nou santi nou an sekirite ;- ki swa fizik, emosyonnel, ekonomik, ensi ki environnmental. Par konsekan, nou bann sitwayen, nou ava obzerv en lenpak pozitiv dan nou lasante fizik, byennet emosyonnel ensi ki dan zesyon stres.

Avan ki mon komans elabor lo sa Mosyon, i enportan ki nou etabli lekel ki annan manda pou promouvwar *Law and Order* dan nou pei. Se pa lot ki Lafors Lapolis Sesel ki en striktir Nasyonal anba zesyon Komisyoner Lapolis, ki li a son tour i ganny apwente par Prezidan Larepublik, me anba laprouvasyon Lasanble Nasyonal Sesel.

I annan plizyer servis ki sa lafors i ofer. Premyerman, i annan *Public Order and Tactical Response Unit*. Ki li son bi se pou form e deplway en group *shock troopers* ki'n byen ganny *trained*, e ki annan tre o motivasyon pou entersepte,

dezamors e nitraliz okenn sityasyon ki Lafors Lapolis Regilye pa'n ganny ekipe, ou pa kapab zere.

Dezyenmman, i annan *Unit Family Squad* ki'n ganny mandate pou zer bann ka labi ki ariv avek bann zanfan depi laz 15an an montan. E sa i osi enkli bann madanm, zonn ek dimoun aze. Bi sa *unit* se pou fer lenvestigasyon, larestasyon, al lo *scene*, zer bann viktim, rikord zot *statement* e donn konsey. Nou osi annan *Unit Proteksyon Zanfan*, ki zot, zot manda se pou fer lenvestigasyon dan bann ka kot zanfan i pas atraver diferan ka labi akoz zot vilnerabilite.

Mr Speaker, parmi bann lezot *units* ki ganny trouve anba bann ziridiksyon Lafors Lapolis, i osi enkli *PR and Corporate Image, Dog Unit*, osi byen ki *Marine Police*. Malgre tou sa bann servis, i annan plizyer defayans e defi ki Lafors Lapolis i fer fas avek lo en baz kotidyen. Ki fer ki nou bann diferan distrik atraver pei, i pa kapab ganny sa latansyon ki merite, anvi ki lakantite ka krim pe kontinyelman ogmante.

I enportan pou note ki i annan plizyer kalite krim ki ganny raporte e rikorde dan sak Stasyon Lapolis atraver Mahe, Praslin e La Digue. Mon pou fer

referans an term statistik pou distrik Au Cap, anvi ki mwan ki reprezantan sa distrik dan Lasanble Nasyonal.

Pou lannen 2022, in annan 103 ka aktivite kriminel ki'n ganny rikorde dan sa distrik. E bann lofans pli mazer se kas lakaz, lezot letablisman ek transpor pou vole. Posesyon drog kontrole, koz domaz pou propriyete lezot, menas pou vyolans, trespas kriminel, agresyon endesan seksyel, ou ki'n okazyonn dimal. Posesyon propriyete ilegal, labi zanfan e osi omisid envolonter.

Dan konteks nasyonal, in annan osi plizyer ka lofans kriminel ki'n ganny rikorde. En total 3009 ka an tou, ki enkli bann ka vol, vyolans, lofans seksyel, ensi ki bann lofans ki annan pou fer avek labi e trafik drog, ki li in annan plis rikord. 439 ka raporte. Sa i an 2022. Zis pou komansman lannen 2023, in annan 954 ka lofans kriminel, ki fer mon kestyonn lakantite ka ki riske ganny raporte e rikorde par Desanm sa lannen.

Mr Speaker, avek en popilasyon ki konpri en pti pe plis ki 4mil zabitan, Au Cap i trouv li dan en sityasyon ase alarman letan nou konsider bann kalite krim ki pe ganny komet. I montre ki vizibilite

lapolis dan bann sou distrik, i en gran konsern.

E sa in ganny met devan mon a plizyer repriz par bann zabitan zot menm. Ki ti fer mwan tonm lo konklizyon ki en Mosyon pou adres sa size, i enn ki vreman enportan e inevitab. E mon asire ki mon bann lezot koleg Onorab pou dakor avek mon lo sa size, an vi ki zot osi, zot distrik pa pe ganny eparnyen.

I malere pou dir ki nou'n ariv en pwen kot i annan dimoun ki'n perdi konfyans dan Lafors Lapolis, akoz swa, napa ase ki ganny fer an term lord ek lentervansyon, e i annan ki'n menm dir mwan ki zot nepli *call* lapolis pou raport bann ka, akoz zot pa satisfè avek nivo lentervansyon.

Dan distrik Au Cap tou resaman, avek bi pou reisi trouv solisyon konkret vizavi bann lensidan kot bann lakaz, e pli spesifikman bann letablisman touristik ti pe ganny kase par voler, mon ti organiz en *meeting* avek *Regional Commander, ASP Jane Barbe, Station Commander* pour Stasyon Lapolis Anse Aux Pin, *Dean Decommarmond, Bann reprezantan Departman Tourizm, Fondater Neighbourhood Crime Watch, Mr Christopher Lespoir*, ensi ki

plizyer zabitan dan bann landrwa dan distrik ki pe ganny afekte.

Plizyer rekomandasyon ti ganny pran kont swivan bann diskisyon ki'n pran plas ki *comme* swivan ;

Ki lapolis i entansifye zot vizibilite dan vwazinaz, ensi ki lo nou bann lans, avek bi pou kapab deter plis krim ki pe arive. Ki en revizyon i ganny fer dan *Misuse of Drugs Act* an term probasyon, lanmann e santans.

In osi ganny rekomande ki Lalwa i vin pli sever pour bann *repeated offenders*, ensi ki pou bann reseler;

Ki *Risk Management Unit* kot Departman Tourizm i kordin plis zot travay avek lapolis, ki ava an retourn promouvwar plis sipor anver bann operater letablisman touristik dan distrik;

Ki lapolis i retourn kot zabitan pou donn *feedback* lo bann ka ki'n ganny raporte. E ki sa laliny kominikasyon i vin pli ouver ant zabitan, osi byen ki Lotorite Distrik.

E finalman, ki en group *Neighbourhood Crime Watch* i ganny kree, avek bi pou fasilite lapolis dan travay kominoter ki zot pe fer dan distrik. I enportan pou note ki sa group in preski fini ganny etabli. E mon ti a senserman remersye sak

zabitan ki pe angaz zot lekor antyerman, par fer provizyon portre, *video footage*, ensi ki lezot lenformasyon kredib pou ed lapolis, ensi ki lezot dimoun dan zot kominote pou atrap bann *perpetrators*.

Mon priye ki sa lespri fraternel i kontinyen rennyen dan nou kominote, e mon pe demann plis dimoun pou vin devan e partisip dan sa aktivite, pou ki a lafen nou a kapab annan nou en kominote ki an sekirite. E kot nou dimoun, ensi ki nou bann viziter, i viv san lafreyer.

Pandan ki mon ti pe travay lo sa Mosyon pou kapab prezant li ozordi, mon'n ganny sans zwenn e annan konversasyon avek plizyer personnalite. E enn ase remarkab sete ansyen Sef *de Police* Nor Irlan, Mr Georges Hamilton, ki'n servi dan Lafors Nor Irlan menm, Langleter e *Scotland* pandan 34an. Mr Hamilton ti'n ganny angaze pou travay avek Lafors Lapolis Sesel koman en *Strategic Policing Advisor* atraver son plizyer lannen leksperyans, avek bi pou prodwir en revizyon stratezik Lafors Lapolis Sesel, ki ti ganny pibliye e prezante an Zen, 2022.

Parey in ganny site, Mr Speaker, piblikasyon sa rapor i

mark en nouvo sapit dan modernizasyon Lafors Lapolis Sesel. E i rezilta e prodwi resers entans e revizyon pandan en peryod plis ki 8mwan. Sa rapor i ilistre en larises eksperyans bann lekspertiz lokal e enternasyonal dan lapolis, bann partner *criminal justice*, ensi ki lezot *stakeholders* dan Sesel.

Ti neserer ki Gouvernman i met ann avan en nouvo direksyon ek nouvo priyorite dan Lafors Lapolis, pou ki sa revizyon i kapab pran plas avek bi pou anmenn li dan nouvo letap son listwar, tout an prenon kont lentansyon Gouvernman pou rekonstrir konfyans dan lapolis, atraver reform e modernizasyon.

Mr Speaker, sa rapor i souliny plizyer rekomandasyon kle ki Gouvernman, pli spesifikman, Minister Zafer Entern, i bezwen pran kont pou kapab fer reorganizasyon dan Lafors Lapolis Sesel. E mon pou elabor lo serten sa bann rekomandasyon kle.

Premyerman, in ganny rekomande pou devlop e enplimant en striktir governans organizasyonnel ki delivre direksyon stratezik efektif, kot desizyon ki'n ganny pran i kapab ganny pli byen

zistifye lo en nivo responsabilite pli eleve.

Dezyenmman, in osi ganny rekomande pou devlop en lankadremman striktirel pou fonksyonman lentelizans ki regilariz son bann aktivite koleksyon, osi byen ki *covered policing*.

En lot rekomandasyon se pou devlop en striktir profesyonnel, entegre e envestigativ pou Lafors Lapolis Sesel, ki pou annan en Polisi debaz abil e lenfrastriktir fizik ki kapab delivre en reaksyon envestigativ apropiye e fleksib pou tou grad krim e lofans.

Enplimantasyon bann fonksyon stratezik efektif lo zesyon resours imen, pou asire ki bann dimoun apropiye avek bann *skills* kapasite ek *leadership* konvenab, i ganny met dan bann pozisyon apropiye pou delivre vizyon, bi ek valer Lafors Lapolis. Ensi ki prioritizasyon lenvestisman dan kapasite, kapabilite ek lenfrastriktir, ki permet devlopman resours imen ki otosifizan e soutenab anliny avek bann lobzektif stratezik nou Lafors Lapolis, i osi parmi bann rekomandasyon kle ki'n ganny met devan dan sa revizyon.

Mr Speaker, in osi ganny rekomande ki en *framework*

piblik *systemic* lo latransparans ek lasirans i ganny devlope, ki sekiriz bann konportman e etik lapolis profesyonnel. E finalman, i nesese pou konseptyaliz e entrodwir en fonksyon kot bann lensidan ki ganny raporte, rikorde e kordinen, i permet bann latas entelizan. Ensi ki bon planifikasyon proaktiv e reaktiv bann resours lapolis.

Zis pou note, *proactive policing* i letan lapolis i tant pou esey anpes bann krim avan ki zot prodwi dan en landrwa partikilye. E *reactive policing* i letan lapolis i reponn a en lapel sorti kot en sitwayen pou en servis partikilye avek aksyon apropiye.

Mr Speaker, sa lalis rekomandasyon i serten parmi plizyer lezot rekomandasyon ki parey mon'n mansyonnen, i sorti dan sa revizyon. Me mon'n sit sa bann aköz i direkteman annan pou fer avek Mosyon ki'n ganny prezante, pou ki lapolis i kapab fer zot travay dan en fason pli efikas dan nou bann kominote.

Avek en Lafors Lapolis ki pli byen ekipe an term kapasite, deplwayman resours, ensi ki lenfrastriktir, sa sinerzi ki egziste avek sitwayen dan distrik i merit ganny anplifye. E a lafen, nou ava kapab travay

ansanm dan en fason pli inifye pour byennet nou bann kominote e nou pei an antye.

Annou pa zis reste dan nou kwen e kritike. Me annou vin devan avek bann nide ek sizesyon konkret pou kapab ed nou Lafors Lapolis bouz pli devan e vin pli efektiv. Apre tou, sa bann zonn ek fanm dan liniform i kapab nou papa, nou manman, nou fre, nou ser, nou zanmi.

Parey tou travayer, zot osi zot annan zot bann defi ek difikilte ki zot rankontre, e ki parfwa i anpes zot kapab delivre a la oter. Annou pa pran bann zofisyè konman nou lennmi, me plito konman en partner kle, kot sekirite ek lord dan kominote i konsernen.

Mon konnen ki sa i annan pou fer avek bann ka kot serten zofisyè i abiz lo zot Lotorite lo sivilyen dan en fason ki pa akseptab, e kree plis dezord kot pa merite. E par konsekan, dimoun i tant pou devlop fristrasyon ek lafreyer anver zot ki an realite pa devret annan.

Avek lenplimantasyon sa bann rekomandasyon, bann zofisyè lapolis, ensi ki bann zenn ki enterese pou zwenn lafors, i ava ganny bann lankadreman ek *training* nesaser pou kapab met

community policing ann enplimantasyon.

Nesesite pou travay pli pre e ankouraz plis enteraksyon avek bann diferan partner dan kominote, i enn ki entegral pour garanti sikse *community policing*. E mezir lentervansyon ki efikas i vreman bezwen ganny pran kont.

En legzanp, lapolis i ganny en *call* pou *disturbance* lanmizik. Deswit zot in arive. Me i annan lenstans kot lakaz dimoun i ganny kase, oubyen aksidan i arive, zot pran letan pou arive. Mon konpran ki tousala se bann lofans, e ki resours i souvandfwa en problem, me annou balanse kwa ki nou grad koman irzan ek sa ki pli irzan.

Mr Speaker, mon pa pou kapab terminen san koz lo sa size drog dan kominote. E la mon pe *mean* bann *hard drugs* ki kree en serten depandans total, e ki par konsekan i rann bann adikt inabil pou travay e fors zot al fer krim pou kapab tir zot malad o pli vit. Nou bezwen aksepte ki lamazorite bann krim ki arive partou i annan pou fer avek labi e trafik drog. Sa i inevitab, e nou pou bezwen aksepte. Dan sak distrik i annan bann pti kwen ki nou apel bann *ghettos* ki plizoumwèn dan bann landrwa

rezidansyel, oubyen dan bann pti trou ki souvan ganny servi koman bann *spots* distribisyon ek koleksyon par bann trafiker.

Dan distrik Au Cap, i annan en travay ki nou koman Lotorite Distrik nou ti'n komanse depi lannen pase, an partenarya avek Departman Prizon e osi avek Minister Zafer Entern, kot nou ti pe netway bann landrwa izole, e kot bann trafiker i servi pou fer zot bann deroulman drog.

Mon oule senserman lo non distrik Au Cap, remersye Departman Prizon e Departman Lapolis, pou sa sipor ki zot pe donn nou dan sa direksyon, pou nou kapab redwir lenpak ki labi e trafik drog pe annan dan nou kominote. E mon swete ki sa sinerzi i kontinyen pandan lannen 2023.

Mr Speaker, pou nou kapab rezourd bann problem drog, i pa zis depan lo Gouvernman e Departman Lapolis, oubyen lo ANB, me i osi konsern sakenn de nou. Labi sibstans i en menas pou nou sosyete. Pe poz plizyer risk pou nou bann sitwayen an term lasante, lizyenn, e sekirite. Pe met bokou fanmir lo zot zenou. E se bann kours nou Nasyon plizoumwenn vilnerab ki ganny targete.

Pou konklir Mr Speaker, mon ti a kontan fer resorti ki bi sa Mosyon, se pou fer resorti ki pou nou kapab anmenn lord ek stabilite, e pou promouvwar sekirite zabitan, i pa zis depan lo Gouvernman, me i plito en zefor kolektiv. Nou tou nou bezwen zwe nou rol pou kapab ede rann nou kominote pli agreab pou viv.

Mon salye zefor sak zofisye ki delivre zot travay avek efikasite. Mersi pou zot devosyon e lanmour ki zot annan pou zot vokasyon. E pou bann ki pe servi zot lotorite pou agres, ou abiz lo sa sivilyen. La i le moman pou zot sanz zot fason fer, akoz sitwayen i bezwen zot pou promouvwar sipor e asir sekirite.

Pou nou bann *perpetrators* deor. Realize ki i fristran pou en dimoun ki leve e debourye, pou ou pas par deryer e kas son lakaz, andomaz son propriyete zis pou satisfere ou adiksyon. Mon swete ki sa transformasyon ki pe annan dan Lafors Lapolis i ava remarkab dan nou bann kominote, sirtou kot sekirite zabitan, e vizibilite bann zofisye i konsernen.

Mon swet tou Manm ki pou entervenir lo sa Mosyon, en deba friktye, e ki a lafen koman en Lasanble nou ava ganny

bann rekomandasyon konkret pou anmenn devan pou benefis nou pep. Mersi Mr Speaker.

(APPLAUSE)

MR SPEAKER

Mersi Onorab. Mon aprezan donn laparol Onorab ki'n segonn Mosyon. Onorab Bastienne.

HON DESHEILA BASTIENNE

Mersi Mr Speaker. Mr Speaker, sa Mosyon anmennen par Onorab Samynadin, i en Mosyon ki nou kapab koz bokou e longman lo la. Mosyon i tous bann distrik ki napa en Stasyon Lapolis.

Me sa Mr Speaker, i pa anpes nou, ki dan nou distrik i annan en Stasyon Lapolis, me ki travay Lafors Lapolis pa neserman pe fer pli byen. Akoz mon dir sa, se akoz ozordi mon pa vreman ganny en konpran ki pe arive avek zofisyé lapolis ki'n volonterman vin devan e fer aplikasyon pou antre dan sa profesyon.

Mr Speaker, mon kestyon se, eski i annan ki'n pran sa profesyon akoz zot ti napa swa? Eski zot ti zis le fer en leksperyans ki lapolis i fer fas avek anba zot responsabilite? Eski zot ti pe zis bezwen en saler tou le mwan? Ouswa pou

zot, lekspektasyon pa'n vreman alaoter? Alor, zot in zis dekouraze e perdi lentere dan zot travay, e zot reste dan sa profesyon akoz ki ou a fer.

Mr Speaker, lapolis li menm i en travay noble, ranpli avek potansyel. E zofisyé i menm ganny sans bouze. Ler mon dir i ganny sans bouze, mon le osi azoute ki zot annan sans ganny promosyon, bouz dan diferan departman. Ou parey nou apel li, bann diferan *unit*, tel ki Lapolis Regilye, *Dog Unit*, *PSSW*, *Marine Police*, ek plizyer lezot *unit* ankor ki'n ganny kree anba *Headquarters Lapolis*.

Zot ganny sans fer rotasyon dan diferan distrik. Al lo zil, tel ki Praslin e La Digue. E osi al fer bann lesanz dan bann diferan pei. Me pou mwan Mr Speaker, letan nou pe koz lapolis, kwa ki fer ozordi ki en tel Mosyon in ariv dan Lasanble? Akoz ozordi laplipar di-tan lapolis pe ganny montre ledwa ki zot pa pe desarz zot travay konman fodre.

Enn de legzanp, kot en zabitan i *call* pou demann lasistans. Annan lenstans kot zot vini, me zot pran tro bokou letan pou ariv lo sa *scene*. Ouswa i menm arive kot zot pa vin ditou. E i menm par ler annan serten *statement* fer par

serten zofisye lapolis ki zis perdi koumsanmenm.

Dezord i kontinyen dan distrik. Lapolis i pase i get laba. Zot konnen lekel ki pe kree dezord, lekel ki pe zoure, pe mars avek zouti danzere, pe vole, pe vann drog, me napa aksyon ki ganny pran. I menm annan zofisye lapolis kot en serten *unit* ki ganny deplwaye pou anmenn ranfor dan en lot distrik. Zot refize ale. E naryen pa ganny fer lo sa desizyon pran par sa bann zofisye konsernen. Zabitan alors i kontinyen perdi konfyans dan zofisye lapolis ozordi.

Ankor Mr Speaker, nou vwar zabitan pe perdi konfyans dan lapolis, e menm ki zot pe sibir bokou *disturbance*. Zot pe obzerv bokou aktivite ilegal ki pe arive, swa otour zot, ou dan nenport kwen distrik. Zabitan pe refize donn lapolis lenformasyon, aköz zot dir ki zot non pou ganny devwale. Zot pou vwar zot ek zot fanmir an danze.

Mr Speaker, zofisye lapolis parfwa zot menm *text*, ouswa al dan en pti kwen e *call* serten *dealers* e dir zot “evakye. Nou'n ganny rapor lo zot.” Swa par tel dimoun, ouswa i dir “bouze, lapolis pe vin kot zot!” Se la kot tou i komanse. Zot konfyans i ganny perdi. Sivilyen ek lapolis,

zofisye lapolis antre zofisye lapolis menm.

Kwa ki fodre fer pou remet sa konfyans ant lapolis ek sivilyen? E osi remet konfyans ant sivilyen ek zofisye lapolis? Mr Speaker, nou fer byen kler. Mon fer byen kler ankor enn fwa ki nou pa pe denigre okenn zofisye lapolis. Nou respekte zot travay. Me kot i annan defayans, nou bezwen met devan dan en fason konstriktiv pou anmenn pli bon kominikasyon, ek pli bon fason fer pou ki nou bann lapolis i vin pli profesyonnel.

En kestyon, eski bann zofisye lapolis i annan lasirans? Aköz par ler ou rode, be aköz zot per pou entervenir dan en bagar, aköz pangar zot ganny blese. Kot sa in deza arive e zofisye lapolis in vwar zot tousel avek zot sikatris.

Risk allowance, i ankor egziste oubyen i nepli? Ki mannyer nou travay ansanm pou remet sa lenerzi dan nou bann zofisye lapolis, e ankouraz zot desarz zot responsabilite dapre zot serman ki zot ti fer letan zot ti ofisyelman aksepte sa profesyon. Nou pe demann Gouvernman pou fer en lenvestigasyon o pli profon, ki ava ede dekouver kote ki'n al mal, e redres nou sistenm

lapolis pou byennet nou pei ek tou nou zabitan.

Avan mon konklir, mon le remerci manm lapolis dan Perseverans pou sa ki zot pe fer. *SI* Camille, Allah ek tou lezot ki pe fer tou pou anmenn lape dan distrik. Mon pou siport Mosyon anmennen par Onorab Samynadin, ki pe demande ki nou lapolis i entansifye zot patrol, anmenn plis vizibilite dan lakominote, pou kapab ede elimin bann krim ek vol, ek bann aksyon anti-sosyal ki pe vin pli alarman. Mersi.

(APPLAUSE)

MR SPEAKER

Mersi Onorab. Mon a pas laparol Onorab Michel Roucou.

HON MICHEL ROUCOU

Mersi Mr Speaker. *Bonne après midi à tous.* Bonn apre midi spesyal pour zabitan Mont Fleuri. Mr Speaker, mon osi tou annefe mon pou partaz enn de bann pwèn lo Mosyon anmennen par Onorab Samynadin. E anvì osi ki mon en Manm lo Komite Defans osi, sa osi tou i pou en plezir pou mon kapab met detrwa pwèn devan.

Mr Speaker, parey tou dimoun i konnen, mon distrik Mont Fleuri nou annan nou en

kordgard ki deservi 3 lezot distrik o bor nou. Sa i Les Mamelles, Roche Caiman, Plaisance, ki i mont ziska Basen Ble anler pou al kot Lekol Touris. E Les Mamelles ek Plaisance ki al fini zis lanmwatye kot *Industrial Estate*.

Nou distrik Mr Speaker, annefe ou kapab dir nou rezyon, i en rezyon ki ou kapab dir i pa eparnyen avek bann fleo sosyal, problemm drog, lalkol li menm li ek lezot. Nou rekonnet Mr Speaker, poudir se ki i mank *manpower* dan nou kordgard pour ede ki sa i ava ed bann zofisyè ki zot deza pe rann sa servis. Pour lev zot moral en pti pe pli o e osi pou ed zot desarz en pli bon responsabilite.

Annefe Kordgard Mont Fleuri li i annan li apepre 47 zofisyè lapolis, e dan sa 47 i annan *ASP* Jane Barbe avek Lenspekter Roseline ki responsab nou Kordgard Mont Fleuri. E osi, Mr Speaker, i annan li apepre 4 *shift*, ki ladan i annan li apepre 7 manm ki travay dan sa bann *shift*.

Mr Speaker, nou rekonnet bann defi ki lapolis pe pas ladan. Ansanm dan bann plizyer *visit* dan Komite Defans, nou'n kapab vwar, enn se ki i mank *manpower*, parey mon'n dir o paravan. E osi lo kote

lekipman, ki sa osi tou i ede ki en lapolis ozordi i vwar li ki petet i pa reazir dan en fason ki i merite pou li kapab dil avek nenport ki sityasyon.

Sa i bann pwen ki, annefe lo kote defans nou'n kapab met devan Komisyoner Lapolis, pou gete ki mannyer zot kapab amelyore pou ed bann zofisye pou kapab dil avek bann problemn, ouswa bann *call* ki zot gannyen.

Annefe Mr Speaker, dan distrik, ler mwan mon'n kapab koz avek Lenspekter Roseline, e in fer mon ganny en konpran poudir se ki zot ti a voudre pou zot kapab fer en pti pe plis *community policing*. Be anvi ki laspe sityasyon dan nou - ou kapab dir dan nou *area* kot nou ete, zot bezwen vwar zot plizyer fwa kot zot pe al rann lapel pou zot al dil ek lezot sityasyon.

E selman, en keksoz ki mon'n kapab remarke, Mr Speaker, se ki i annan souvandfwa bann zofisye lapolis ki vwar zot pe pas dan kominote, pe koz ek bann dimoun. Akoz mon lot fwa ler mon ariv kot mwan, mon zanfan i dir ek mwan poudir i annan bann zofisye lapolis ki'n pase, in demann en pti pe kestyon. Ki sa i byen.

Be petet parey nou pe dir, nou pe swete ki petet i annan

plis sa vizibilite dan kominote pou koz avek bann zabitan, koz avek bann dimoun. Pas en pti pe, get en pe plis bann konsern ki sa i ava kapab ede ki zabitan zot menm zot, zot ava kapab retourn sa konfyans parey in ganny dir oparavan, ki dimoun i kapab dir zot pa tro annan dan zofisye lapolis.

Mr Speaker, be dan lepase Gouvernman ti pran li en desizyon. Desizyon se ki nou ti vwar kot ti annan bann zofisye lapolis, ki ti pe reste dan bann *flat* ki nou ti apel sa bann lakaz gard. Kot Gouvernman ti deside pou zot tire avek *limit* later ki i ti annan li menm li. E osi avek sa nide, met bann zofisye lapolis reste ansanm avek bann sivilyen, dan bann *housing estate*, espesyalman dan bann kominote.

Nou'n vwar poudir sa in vin avek bokou problemn. Premyerman se ki zofisye lapolis li menm li, i annan ki pa konport zot dan en fason byen. I annan zot menm zot ki zwe lanmizik for, ouswa zot menm zot, zot dan konfli avek vwazen. Ki sa prezan in fer poudir dimoun in tant pou perdi sa respe en pti pe pou zofisye lapolis.

E avek, mou konnen, sa transformasyon ki nou annan dan lapolis la, se ki nou vwar

poudir pe komans amelyore, kot la nou pe demann avek bann zofisyé lapolis pou zot partisip en pti pe plis dan zot kominote. Nou konnen poudir konmela avek lanvironnman, se ki i pa sitan fasil pou ou al enterfer ou dan nenport ki sityasyon.

Be selman, apre ki en zofisyé lapolis in fini sermante, Mr Speaker, nenport landrwa ki i ete, i kapab dan son lenz lakour kot li, ou reste *still* en zofisyé lapolis ki devret pe reakte lo okenn evantyalite ki arive dan ou prezans.

Sa nou vwar ennler ki i manke dan bann kominote. E nou ozordi sa Mosyon ki'n anmennen par Onorab Samynadin, parey Onorab Bastienne in dir, se ki nou, nou pa la, annefe, pou nou denigre person. Me selman an term pou anmenn en pti pe bann problem ki nou vwar, e ansanm avek zot, sey rod en pti pe bann solisyon pou nou kapab gete *the way forward*, Mr Speaker.

Annefe, ki fason, annefe nou, ou kapab dir bann zabitan dan kominote, nou le travay ek lapolis? Parey in dir, nou vwar poudir in kree sa group *Crimewatch*. Ki ladan lapolis zot menm zot souvandfwa, i vin rod rekour avek zabitan. Kot ladan

zot souvandfwa nou vwar li i mars sitan byen. Kot zabitan i partisipe, zabitan i vin en pti pe pli korpore avek lapolis li menm li. E sa parey mon'n dir dan sa transformasyon, Mr Speaker, sa pe ede pou kapab fer dimoun retourn ankor sa konfyans, sa konfidans dan lapolis.

E, apre osi, bann problem ankor ki ou ti vwar oparavan, ki nou vwar poudir pe komans ganny eliminé dousman, dousman, se ki nou ti annan bann zofisyé lapolis ki petet i reste dan en kominote. E ler zabitan i *call* pou fer en konplent, swa lo kote en anti-sosyal ki pe pase, sa zofisyé lapolis zot ti ganny dir pou dir li i lev telefonn i dir sa dimoun. Sa i bann keksoz ankor, ki ti ede pou fer dimoun perdi en pti pe sa konfyans.

Be selman, Mr Speaker, an sipor osi tou pou bann zofisyé lapolis. Ozordi ler ou pase dan bomaten dan semen, ou kapab vwar zot en pti pe partou. Mon dan mon distrik mon vwar bann zenn fiy, bann zenn ki'n *join* lapolis, pe ede pou kapab donn mouvman trafik, sirkilasyon dan semen. E osi pou ede pou fer sir poudir tou dimoun pe swiv Lalwa dan semen, e sa i byen.

E lo siny lankourazman ki petet nou dir se ki, nou bezwen

osi tou - mon ganny en konpran, Komisyoner Lapolis ti enform mwan, poudir lo kote promosyon, i annan en komite ki dil avek. Mon ler mon ti ganny aprozé - Pa aprozé, Mr Speaker - petet pou *join* lapolis, ki mon ti fer li pou en pe letan akoz nou ti en zofisyé AVSEC, ki nou ti... Apre ki AVSEC ti pe ganny revwar, nou ti ganny mete dan lapolis ki pou mwan ti vremen eksitan.

Mon ti war mwan, mon ti annan ran. Ki aprezan en zofisyé lapolis ki li i ti pe *train* mwan, li ti napa ran. I ti sitan anbarasan, akoz sa dimoun li menm li ki pe donn ou sa, ki pe *train* ou, li menm li i napa en ran, selman li menm li ki pe *train* en dimoun ki bokou pli o ki li.

Sa i bann keksoz, en pti pe bann dezord ki devret annan. Mon panse poudir se ki lo kote ran osi tou, i annan bann zofisyé ki'n la pou sitan bokou letan. Parey mon kapab nonm enn. Mr Bristol, ki lot fwa mon vwar bokou dimoun pe donn li lankourazman lo *Facebook*, akoz i pe ede kot *roundabout* Point Larue, kot *airport* pou fer trafik sirkile. I osi in la pour sitan bokou letan, e bann keksoz koumsa tousala i kapab ede pou dekouraz li Mr Speaker.

E nou, nou pe dir se ki, fer sir poudir ki ler i annan promosyon, osi mazin bann dimoun ki'n la pour sitan bokou letan ki petet i la, i pe donn menm i osi, ki sa i pa vin en siny dekourazman pou zot.

E osi Mr Speaker, mon panse poudir la, lapolis i devret revwar, anvi ki mon'n ganny dir pou dir Kordgard Mont Fleuri i mank *manpower*. Petet lapolis, retourn sa lekòl ki zot ti pe fer. Kot zot al dan bann lekòl, zot ankouraz bann zenn pou zot *join* lapolis.

Akoz ler nou pou annan plis zofisyé lapolis, sa pou ede ki nou kapab dil avek bann krim ki annan dan kominote, dan semen e ede ek bann vol. E petet lapolis kree en seksyon kot piblik, parey Mr Christopher Lespoir in fer - kot bann endividi i kapab travay avek lapolis pou ede vin en lizye pou zot dan kominote. Kot ler i annan en soupsyon poudir i annan en dimoun ki pa sipoze dan sa landrwa, li i la, i pe fer bann aktivite ilegal.

E petet pou piblik deor. Piblik deor se ki, annou pa zis, nou rod lapolis, selman nou menm nou, nou pe angaze dan bann keksoz ki pa byen. Zis parey dan mon distrik Mr Speaker, i annan dimoun i *call* lapolis, selman mon menm mon

ler mon pe pase *door-to-door* pe vizite, zot menm zot, zot pe vann papye sigaret. Be sa i mal.

Si nou anvi nou pe viv dan en bon kominote. En landrwa ki bon pou nou zanfan, nou osi nou bezwen ede pou fer sir ki sa landrwa i vin an sekirite. Travay ansanm ek lapolis. Parey mon'n dir, nou rekonnèt poudir lapolis i annan son defi, i annan son problem, parey bann pwèn ki nou'n touse o paravan.

Be petet piblik annan zwenn ansanm avek lapolis pou ede. E sirtou ler nou vwar poudir kot enn nou vwazen voler in antre, petet nou, nou annan problem ek sa vwazen, nou pa le vin devan pou ede, pou nou kapab tyonbo sa dimoun ki'n komet sa.

Mr Speaker, mon sa Mosyon anmennen par Onorab Samynadin, mon pou donn mon sipor. Mon vwar son nesosite, akoz konmela sirtou dan semen nou vwar bokou bann zenn ki pe marse ek en kouto dan zot kote. E petet lapolis i devret vin en pti pe pli vizilan, gete.

Nou pa pe dir zot al dan kominote parey lot fwa, zis aret nenport ki dimoun ki zot vwar. Annou fer li dan en fason byen. Annou annan sa kontak, sa kominikasyon avek bann dimoun dan kominote byen

menm. Pou nou kapab fer sir ki dimoun i annan sa *trust* dan nou, e ki dimoun i kapab travay avek zot. Mersi.

MR SPEAKER

Mersi Onorab. Mon pas laparol Onorab Waven William.

HON WAVEN WILLIAM

Mersi. Mr Speaker. Bonn apre midi tou dimoun ki a lekout. Mr Speaker, lo sa Mosyon ki lir *comme* swivan; Sa Lasanble pe demann avek Gouvernman pli spesifikman Minister Zafer Entern pou entansifye patrol ek vizibilite bann zofisye dan lakominote, espesyalman dan bann distrik ki pa ekipe avek sa Stasyon Lapolis, avek bi pou elimin bann ka vol e lezot aktivite kriminel ki kontinyelman ogmante dan en fason alarman.

Mr Speaker, mon oule felisit premyerman Lafors Lapolis. Bann zonn ek fanm dan *uniform* pou travay ki zot pe fer. Mon konnen poudir i pa en travay ki sitan fasil. Letan ou pran kont lanvironnman, e bann fasilite zot annan pou travay avek.

Mr Speaker, mon pe dir sa akoz mon an kontak dan mon rezyon, e mon vwar poudir i annan bann mankman. E bann

mankman ki letan mon pe koz lo la, mon regard dan lepase dan bann *previous* Lasanble, i en size ki nou'n kontinyelman diskite lo la.

Par egzanp lekipman, mon rapel ti annan *ex-Komisyoner Labonte* ti vin dan Lasanble. Nou'n koz longman lo zafer lekipman. Me *still, still* ou vwar poudir i napa en amelyorasyon. E mon mazine ki Lasanble pou bezwen regarde dan Bidze lavenir la, kwa egzaktman ki pe ganny fer pou kapab rezourd en pe sa bann problem.

Mr Speaker, par egzanp dan larezyon pou le moman, mon ganny dir pou dir en bon tors, *ASP baton, pepper spray, minot*, i bann keksoz ki *basic* ki bann gard zot bezwen e pou zot kapab fer sa travay efikas.

E Mr Speaker, si ou pran rezyon was, dan en *shift* ou bezwen ou 12 zonn ek fanm, me ki konmela pe *operate* avek 6 ouswa 7 dimoun dan en *shift*, Mr Speaker. Nou pe koz nou la 50 a 60poursan lafors mendev. E sa ki sa Mosyon pe demande avek sa kalite lanvironnman e resours ki lapolis i annan, mon pa vreman vwar ki zot pou kapab delivre parey pep Seselwa ti ava ekspekte.

Me de lot kote Mr Speaker, mon santi ki, wi, i annan sa nesessite pou ladministrasyon

lapolis al ver bann lekol pou kapab ankouraz bann zenn. Akoz lontan mon rapel zot ti vin dan lekol, letan mon ti pe lekol. Zot ti vin souvan pou ankouraz bann zenn pou zwenn lafors. I annan sa nesessite pou serten pro-aktivite lo sa kote lapolis pou al anver bann lekol.

E an menm tan Mr Speaker, letan ou pe regard reminerasyon e osi bann *scheme* ouswa *incentive*, sa osi mon krwar i bann eleman kle ki pou ankouraz bann zenn pou vin devan, pou pran sa karyer dan Lafors Lapolis.

Mr Speaker, lot keksoz ki mon santi petet osi nou bezwen regarde, si i annan serten bann Lalwa ki merit ganny amande, ouswa vin devan Lasanble. Akoz dan lepase, dan *previous Assemblies* nou'n koz lo *The Criminal Procedure Code, Criminal Code*, epi *MODA*.

Sa se bann Lalwa, i enportan ki i nesesser pour lapolis travay avek, me nou pa ancor vwar vin devan Lasanble. E mon swete ki sa i vini pou kapab donn en pe plis sipor nou bann zonn ek fanm dan *uniform*.

Mr Speaker, lot pwen, mon krwar defayans ki dekouraz en pe sa lafors, se bann *repeated offenders*, Mr Speaker. E bokou bann zofisyè

pe dir ou poudir be, petet santans devret ganny revwar, sa Lalwa devret ganny revwar akoz i pe vin en problem. E menm parfwa letan i al devan Lakour la, e nou pa pe blanm Lakour. Me selman bann kalite santans ki ganny donnen, sa dan li menm li i dekouraz serten manm dan lafors.

Mr Speaker, me pli enportan se ki, pep Seselwa li menm li i bezwen realize ki pou annan lord ek lape dan kominote, sak sitwayen i bezwen vwar li dan en sityasyon kot i osi pe ede.

Mr Speaker, en nenport kriminel i sorti dan en fanmir. Be si i sorti dan en fanmir, manm fanmir mon krwar i osi i bezwen ... I zot rol pou donn sipor, pou donn lenformasyon ki lapolis i kapab travay avek. Akoz lord ek lape pou nou fye lo zis lapolis tousel, i pa pou arive. Sa ekspektasyon ki nou annan, nou pa pou gannyen si nou menm nou, nou pa angaze.

E lo sa not Mr Speaker, mon ti a kontan felisit tou sa bann dimoun ki form parti sa *platform crimewatch*. Zot pe fer en travay ekselan. Par egzanp mon annan sa *Citizens Crimewatch*, Fairview, La Misère. Mon felisit zot pou travay ki zot pe fer, akoz mon pe swivre bann aktivite ki zot pe

fer, bann rapor ki zot pe donnen. E mon a ankouraz bann zenn pou osi al lo la partou dan kominote. Bann dimoun ki kapab, akoz sa pou ede.

Me selman, silvouple, si nou kontinyen soutire, Mr Speaker, si nou kontinyelman soutire, nou dalon, manm fanmir, pa ekspekte ki lapolis i pou fer en travay ekselan.

Mr Speaker, lot keksoz, en kestyon ki mon anvi demande se ki, eski letan en zonn ouswa en fanm dan liniform i fini son travay pe al kot li, ouswa i pe desann bomaten pou al travay, i nepli en gard?

Akoz ou a krwar letan i pe monte i fini son kar, ouswa i pe desann, sa travay gard ou a krwar in fini, menm si i annan serten keksoz pe arive, petet sa pa konsern li. Mon pa pe dir sa an mal Mr Speaker. Mon pe dir sa akoz i en form of responsabilite. E i annan serten keksoz ki nou kapab *improve* lo la.

So, Mr Speaker mon pe met sa bann pwen devan an sipor pour sa Mosyon. Mon krwar poudir i enportan ki Lasanble i kontinyelman diskite lo la, akoz i bann konsern ki piblik i annan la deor. E mon anvi asir Onorab Samynadin ki mon pou donn li mon *full* sipor,

e mon demande osi ki sa konversasyon i kontinyen. E ki Komite Ladefans Lasanble i swivre bann rekomandasyon ki pe ganny met devan atraver sa Mosyon, ki anfen kont dan kominote osi, nou koman manm Lasanble, nou ankouraz nou bann dimoun pou vin devan e pou donn sipor nou Lafors Lapolis. Mersi bokou.

(APPLAUSE)

MR SPEAKER

Mersi. Mersi pou ou lentervansyon Onorab. Prosen entervansyon, Onorab Naddy Zialor.

HON NADDY ZIALOR

Mersi Mr Speaker. Bonn apre midi mon bann koleg, bonn apre midi Lepep Seselwa. Bonn apre midi tou zofisye Lapolis Sesel.

Mr Speaker mon lentervansyon pa pou tro long parske dela i annan ase pwen ki'n ganny fer resorti. Me mon pran laparol apre midi parske, premyerman an sipor pou Mosyon ki'n ganny table devan nou.

Dezyenmman dan mon *speech* Leta Lanasyon repons, enn bann size ki mon ti tous lo la se Lafors Lapolis. Mr Speaker Lafors Lapolis ozordi Sesel fodre

ki nou rekonnet, ki i enn bann lafors ki'n pas dan en transformasyon ase signifikan depi ler ki in annan en nouvo ladministrasyon.

En transformasyon an term servis, en transformasyon an term vizibilite ki swa lo medya sosyal, transformasyon lafason ki lapolis li menm pe desarz son servis.

E la ankor enn fwa mon a sezi sa loportinite de lapar Lepep Seselwa, pou mwan tir mon sapo avek nou bann zonm ek fanm ki dan *uniform* ki an premyer lye letan zot met zot niform servis i pas avan tou e zot fer tou sa ki posib pou ki nou sa sitwayen.

Ki parey Mosyon pe demande parfwa nou demann serten lekspektasyon e sa bann zonm, sa bann fanm i fer tou sa ki posib pou fer li arive Mr Speaker. Alors mon tir mon sapo avek nou bann frer ek ser, e parey in ganny dir par bann ki'n koze avan mwan, nou bi ozordi se pou atraver sa Mosyon kontinyelman donn zot sipor e travay ansanm pou nou viv dan en pei ki pli an sekirite, pou nou viv dan en pei ki pli dan lape Mr Speaker.

Mosyon apre midi pe demann dan mon konprenezon pou mwan, plis vizibilite e entansifye patrol de lapar

vizibilite lapolis dan nou kominote.

Rezon akoz ki mon pe siport sa Mosyon, se akoz mon santi ki ankor enn fwa i ava en platform pou nou koman bann dirizan kominote pou donn en pe ledikasyon. Ledikasyon dan nou distrik ki nou reprezante respektivman, ouswa dan nou kominote kot nou pe reste.

Ledikasyon parey in ganny dir, avek sa voler, sa droger, sa enn ki li i pas son letan i mandyan obor semen. Sa enn ki li sa madanm i trouble dan lakaz akoz i annan en menm dimoun ki pas son letan vole, kas lakaz.

E wi, malerezman se apre nou zonm ek fanm dan *uniform* ki pou bezwen pran sa responsabilite. Ledikasyon pou parey Onorab William ki'n koze avan mwan, pou sa manm fanmir ki li sak fwa son zanfan i vole, i pran i anmenn kot lakaz e apre lapolis i vin kot lakaz. Sa paran, sa frer, sa ser i soutire e apre responsabilite i tonm lo Lafors Lapolis Sesel.

Wi, Mr Speaker mon krwar i ava en loportinite ozordi, pou nou fer konpran ki koman en kominote, koman en pei letan ki nou pe travay. Letan ki Gouvernman pe travay pou tir sa bann negativite ki'n

annan lo Departman Lapolis pou plizyer lannen.

In annan en pti group ki li i kontinyelman rod tou fason pou ser nou zwen Mr Speaker, pou fer sir ki ankor enn fwa nou Lafors Lapolis i ganny blanmen. Nou konnen nou. Nou konnen, nou konnen ki kantite difikilte.

La mon a fer resorti ankor enn fwa, pou nou kapab annan plis vizibilite, plis patrol, lefe i reste ki Departman Lapolis i bezwen annan plis resours;- i bezwen annan plis resours imen, i bezwen annan plis bann resours materyo pou zot travay avek.

Me mon osi rekonnet ki pandan sa 2an in annan pa mal travay ki'n ganny fer pou amelyor, pou amelyor fasilite pou nou bann zofisyé lapolis. Mon'n deza dir dan Leta Lanasyon, ozordi mon pou repete atraver Mosyon. Nou annan bann diferan kordgard ki'n ganny fer renovasyon lo la.

Kordgard Baie Lazare, Kordgard Glacis byento ki pe al ganny aranze. Lo Praslin e sa i montre ou ki sa ladministrasyon i annan en lanvi - i annan en dezir pou amelyor nou servis lapolis Mr Speaker.

E la mon ti a kontan petet koz en pti git lo bann plan stratezik e nou vwar ki mannyer

pe amelyore. Bann plan stratezik kot nou war nou wi, nou lapolis ozordi pe al devan laport nou bann dimoun.

Zis lotreman la letan mon dan *recess*, ti annan 2 madanm ti pase avek en form ti pe demann serten kestyon, an term nou kominote ki mannyer nou anvi amelyore.

Me lapolis pa pou zanmen kapab fer sa travay zot tousel Mr Speaker. In annan bokou, bokou e mon pe repete sa. Mon pou kontinyen dir, i annan bokou amelyorasyon ki'n ganny fer dan lapolis. E ki ankor pe kontinyen ganny fer.

Ozordi en keksoz i ariv bomaten, 08.05 ler i dir ou 08.07 ou'n fini annan en *press release* ki pe enform nou popilasyon ki pe arive. Ki annan en *follow-up* osi en *case* ki ti'n pase 2 semenn pase.

Entel in gannyen ozordi ki sa tel sispe in ganny pas Ankour tel zour, tel dat. E ler kondannasyon i ganny fer sa osi i ganny kominike.

Alors mwan atraver sa Mosyon mon pou osi demande, ki a lavenir nou rod plis resours pou donn nou Lafors Lapolis Mr Speaker. E letan ki mon'n tann loter Mosyon in koz lo kriminalite ki ase alarman dan son distrik, mon osi rekonnet ki lo nivo nasyonal koman en pei,

baze zisteman lo sa bann transformasyon ki nou'n fer koman en Gouvernman, in annan osi pa mal rediksyon.

E mon krwar sa, sa *awareness* i bezwen kontinyelman pe ganny fer. Me mon pou retourn mon lapel ankor ver nou kominote pou nou donn sipor nou lapolis. Pou pa letan ou ganny arete ou'n fer sarz, ou donn en fo non. Ouswa letan ou konnen lekel ki pe ravaz ou sosyete avek drog, akoz sa i ou dalon ou protez li.

Oubyen letan gard i decide pou fer en *raid* vi ki nou'n dir i annan en problemm drog, gard i met lafors ansanm, lapolis i met lafors ansanm pou nou met sityasyon anba kontrol, nou pa war en group dimoun ki vini ki vin dir pou dir zot drwa in ganny vyole.

Aprè sa bann menm group dimoun zot vin devan e zot dir ki nou bezwen fer plis konsernan sa size.

mon retourn atraver ou Mosyon Onorab Kelly. Mon retourn ver mon kominote, mon retourn ver nou kominote pou nou travay ansanm avek Lapolis Sesel.

Sa zofisye lapolis i enn ou zanmi, i enn ou vwazen, i enn ou manm fanmir. Me si nou anvi ki nou kominote i viv dan sekirite, ki nou viv dan lape

fodre pa ki sa responsabilite i tonm zis lo Lapolis Sesel. Me i en responsabilite ki bezwen tonm lo nou tou.

E mon zwenn avek lezot nou bann Manm ki'n koze bann koleg, linisyativ ki pe ganny pran lo nivo kominoter - bann diferan group ki pe veye la i annan tel dimoun ki mon pa abitye vwar li, konmsi mon war li pe mouvman te en pe souvan. Zet en koudey lo li, sa osi i enportan sa i bann keksoz koumsa.

Ozordi letan, parfwa ankor mon vwar en mantalite ki, ki pe sanze. En pti bonzour Konstab, koman ou sava? I ede pou fer nou kominote vin pli pre avek Lafors Lapolis. En pti mersi Konstab i ede pou fer Lafors Lapolis vin pli pre ek nou kominote.

Alors annou ede, annou ede pou transform nou lapolis. Annou ede pou transform nou kominote, annou ede pou pa senm divizyon, laenn, rankin. Pou ki nou viv dan linite, dan lape pou vremen vwar sa transformasyon ki nou pe swete vwar dan nou Lafors Lapolis. Mersi Mr Speaker.

(APPLAUSE)

MR SPEAKER

Mersi Onorab. Mon a pas laparol Onorab Andy Labonte.

HON ANDY LABONTE

Mersi Mr Speaker. Bonn apre midi Mr Speaker, bonn apre midi tou mon bann koleg Onorab, e bonn apre midi tou dimoun ki a lekout.

Mr Speaker se Bondye Papa ki'n kre lesyel ek later. Liniver vizib e envizib e tou sa ki ladan. E nou koman bann imen nou osi form parti enn son kreasyon. I enportan ki nou touzour e kontinyen ran li glwar pou tou son mervay, e demann li gidans dan tou sa ki nou fer.

Tou sa ki nou fer avek lanmour, i sorti kot Bondye. Me tou sa ki nou fer avek bi ou lentansyon fer dimal nenport ki kreasyon Bondye i ganny enspire par lespri demon e satanik.

Sa Mosyon anmennen par Onorab Kelly Samynadin pe demann Gouvernman, prensipalman Minister Zafer Entern, pou entansifye patrol ek vizibilite bann zofisye dan lakominote espesyalman dan bann distrik ki pa ekipe avek en Stasyon Lapolis.

I enportan pou note ki mazorite Stasyon Lapolis i deservi plito en rezyon, me pa zis en distrik an partikilye. Alors nou konpran akoz ki en

tel Mosyon i annan son merit. Departman Lapolis ki tonm anba Minister Zafer Entern, e son fonksyon i preskri dan Lartik 161 nou Konstitisyon Sesel.

Sa se pou premyerman mentenir Lalwa ek lord e prezerv sekirite entern Sesel, nenport lezot landrwa ki Larepublik in proklanmen son ziridiksyon. Dezyenmman pou anpes e detekte krim dan Sesel dan nenport lezot landrwa, kot Larepublik in proklanm son ziridiksyon.

E osi pou desarz tel lot fonksyon parey i kapab ganny preskri par en Lalwa. E sa Mosyon pe promot avek bi ede elimin bann ka vol ek lezot aktivite kriminel, ki pe kontinyen ogmante dan en fason alarman.

Mr Speaker i pa vedir ki napa prezans lapolis dan Kominote, me pe demann Lotorite pou ogmant, pou ogmant zot prezans ek zot vizibilite. O komansman mon lentervansyon mon ti dir ki tou sa ki imen i fer avek lentansyon fer dimal enn oubyen okenn kreasyon Bondye. I ganny enspire par lespri demon e satanik.

E bann aktivite parey vol ek lezot i bann aksyon ki ganny enspire par lespri demon. I pa

normal, e i pa akseptab ler en dimoun e okenn endividi ki trimouse, transpire e travay dir pou aste son keksoz.

Ki finalman i vin son propriyete e i annan en valer santimantal pou li. Me en lot i pas deryer e vole, sa i apel fer dimal e fer soufer ou prosen. E sa enn ki'n ganny vole i en dimoun e osi apele en kreasyon Bondye.

E sa ki soutir bann tel aksyon i kont, e sa i soutir bann tel aksyon kontinyen arive se osi bann endividi ki kontinyen aste sa bann keksoz vole. E ler ou pe aste keksoz vole, ou osi form parti e partisip dan sa aksyon vol e kriminalite.

Mr Speaker mon poudir mersi Bondye Papa ki'n kre zonn lib. Wi, in kre zonn lib avek diferan talan e diferan kalite don evokasyon.

Me vole i pa en don, kas lakaz ou prosen pa en vokasyon. Delenkan, *disturb* vwazinaz e pik ou prosen avek zouti, pa en vokasyon ki ganny enspire par Bondye.

E plito bann aksyon ki ganny enspire par satan. Se pou sa rezon ki mon pou toultan dir ki annou les nou ganny gide par lespri sen, me pa par lespri satan.

Mr Speaker, e la ankor mon pou felisit tou Seselwa ki

leve lizour ek lannwit e kontinyen travay dir pou byennet son lekor, son fanmir, son kominote, son pei e lemonn an zeneral.

E mon pou osi oblize rekonnet zefor sa bann zonm ek madanm ki'n pran sa vokasyon dan Lafors Lapolis, sekirite ou menm larme. Zot pe travay onnet e kontinyen mentenir Lalwa, lord ek lape dan nou zoli pti Sesel.

Sa i enkli nou Konmisyoner Lapolis Mr Ted Barbe ki pe fer en travay vreman ekstraordiner, e Gouvernman dizour ki pe fer en reform dan lentere pei. E sa pe redonn Seselwa konfyans dan nou Lafors Lapolis Sesel, e pou sa mon poudir mersi Gouvernman Sesel.

Me mon bezwen dir ki i annan ankor bann zofisye ki kontinyen angaze dan bann aksyon kriminel. E i enportan ki en zofisye lapolis i kit antet ki i merit disiplinen nenport ki ler. swa ki *on duty* e menm ki i pa *on duty*.

Mr Speaker mon pa pou long, me pou terminen mon anvil dir avek sa bann endividi ki les zot ganny tante par lespri demon e satanik, e kontinyen fer sa bann akt kriminel, sey konpran ki koman en zanfan Bondye kominote i kontan zot.

Leve travay e ede kontribye anver lekonomi zot pei, ede fer sa ki byen e fer zot fanmir, kominote e pei vin en vre paradi kot lanmour, larmoni ek lape i reye. Avek sa 2 mo Mr Speaker, mon pou siport sa Mosyon e demann Bondye pou kontinyen delivre e protez nou kont tou sa bann move lespri. Mersi Mr Speaker.

MR SPEAKER

Mersi Onorab. Laparol i prezan pou Onorab Esparon.

HON REGINA ESPARON

Mersi Mr Speaker,

Mersi pou donn mwan laparol, pou dir 2 mot an sipor pou sa mosyon anmennen par Onorab Samynadin.

Parey bokou nou, nou konnen, Glacis en distrik ki an se moman nou napa en kordgard. E dan Bidze sa lannen, Gouvernman i met a dispozisyon en Bidze pou kapab fer en renovasyon lo sa striktir ki deza egziste.

Pou li vin sa ki nou apel en *police post* e pou sa nou remerisi Gouvernman, pou pa bliy zabitan Glacis. E i bon fer rapel piblik ki Kordgard Glacis i en striktir ki la depi byen lontan dan letan Kolonyal. Ki'n ganny bann pti renovasyon tanzantan.

I menm pli vye ki mwan, parski Mr Speaker ler mwan ti pe lekòl sa kordgard ti deza la. E mon rapel defen Kaporal Evaris, koman en zanfan ki ti en gro zonn e mwan mon ti per li. Parski ozordi zanfan nepli per gard.

Sa kordgard son striktir in vremen avarye e ti nepli konfortab, e an 2019 en desizyon ti bezwen ganny pran pou fermen Kordgard Glacis. Mr Speaker en kantite keksoz, en kantite koze ki'n deroule lo size kordgard Glacis, nanm, *Gasper*, e mwan sa lepok mon lofis ti lanmen la obor, e mon ti travay nenport ki ler, zanmen mon war naryen, ni *Gasper the friendly ghost*, ni nanm!

E lesansyel Mr speaker, sete ki kondisyon sa kordgard ti fer ki i ti nepli an sekirite; ros dan miray ti pe grennen, lera ti pe fouy trou dan fondasyon e bann zofisye ki ti pe travay la, pa ti santi zot konfortab.

Mr Speaker depi ki kordgard in fermen, nou plizoumwèn ganny bann patrol, swa sorti lo kote Anse Etoile ou Perseverance si en lensidan i lo kote Vilaz North East Point.

Oubyen lo kote Beau Vallon si lensidan i lo kote Glacis santral oubyen Machabee. E nou'n toultan

annan sa bon Lantant ek lapolis lo nivo rezyon nor, ler ou bezwen zot oubyen ler i annan en lensidan

Mr Speaker, malgre ki nou swe, i ki lapolis i vin pli vizib atraver patrol, e kot posib reanmenn sa program *visible e community policing* dan lakominote, sirtou dan bann landrwa kot napa en kordgard parey distrik Glacis an se moman.

E la mon ti a dir ki i nesese pou entansifye patrol dan bann landrwa ki nou apel *black spot*, e plizoumwèn bann landrwa ki dimuon i rasanble pou bann aktivite illegal.

E i nesese ki nou idantifye, e i nesese ki nou idantifye bann fouter dezord, bann sipe kaser lakaz, e bann voler. Mr Speaker parfwa dan nou kominote ou war en dimoun drol dan nou lantouraz, ki fer ou sipe ki son aktivite, pa tro normal. E tanzantan nou tyek lo *Community Crime Watch* ki en group vizilans ki toultan pe kit kominote alert.

E mon kontan ki Mosyon pe demande, pour entansifye patrol ek vizibilite bann zofisye dan lakominote, espesyalman bann distrik ki pa ekipe ek en Stasyon Lapolis, avek bi pour elimin bann ka vol ek lezot aktivite kriminel.

Mr Speaker kantmenm i annan serten patrol ki pe ganny fer detanzantan sa i pa ase. Sa i devret en legzersis ki pli regilye, ki a vin koman en *deterrent*, dan lakominote avek bi redwi bann aktivite illegal ki arive en pe partou, partou.

E la i fer mwan mazin sou distrik North East Point ki souvan in vin en landrwa kot tanzantan i annan vol, e lakaz kase, e i annan bokou dimoun lo sa vilaz ki pa santi zot an sekirite.

Sirtou i annan detrwa landrwa ki pe ganny servi koman *outlet* pou vann drog, e droger i monte desann lo sa vilaz 24 lo 24. E sa i fer sa landrwa vin *insecure* pou son zabitan.

Nou osi konnen Mr Speaker ki ler lapolis i fer patrol e met lord, i annan konplent i annan ki kriy lasasen.

Akoz? Akoz i annan ki pe servi sa bann aktivite illegal koman en karyer pou zot ganny zot dipen toulezour. E lenterferans lapolis pa fer zot plezir. Mr Speaker mon kapab dir ki i annan bann zofisyé lapolis ki fer byen zot louvraz, e la mon pou dir ki lannen pase ti annan *SP* Jean ki ti ansarz rezyon nor, *chapeau* a sa zofisyé. I annan sa bon *skill* kominikasyon, i ti annan en

bon vizyon pou nou distrik me avek son konpetans, lafors i pli bezwen li lo nivo santral, e i pa'n dire dan nou rezyon.

Mon osi travay avek Serzan Roseline, konstab Alda e lezot ki ti kot Kordgard Anse Etoile ek Perseverance. Bann zofisyé ki devoue dan zot louvraz, ki annan sa disiplin, e ki kapab ganny gete koman bann *role model*.

Me selman Mr speaker nou bezwen avoue e aksepte ki i annan ki zot konportman e zot lapros pa tro alaoter, e i demann sanze. Parski parfwa piblik i fer bokou konplent lo bann ki pa pe donn sa bon zimaz.

Mr Speaker, ou pa kapab war en zanfán 17an dan semen sorti lapes ou aret li, i annan en pti kannif ek li i dir ou koumsa sa i servi pou koup son labwet. Ou deside pou fer larestasyon, selman ou refiz li en *call* pou *call* son paran, pou dir ki ou pe al met li an detansyon.

Pe enport ki lofans ki in fer me i annan drwa pou li omwen ganny en *call* pou enform son paran kote i ete. Koumsa demen son paran pa a bezwen al fer deklarasyon kot kordgard menm, ki son garson i manke. En senp pti *call* a met lespri sa paran alez, e i a konnen kote son zanfán i ete.

Mr Speaker en ptipti zes ki kapab al vremen lwen. E ler ou deside aret li met li dan en kordgard e non pa met li dan en transpor e fer letour pou plis ki 2,3 erdtan avek li dan en *jeep* san ki i konnen kote i pe ale.

La osi i bezwen annan en protokol ki ganny swiv, ki ler nou lo patrol e nou aret en dimoun, ki nou fer, eski nou kontinyen nou patrol ziska transpor i plen?

Oubyen nou al lo stasyon e nou depoz sa enn, apre nou kontinyen avek nou patrol? Tousala sa zofisye i bezwen annan sa diskresyon e kapab pran en desizyon ki pli konvenab.

Mr Speaker, lapolis i en profesyon ki demann bokou pasyans e konprenezon. Nou bezwen touzour, donn zot lankourazman e felisit zot kot zot pe fer byen e anmenn sizesyon kot zot kapab fer pli byen. Lapolis pa devret ganny gete koman en lennmi dan kominote, me koman en *partner* ki pou ede soulaz problem dan lakominote.

Mon swe se ki avek sa reform ki pe al ganny fer nou a war sa transformasyon, dan sa profesyon e an retour sa osi ganny reflekte dan servis ki zot rann nou lakominote. Mr Speaker avek sa de mot mon

pou donn mon sipor sa mosyon anmennen par onorab Samynadin. Mersi.

MR SPEAKER

Mersi Onorab Esparon. Mon krwar i a en bon moman pou nou pran en poz, e nou a rebran deba 4er.

(BREAK)

MR SPEAKER

Pou kontinyen lo deba, mon donn laparol Rosie Bistoquet.

HON ROSIE BISTOQUET

Mersi Mr Speaker.

Bonn apre midi Mr Speaker, bonn apre midi tou bann Onorab e tou dimoun ki pe ekoute.

Mr Speaker avan mon komans mon deba mon ti a kontan, mon pou siport sa Mosyon. Mon pou siport osi travay dir ki Minister Zafer Entern pe fer pou asire ki sekirite ek lord, dan nou kominote i rennyen.

E mon pli enportan ankor, mon osi felisit tou bann zofisye dan lapolis. Nou bann zonn for ek nou bann fanm dan liniform ki travay dir, parfwa zot mank sonmey avek lafatig. Sirtou ler zot *off* i ganny redwir kot zot ganny demande pou asiste sitwayen, ki bezwen zot led pou

met lord ek lape dan nou pti pei Sesel.

Mr Speaker mon osi mon pa en Manm Elekte pou Pointe Larue, me mon santi i mon devwar koman en Manm Lasanble e osi en zabitan Pointe Larue, en fanm Pointe Larue pou vin anmenn mon lavwa, pou fer sir ki lavwa bann zabitan Pointe Larue i dan distrik Point Larue i ganny tante.

Mr Speaker, Pointe Larue osi i pa'n ganny eparnye avek sa sityasyon kot pou le moman nou annan apepre 3500 zabitan, avek 500 lakaz, e sirtou kot i konsern lenfrastriktir nou annan apepre 6 *housing estate*. Dan sa *housing estate* i sorti diferan dimoun dan diferan distrik e osi dan Pointe Larue.

E dan sa *housing estate* bann *housing estate* pli gran i Nageon Estate kot i annan plis popilasyon, e osi laba problem osi pa mal. E ankor plis ki sa Pointe Larue i en landrwa kot i annan en gran lenfrastriktir pou lekol, kot nou'n trouve Lekol Segonder i konpri bann zanfan sorti Anse Aux Pins, Au Cap, Cascade e osi Pointe Larue e an tou i annan 800 zanfan. Dan lepase ti annan apepre 700 e pli nou popilasyon i mont en

pti git, mon krwar i annan mouvman dimoun.

Popilasyon i annan apepre 800 zanfan, e Lekol Primer i annan apepre 200 zanfan. E mon krwar Pointe Larue osi i en landrwa kot i annan plis laboutik si mon pa tronpe dan Mahe, Sesel, Port Victoria osi.

Kot i annan apepre 14 laboutik, (pa apepre) 14 laboutik, e anplis ki sa Pointe Larue i annan en zoli Legliz ki apel sen Legliz Saint Jean Bosco, kot nou bann kongregasyon i rasanble toulezour, sirtou dan *weekend*.

E sa i fer ki Point Larue i annan en kantite mouvman. Mr Speaker Pointe Larue i parey lezot distrik kot nou konnen poudir i annan bann *hot spot drog*, kot bann dimoun i rasanble. I annan de fwa ou tann bann bagar ki pase, sirtou dan ban landrwa kot bann *housing estate*.

Nou annan labi osi ki pase, nou trouve i annan bann lofans kriminel kot dimoun i kas lakaz, zot kas laboutik, zot kas nenport kwa ki zot santi i annan keksoz valer ki zot kapab vann ladan.

E osi nou trouve ki i annan en kantite zanfan osi ki lo semen, sirtou apre ler. Sa i dir pou li menm ki kantite travay lapolis i annan dan

distrik Pointe Larue. Pointe Larue osi i en sel landrwa kot nou konnen i annan en moniman aeryen ki apel *International Airport* Sesel.

Kot tou bann viziter osi i vini e i annan ki voyaze, Seselwa osi i voyaze e sa i met Sesel osi an risk. Ki letan i annan bann problem si kekfwa i kapab arive.

Wi Pointe Larue i annan en kantite devlopman kot i anmenn an kantite travay, travayer dan nou distrik. Parey mon'n nonmen taler *airport*, kot lekol, lezot lenfrastruktir ki anmenn travayer par zabitan Pointe Larue.

I annan zanfann lekol ki monte desann toulezour dan lasemenn. Nou annan boutikye osi ki monte desann. E lezot ki pete ki annan serten travay pou fer dan rezyon Pointe Larue. Mr Speaker zis mazine parey mon pe dir ki kantite mouvman i annan dan sa distrik.

Wi, parey Mosyon in demande pou entansifye patrol ek vizibilite dan bann landrwa ki kominoter. Espesyalman dan bann distrik ki napa en Stasyon Lapolis ouswa parey nou Kreol nou dir en kordgard.

Malgre tou sa bann devlopman dan Pointe Larue Mr Speaker e bann problem ki bann lezot distrik pe rankontre,

parey nou osi Pointe Larue, sa distrik pa'n zanmen annan en kordgard.

E sa ki nou'n trouve malgre menm nou konnen poudir en bon pe letan i annan en landrwa, en lorganizasyon ouswa en Lazans ki apel Lakademi Lapolis, ki'n toultan sitye Pointe Larue ziska prezan.

E pou en bon pe letan, dimoun Pointe Larue in bouz plizoumwen Cascade dan lepok kolonyal. Nou ti depan lo kordgard Cascade, me apre ki Cascade ti'n frenmen distrik Pointe Larue ti bezwen depan lo Kordgard Anse Aux Pins.

Me Gouvernman lepase ti met plis lanfaz lo bann kan larme, akoz sa kan larme ti ganny latraksyon e ti ganny met an aplikasyon apre koudeta. E ti ganny fermen an 1993, zis apre lentrodiksyon miltiparti.

Sa i montre ki nou, sa Gouvernman dan lepase pa ti donn ase latansyon sistennm lapolis. E mon santi o fon mon leker ki mon kontan pou sa Gouvernman dizour ki la konmela, Gouvernman Ladministrasyon LDS pe met en kantite lanfaz en kantite devlopman lo nou sistennm lapolis.

Mr Speaker i pa fasil pou zabitan Pointe Larue, akoz parfwa zot annan problem

parey bann bagar ki pase dan kominote. E mon konnen poudir malgre zot *call* lapolis, i annan de fwa i pa fasil ki zot bezwen ganny deplwaye. Lapolis i bezwen ganny deplwaye Cascade, (Anse Aux Pins, *sorry*)

Zot bezwen ganny deplwaye dan bann lezot sityasyon, ouswa dan bann lezot distrik ki annan de fwa i annan en pti e retar ki arive. E osi sa ki nou'n trouve, resours imen ou resours materyel. Letan mon dir resours materyel parey transportasyon, i annan de fwa ki kekfwa i pa ase.

Parey nou dir bann zonn ek bann fanm osi kekfwa i pa ase, ki nou santi pou travay dan sa 4 distrik. Me mon salye sa bann zofisye lapolis, ki fer zot mye pou zot kapab anpes en pe sa bann problem depas nou lanmen. Sirtou bann problem ki dan kominote.

Malgre tou mon siport sa Mosyon pou lapolis annan plis sipor dan distrik, parey Pointe Larue ki napa en kord gard. Me mon pou osi lans en lapel pou kominote Pointe Larue pou zot osi ed tou sa bann zofisye ki ler i annan en problem, nou pa bezwen maltret zot.

Nou pa bezwen fer okenn lezot keksoz ki pa devret fer, nou bezwen ed zot pou zot

konnen ki sours problem. Idantifye bann problem sirtou dan nou distrik ki zot kapab raport avek lapolis ler i nesaser, kan i nesaser. Ki zot kapab an menm tan war en solisyon pou nou distrik Pointe Larue.

Si zot pas byen sa bann lenformasyon bann dimoun dan kominote, i a kapab asire, nou kapab asire osi ki lapolis osi i kit sa bann lenformasyon konfidansyel, pou asire ki nou kominote i viv anpe dan sekirite ek lape.

Alors Mr Speaker avek sa 2 mo, mon pou siport sa Mosyon ki Onorab Samynadin in anmennen. Mersi bokou.

MR SPEAKER

Onorab Sandy Arissol.

HON SANDY ARISSOL

La, *ok*. Mersi Mr Speaker.

Bonn apre midi ankor enn fwa tou dimoun ki a lekout. Mr Speaker mon anvi aport mon kontribisyon an relasyon avek sa Mosyon ki'n ganny prezante deva nou Lasanble Nasyonal.

Parski letan mon pe ekout bann deba, letan mon pe swiv Mosyon i fer mwan rapel letan mon ti ankor pe lekol, tre zenn-az toultan nou ansennyan ti demann ou ki ou anvi vini letan ou gran? Sa ti en gran kestyon ki nou tou ti ganny demande. E

bann garson sa lepok mon rapel ti annan 2 metye ki nou tou nou ti anvi fer.

Sa se ou vin en Gard oubyen ou al dan Larme, mon mazine nou tou nou ti eksite sa letan. Parski sa liniform ki ti atrakte nou koman bann zenn garson sa lepok. E bann fiy si ou ti demann zot, zot ti annan zis 2 opsyon bann fiy. Swa zot al *tour guide* oubyen sa letan zot ti apel mon al *air hostess*.

Zot pa ti apel *cabin crew* sa bann *time*, zot pou al *air hostess*. Be depi tre zenn az bann ansenyan oubyen ou paran ti enkilke dan nou zenn, kwa ki zot anvi vini ler zot gran.

E mon komans koumsa parske pou ou vin en zofisye lapolis oubyen pou ou travay dan lafors, i pa en keksoz fasil. I en travay difisil, i en travay ki fatigan.

Ou travay aswar, i annan lapli, loraz, zekler parey nou dir. Letan plizyer nou pe repoze pe dormi i annan bann *shift* aswar, nou'n vwar bann zofisye lapolis letan nou ti annan sityasyon *COVID* dan pei. Bann zofisye lapolis avek sipor militer zot ki ti lo semen pou asire ki *curfew* i ganny respekte.

Asire ki bann laboutik, magazen i respekte Lalwa an relasyon avek ouver avek fermen. E pou sa mon ti a

kontan profite la pou mwan salye bann zofisye lapolis ki pe fer en travay ekselan, formidab dan nou pei avek mwens resours ki zot annan.

Dan en sityasyon difisil e kot en travay ki pa tou dimoun ki kontan fer, ki kontan vin devan. E letan mon lo la Mr Speaker mon anvi dir i annan en keksoz ki mon obzerve preski toulezour. Parske mon en drayver mon servi semen piblik, dan trafik i annan en group fanm dan Seksyon Trafik ki fer travay ekselan tou le bomaten, avek tou le 4er apre midi letan trafik in so parey nou dir. So, tousala i montre nou travay ki nou bann zofisye lapolis pe fer swa lo nivo distrik, swa lo nivo rezyonal, swa lo nivo nasyonal.

Be mon osi kontan dir pou dir depi nou'n pran ladministrasyon, in annan en kantite travay ki'n ganny fer pou elev nivo nou lapolis. Pou elev moral nou bann zofisye lapolis e pou osi elev zot kondisyon travay ki zot pas ladan preski toulezour.

Mon dir sa parske zot konn tre byen poudir Lasanble Nasyonal i annan en Komite Defans Entelizan, Sekirite pei. Kot nou sa bann Manm lo sa Komite nou ganny sans enterakte avek Komisioner

Lapolis, byensir avek Defans e nou ganny sans fer bann vizit kot nou'n enterakte avek bann zofisye.

Tou bann zofisye ki dan lafors e semenn pase nou ti ganny sans al vizit kot *CID*, kot nou ti ganny sans vwar zot landrwa en pe sere, sere en pe pti pti. Me selman bann zofisye ki ti laba zot ti determinen menm avek landrwa kot zot ete, ki pa neserman konvenab, zot ti montre nou sa determinasyon poudir zot anv'i fer en travay pou nou pei.

E se sa ki nou, nou pe rode koman bann Manm Lasanble atraver sa Mosyon. Pou ki nou bann zofisye i ganny ekipe ankor - zot deza ganny ekipe pou zot ganny ekipe plis avek bann lekipman neser.

Pou zot ganny ekipe plis avek bann *training*, bann bagaz ki zot bezwen pou ki zot rann lakominote sa servis ki nou tou nou rode.

Konplent lo lapolis zanmen pou arete, zanmen pou fini. Ale, retournen toultan lapolis nou pou annan konplent parey i annan konplent lo *MNAs* toultan. So, lapolis osi zot pa en leksepsyon. Parske ozordi parey nou konnen lekspektasyon dimoun i gran, si ou annan 26

distrik ou bezwen annan 26 kordgard.

Si ou annan 26 distrik, ou bezwen annan 26 klinik. Me pourtan si nou al *Dubai* ozordi, mazorite Seselwa i kontan al son voyaz *Dubai*. Zanmen mon'n vwar mon pa ankor rapel mon'n vwar en zofisye lapolis pe marse dan semen, mon pa ni konnen ki liniform zot servi.

Me pourtan zot en pei ki pli gran ki nou, avek bokou plis popilasyon. Me pou nou Sesel nou lekspektasyon i o, alor dimoun i anv'i ki zofisye lapolis i en pe pli vizib. Zot pli alert, zot en pe pli *friendly* avek lakominote e nou osi nou kontan sa.

Se pou sa rezon sa Mosyon in anmennen pou ki nou donn sipor Lapolis an relasyon avek lafason ki zot fer zot travay, pou ki napa konplent an relasyon avek sa.

Be nou dan nor Mr Speaker parey ou konnen Bel Ombre nou napa en Stasyon Lapolis, nou ganny asiste avek sa enn ki Beau Vallon ki deservi nou distrik. E a tou moman ki nou'n demann en lasistans Bel Ombre - par egzantp ti annan en ka dife boner sa lannen dan distrik Bel Ombre.

Bann zofisye lapolis zot ti la a ler ansanm avek bann zofisye *SFRSA*, e sa ki enportan

note Beau Vallon zot annan osi en Seksyon *CID*. En pti seksyon formidab avek bann zenn Seselwa, ki alert e ki toultan zot lo *site* pou asire ki sa louvraz i ganny fer.

Ler nou ti annan ka dife parey mon pe dir, lapolis ti la pou donn nou lasistans. Ti annan en ka lanmor kot en dimoun ti malad, be i ti mor. Parey nou dir letan ou mor dan lakaz toultan fodre lapolis ki vini, zot ti anmenn zot *paramedic*, zot ti anmenn *CID* zot ti donn tou nesaser. Lasistans nesaser ek bann gidans pou ki fanmir i konnen ki pou fer apartir la.

Sa osi bann keksoz ki'n annan ki mon satisfè. E en keksoz ki lo medya souvandfwa nou tande ozordi, bann ka vol ki arive; bann ka vol ki arive ozordi in nepli pran 2 zour, 3 zour souvandfwa ou tande deswit sa dimoun in ganny arete.

E sa keksoz vole in ganny retournen avek son met, swa lapolis in nobou rekipere. Sa osi bann sikse ki nou annan ozordi dan nou pei Mr Speaker. E tousala i fer ki sa travay ki lapolis i fer pou nou i enportan.

Par egzanp nou lo kote rezyon nor nou fer nou *meeting*, tou bann *Leaders* dan rezyon nor nou zwenn, lapolis toultan

zot la san okenn eksepsyon, toultan i annan en reprezantan ki la pou donn rezyon nor sa sipor an relasyon avek travay ki nou anvi.

Mon rapel nou ti fer *meeting* avek nou bann zabitan lo blok flat delo ladal, nouvo blok flat an relasyon avek bann konplent ki annan Mr Speaker zofisye lapolis ti la pou asiste nou pou donn gidans, pou donn serten konsey nou bann zabitan.

2 Vandredi pase, mwan *MNA*, *DA* Thahiri Laurencine, zofisye lapolis, sanniter nou ti vizit blok flat anler Bel Ombre li site 7er diswar. Tap laport tou zabitan e lapolis ti la pe asiste nou pou nou kontinyen gid nou bann dimoun, koz avek zot, *advise* zot ki mannyer zot viv dan en kominote. Tousala i bann travay ki lapolis fer ki ed nou.

Me par kont parey nou dir. Dimoun *still* parski lontan zot die ek ou dan distrik, zot ti war vizibilite sanniter. Alor dimoun i dir ek ou nou ti a pli kontan war bann zofisye lapolis pe pas en pe pli souvan.

Me parfwa parey nou'n tann dir, se resours imen. Resours ki zot fer fas avek, parski ozordi pa tou dimoun ki ankouraz son garson, swa son fiy pou li vin en zofisye lapolis. Be selman nou tou nou anvi sa

servis ki lapolis pou donn nou sa servis, menm zot annan mwens resours.

I zis parey ozordi napa dimoun ki kontan ou met en poto elektrik lo son later, met en bin obor li met en *bus stop* obor li, tou dimoun pa kontan sa. Me tou dimoun i kontan ganny en fasilite pou li kapab deservi dan distrik.

Me letan mon'n koz lo bann landrwa ki nou'n vizite Mr Speaker, mon bezwen avoue ozordi poudir ozordi nou annan nou en Komisyoner Lapolis ki pe fer travay. Komisyoner Lapolis ozordi in elev nou bann zofisye lapolis e tou resaman in annan serten promosyon ki nou'n vwar.

Parske Lapolis in anvi evolye, donn sa servis e fer sa travay ki tou dimoun pe demande. Me pou sa zot bezwen osi sipor lakominote, ki sipor nou pe koz lo la Mr Speaker? Si nou koman en zabitan nou pa fer problem, lapolis pa pou vin kot nou li.

Si nou koman bann zabitan nou aret vin bann reseler, letan dimoun i vol mang son kanmarad e vin vann kot ou, ou aste. Sa osi nou kapab ed lapolis dan sa travay ki i pe fer. Letan sa endividi i kas lakaz en dimoun e i pase avek en *DVD*, i pase avek en *camera*, i

pase avek en telefonn. E ou, ou vin en reseler ou kontinyen aste.

Sa osi pou fer ki nou kominote i ava viv byen, parski nou, nou pe anpes sa dimoun kontinyen vole pou fer ki lapolis i ganny mwens travay pou tay deryer bann naryen fer. Al rod keksoz vole dimoun, i ti ava rann nou sa servis lo kote kominoter pas kot nou, vizit nou e asire ki tou dimoun pe viv dan konfor parey nou anvi.

Me mon osi bezwen dir mon felisit ankor nou, nou Komisyoner Lapolis parske ozordi anba nouvo ladministrasyon nou napa en Komisyoner Lapolis ki pe met drog lo dimoun, pe fer met drog lo dimoun.

Nou napa en Komisyoner Lapolis ki pe fer aret nenport ki dimoun zis koumsa akoz i anvi detenir li detrwa zour dan kaso, apre larg li oubyen sarz li.

Ozordi nou annan en Komisyoner Lapolis ki pe desarz son responsabilite parey Lalwa i permet li pou fer Mr Speaker. E anba nouvo Ladministrasyon nou'n vwar plizyer renovasyon ozordi, bann kordgard. Zisteman pou asire ki nou bann zofisye zot travay dan konfor.

La Digue i enn ki byento zot kordgard pou al ouver, Baie Ste Anne Praslin i annan serten

travay negosyasyon ki'n fini komanse. Beau Vallon nou'n ganny en zoli renovasyon Mr Speaker.

Glacis byento tou sa bann nanm pou sorti, kordgard Glacis pou bezwen re ouver pou rann sa kominote sa servis ki zot pe rod en pe pli pre olye al rod li pli lwen. Kordgard Anse Etoile par egzantp i bezwen osi annan serten travay ki ganny fer, parski parey nou konnen Kordgard Anse Etoile, distrik Anse Etoile i en gran distrik avek en gran popilasyon.

So, sa i bann travay ki Gouvernman pe fer, mon aprann poudir kordgard Santral byento li osi i bezwen annan en pti latous ki gannyen avek sa larz ki'n arive. Tousala is a travay ki Gouvernman, Komisyoner Lapolis pe fer pou ki lapolis i vin lo en lot nivo.

En kantite travay avek amelyorasyon pou nou bann zofisye pou ki zot osi zot kapab desarz sa responsabilite, anmenn servis pli pre avek kominote pou ki sa bann kritik ki nou'n tande ki'n egziste pou plizyer letan.

Avek letan, ek letan i ava kapab diminyen ki dimoun ava satisfes avek servis ki zot in komans satisfes la. Avek sa ki lapolis pe ofer, me selman parey nou dir nou menm nou koman

bann sitwayen nou bezwen aret kritik lapolis.

Aret maltret zot letan zot pe fer zot travay dan distrik, annou aret soutir bann droger dan nou distrik. Zis akoz i nou dalon, i nou vwazen. Annou aret soutir bann voler dan nou distrik, annou aret soutir bann droger pou met drog lo nou zanfan.

Ler bann zofisye i vin fouye, parski nou byen ek entel nou byen ek son manman nou asiz lo menm ban Legliz ansanm. Nou al dan group sepa kwa ansanm, sa osi a fer ki letan nou pe rod led ek lapolis, nou koman en kominote, nou koman bann *MNA* in anmenn en nouvo ladministrasyon e nou pe fer nouvo fason fer ki tou sa bann byenfe i ava retourn dan lakominote atraver servis ki nou bann zofisye dan liniform espesyalman bann madanm. Ki'n deside pou pran sa profesyon, pou zot donn nou en koudmen donn nou sipor dan distrik. Fer sir pei i an sekirite, pou zot vin devan pou fer sa travay.

Mosyon pe demann tousala Mr Speaker, me parey nou'n dir kritik pou toultan annan. Zanmen ou satisfes, kapab satisfes ou dimoun. As *MNA* zanmen ou kapab satisfes tou ou *constituent* dan ou

distrik, e mon ekspekte e mon okouran poudir lapolis osi ou pa pou zanmen koman bann zofisye lapolis, zot pa pou kapab zanmen satisfere bann dimoun dan distrik.

Me sa ki nou pe swete avek zot, se ki sa nivo lentelizans, lapros i kontinyen amelyore parey in komanse. Lapros pou koz avek bann dimoun, en pe pli *friendly* avek nou bann kominote pou zot vin en pe pli sekre avek ban n lenformasyon ki dimoun i donn zot.

Partaz byen bann lenformasyon e annan en nouvo lapros pou sa nouvo travay ki zot pe fer. E pou sa detrwa mo Mr Speaker mon anvi prezant mon sipor an relasyon avek sa Mosyon, parske mon osi, nou tou dan distrik nou bezwen sipor lapolis.

Nou tou nou bezwen siport nou bann zofisye me i annan en kantite travay ki nou bezwen fer, e parey mon'n dir sa travay in deza komanse e i annan en kantite plan ankor ki'n ganny met devan. E pou zot kapab kontinyen amelyor sa servis ki nou pe donner.

Avan mon terminen mon ti a kontan redir ankor, ki mon felisit tou bann zofisye dan liniform. Mon apresye travay ki zot fer pou zot kontinyen it nou

pei an sekirite. E parey mon'n dir i annan en group madanm formidab, lo kote Seksyon Trafik ki fer en travay ekselan.

E ler mon war bann madanm, parfwa ou demann ou lekor oli nou bann zonn? Oli nou bann msye ozordi? Ki fer ki bann madanm pe pran bann pozisyon en pe pli kle dan lasosyete. In ler pou nou bann zonn osi, vin devan les sa drog, les sa miray, les sa *bus stop*. Sorti laba dan sa kwen vin devan, fer ou kontribisyon pou nou pei pou ki nou tou.

Enkli nou pei i ava prospere dan lape, kot nou tou nou viv an dignite e nou kapab fer nou kontribisyon sakenn pou nou, pou nou pei bouz de lavan.

Avek sa detrwa mo Mr Speaker mon ti a kontan prezant mon sipor pou sa Mosyon, e remersye ou pou sa 2 pti mo. Mersi bokou.

MR SPEAKER

Mersi Onorab. Mon a donn laparol Onorab Bernard Georges.

HON BERNARD GEORGES

Mersi Mr Speaker. Mr Speaker mon pran laparol apre midi avek en serten refleksyon e mon bezwen dir o komansman ki mon regrete. E i domaz e en

laont ki apre midi Lasanble i bezwen mars avek zis en kote. E ki lo en Mosyon osi enportan ki sa enn kot ou ti ava ekspekte ki Lopozisyon ti ava ralye deryer Lafors Lapolis pou donn sa sipor.

E pou demann sa ki Onorab Samynadin pe demande; setadir en pe plis prezans dan lakominote. Ou ti ava ekspekte ki zot ti ava'n la pe desarz zot fonksyon koman bann Manm Elekte, me zot in prefere ankor enn fwa absant zot lekor apre midi. E mank en lot loportinite pou zot kontribye dan travay nou Nasyon.

E sa parey mon dir i en lensidan regretab e i en laont pou nou Lasanble ek pou nou pei. Mr Speaker, mon'n dir ki mon pou pran laparol avek en serten refleksyon apre midi.

E anmezir ki mon'n ekout bann Manm LDS, aköz se zis bann Manm LDS ki'n koz lo sa Mosyon - abord sa size, mon pe reflesir en pti pe lo difikilte ki bann zonm ek fanm dan liniform i bezwen sibir pou zot leve pou al travay toulezour.

Annefe, anmezir ki mon pe ekout bann Manm, mon pe mazen *obviously* pou en dimoun ki anvi antre dan en karyer, en karyer dan biro. En *job* koman en sekreter, kot ou kapab asiz dan *air condition* tou

lazournen, oubyen en *cabin crew*.

Bann travay koumsa se bann travay ki fasil dan en serten fason, me i annan 4 sekter dan nou pei e mon vremen tir mon sapo avek bann dimoun ki antre dan sa 4 sekter.

Enn se natirelman lapolis, lot se *nursing*, lot se *teaching* e katriyenmman se bann travayer Servis Sosyal. Sa 4 lanplwa se bann lanplwa ki demann en kantite avek bann dimoun ki antre dan sa bann profesyon e dan sa bann vokasyon nou kapab dir.

E mon tir mon sapo avek bann dimoun ki antre dan sa bann servis, aköz zot tou zot travay bokou plis erdtan ki normal. Zot travay en bann, par egzanz bann *nurse* avek bann zofisye lapolis zot travay aswar.

Ou, ou mazin al pran en *shift* minwi ziska 8er bomaten Mr Speaker, i vremen i pa fasil. Ou mazin ou bezwen sorti dan lapli ler i annan en aksidan ki'n arive aköz en drayver pa pe dray byen. E in al fer en aksidan, e ladan menm in kekfwa touy en dimoun oubyen in bles son lekor.

Oubyen in kraz son loto, oubyen in tonm dan en larivyer oubyen dan lanmer *whatever*, ou mazin tou sa bann, tou sa

bann keksoz ki bann zofisye lapolis i bezwen fer e mon krwar nou bezwen konsyan.

Nou bezwen konsyan a tou moman ki dan sa 4 profesyon e la apre midi nou pe koz lo lapolis an partikilye, i annan lo en kote sa travay difisil ki zot ganny demande pou fer. E dan bokou ka, san okenn mersi e lo lot kote ou mazin bann demann ki nou met lo sa 4, lo sa 4 profesyon e ozordi nou pe koz lo lapolis.

Bann demann lo zot letan, lo ler ki nou fer sa demann i annan de fwa menm bann keksoz ki nou pa'n devret, nou pa bezwen enpoz lo zot nou fer li. E mon krwar avek sa, avek sa refleksyon la apre midi nou bezwen dan sa Mosyon.

Oubyen sa Mosyon plito i donn nou loportinite pou nou fer sa balans, ant lo en kote sa difikilte sa, sa bann sekter travay, e lo lot kote sa demann ki nou fer e ki nou kontinyen fer lo sa menm, sa bann dimoun.

E si nou fer sa refleksyon, mon krwar nou ava kapab apros sa Mosyon avek lentansyon ki Manm Onorab Samynadin in anmenn sa Mosyon.

Mr Speaker taler mon pou mont dan mon distrik, akoz malerezman i annan en lanmor. E ler mon pou pas devan *flat*

opposite Mohan mon pou war 5, 6 zen nonm pe debout dan zarden bann *flat* anba pe apir avek miray. E nou konnen egzaktaman ki zot pe fer.

Akoz zot la toulezour, tou lazournen. Ler mon pou ariv dan krwaze Les Mamelles, mon pou war en garson ki pe debout la dan krwaze. I debout la dan krwaze tou lazournen, toulezour menm garson.

E nou konnen egzaktaman ki i pe fer la. E ler mon pou mont en pe pli o i pou annan bann serten group zenn nonm sirtou, ki'n rasanble dan kwen en batiman oubyen anba en pye mang *or whatever*.

E nou tou nou konnen egzaktaman ki zot pe fer la. E mon krwar sa ki Onorab Samynadin pe, pe demande. E nou bezwen an mezir ki nou pe remersye lapolis pou travay ki zot pe fer.

Mon krwar demann ki Onorab Samynadin pe fer se akoz sa bann keksoz i perpetyelman la? Akoz ki toulezour ou war sa bann keksoz, e naryen pa arive avek zot?

E sa se mon krwar kestyon, kestyon fondamantal. Akoz Mosyon in fikse lo en keksoz, e sa se vizibilite bann zofisye dan lakominote. E mon

krwar se la pwen kardinal sa Mosyon apre midi.

Tou lezot keksoz ki nou'n koz lo la, se bann pwen periferik. Me son pwen kardinal li menm li, se ki mannyer nou pou an rey sa bann keksoz ki mon fek koz lo la, la. Sel fason se pou annan plis vizibilite dan lakominote.

E sa se en *challenge* ki lannen ale, lannen vini pandan lontan nou pe sey regarde ki mannyer, ki mannyer ki nou kapab an rey sa bann keksoz.

Akoz malgre ki sa bann, sa bann dimoun ki mon fek mansyonnen la, pa pe neserman komet en lofans, e se pou sa rezon ki lapolis pa kapab aret zot, akoz ler lapolis i arive napa en lofans ki lapolis i kapab *point* lo zot.

Me malgre ki lapolis i konnen ki zot pe fer, malgre ki napa en lofans ki pe ganny komet. Se bann aktivite kriminel kantmenm, akoz ler ou pe fer sa kalite keksoz *obviously* par deryer ou i annan en keksoz kriminel ki ou pe, ki ou pe fer.

E mon ti a kontan sitye donk sa Mosyon, pa dan en fason kot i annan bokou krim ki arive. Mon pa krwar se sa lentansyon, me kot ki annan en nivo kriminalite kantmenm non respe pou Lalwa ki anzandre dan, dan nou bann distrik.

E Onorab Roucou avek mwan nou konn sa tre byen, akoz nou sorti dan 2 distrik ki toultan in annan en move, en move lespri, en move lide dan, dan lespri ek dan lide dimoun.

En move repitasyon mon ti a plito dir, dan lespri ek dan lide, ek dan lide dimoun. E se sa *shift* ki Onorab Samynadin pe rode la apre midi.

Donk, mon retourn lo mon tenm. Lo en kote ou annan lapolis ki'n pas dan bokou reform, e ki definitivman nou kapab dir dan sa detrwa dernyen lannen in *improve* dan sen fason tre remarkab.

Non selman lo pwennvi vizibilite, me lo pwennvi son, son lankadremen li menm. Ler ou regard ozordi bann kordgard, bann zofisye lapolis ou vwar en striktir profesyonnel. E non pa en striktir ki ou a fer, e sa mon krwar nou bezwen, nou bezwen aplodi akoz vreman in arive.

Me malgre ki ou vwar tousala, nou konnen ki annan en mank kapasite ki pe kontinyen. E i annan en mank resours, akoz *still* kantmenm i annan sa bann *improvement* nou konnen ki annan de frwa kantmenm ou kri, ou kri ou apel lapolis ou demann en lasistans.

Enn bann repons ki ou gannyen se tou transpor i deor oubyen nou ava fer transpor ki deor pas kot ou, e pa toultan ki nou annan sa, sa reaksyon osi vit ki nou ti a kontan.

Donk, ki manner ou kapab fer sa 2 bout zwenn? Sa nesesite pou annan plis *community policing* lo en kote ek sa mank resours ek mendev, lo lot kote.

E se sa *challenge* ki nou pei, e sa Gouvernman an partikilye i bezwen, i bezwen regarde ozordi. Nou bezwen Mr Speaker annan en posibilite pou nou an rey bann pti krim, akoz bann pti krim i anmenn bann gro krim.

Nou bezwen - e mon konnen ki Minis Fonseka i annan sa lide antet. Nou bezwen kapab tir sa bann dimoun ki pa pe fer naryen dan lakominote, ki pe zis *hang around*.

Ki pe fer en biznes drog, nou bezwen kapab tir zot e met zot dan en travay volontarya. Met zot dan en travay kominoter, fer zot fer en keksoz ki byen dan zot kominote olye zis annan. Olye zis *hang around* e propaz kriminalite dan nou distrik.

Alor Mr Speaker, ki manner, ki manner nou pou kapab, nou pou kapab rezourd

sa? Onorab Samynadin e mon konnen ki plizyer, plizyer Manm Onorab dan lepase ti a kontan vwar bokou plis *boots on the ground*.

Bokou plis prezans lapolis dan kominote, mwan mon ti a kontan vwar plis prezans lapolis dan mon kominote. Mwan mon ti a kontan vwar a tou moman en prezans dan milye distrik Les Mamelles.

Akoz mon konnen ki si ti annan 2 zofisyé lapolis ki perpetyelman pe fer patrol, pe monte desann. Tou sa bann keksoz, sa bann lensidan ki mon fek mansyonnen pa ti pou arrive.

E bokou lezot lensidan ankor i pli enportan mon konnen pa ti pou arrive. Pa ti pou arrive par egzantp lot zour parey mon ti dir, ler mon ti reponn Leta Lanasyon en lensidan kot en garson in koup, koup son madanm.

Si sa garson ti konnen ki ti annan en zofisyé lapolis dan vwazinaz ki ti kapab anpes li, oubyen aret li le moman ki i ti'n fer sa, i pa ti pou'n fer li. I pa ti pou'n tay anler Anse Aux Pins pou li al kasyet.

Donk, nou lapel Mr Speaker. se pa pou en reform fondamantal. Mon krwar sa in deza arrive anba, anba Komisyoner Barbe. Se pa pou

annan bann keksoz sofistike tousala i ava vin avek son letan. Me se pou annan plis *community policing*.

Pou annan plis *boots on the ground* dan nou bann kominote. Pa tou ki pou kapab annan, me bann *hotspot* mon krwar i devret kapab annan.

E enn bann lide ki ti'n propoze depi en pe letan, se en lide ki sorti Zapon. Kot i annan bann ptipti kordgard ki dan en *container*, dan sa *container* i annan devan en pti biro kot gard i ete. Deryer i annan e landrwa pou zot repoze, en *toilet* kekfwa.

E en pti landrwa kot zot kapab gard en dimoun ler zot aret li, menm si ti annan enn sa dan serten kominote. E mon *urge* Gouvernman pou mazin dan sa direksyon, deza ti ava fer en, en, en lavantaz, i ava vin en lavantaz. Ti ava fer en diferans.

Me mon dir sa konesans ki ler an Eden Village ki nou apel Kosovo, in annan en tel lesey i pa'n reisi. Alor nou bezwen re mazin en fason ki mannyer nou pou fer sa menm ler ti annan en *police post* anler Les Mamelles, i pa ti neserman aret kriminalite.

Me sa ki i ti fer, se ki i ti reasir, i ti reasir bann zabitan, ki ti annan en landrwa pou zot taye ler en problem i arive.

Donk, Mr Speaker se pa en problem ki nou kapab rezourd koumsa.

Me mon felisit Onorab Samynadin apremidi, e se pou sa rezon ki natirelman mon pou siport son Mosyon. Mon pou felisit li aköz *at least*, in annan kouraz pou lev sa problem. Pou soulev sa problem pou met li devan nou, e pou angaz en deba lo la. Avek sa detrwa mo Mr Speaker, mon le reasir Onorab ki son Mosyon apre midi pou annan nou sipor. Mersi Mr Speaker.

MR SPEAKER

Mersi Onorab. Onorab John Hoareau.

HON JOHN HOAREAU

Mersi Mr Speaker. Bonn apre midi tou dimoun ki a lekout.

Mr Speaker mon oule premyerman remerci Onorab Samynadin pou anmenn en tel Mosyon, lo en size ki mon krwar i tous tou kominote, tous tou distrik dan pei.

Mon pa oule rat sa sans pou mwan koz en pti pe lo size lapolis, anvi ki Beau Vallon i en distrik ki annan bokou aktivite touristik. E par kont, kot i annan aktivite touristik. Ou war ki annan bokou aktivite, dimoun ki marse, ki *loiter*

around ki pe sey- Ennler zot pe sey rod en lavi ou kapab dir.

Me ennler osi zot ferserten ka kriminalite, ki ala detri mans sa prop lendistri ki nou pe sey travay dir pou met li lo 2 lipye. E ki pe donn nou, nou parey nou dir *bread and butter*.

Mr speaker, avan mon alkoz lo mon distrik, lo aktivite kriminalite e ki fason lapolis pe travay. Mon ti a kontan mon osi parey bann lezot Manm pou dir en pti mo lankourazman pou bann zonn ek fanm, ki dan liniform e pe travay.

Pe fer en travay formidab e ki pe pran zot louvraz o serye, e zot travay dan bann kondisyon ennler soley, lapli. Enn ler lizour, lannwit e zot pe donn tou sa ki zot kapab e zot pe kontinyen tou zot louvraz malgre bokou defi.

Alor lepep i depan lo zot bokou pou stabilite ek sekirite pei, e mon le dir zot mersi. Mon oule osi azoute ki ladministrasyon lapolis i devret pran sa an konsiderasyon.

E get dan ka sa bann dimoun ki pe vreman, vreman devoue dan lapolis. E atraver vizyon *LDS*, vizyon Ladministrasyon *LDS* kot nou pe koz lo *Result-Based Management*, ki sa bann travay i ganny rekonpanse.

E mon ti a kontan osi dir ki malerezman menm si leka ki annan bokou pe fer bon louvraz, me i annan bokou osi ki pe trenn lipye, ki pe kal en pe dan Lapolis.

Ler nou get nivo kriminalite dan distrik, se sa ki mon krwar ki'n *prompt* Onorab Samynadin pou li anmenn sa Mosyon devan. Pou demann Lafors Lapolis, nou koman en Lasanble serye en Lasanble ki, ki nou bann Manm i pe tous pou nou bann dimoun dan distrik pou demann lapolis pou fer en pti pe plis dan serten sironstans.

Sirtou ler nou pe fer sa refleksyon, ki ti devret en refleksyon bipartizan malerezman parey Onorab ki'n koz avan mwan - Onorab Georges in dir - ki sa bann dimoun ki'n ganny elekte pou serten distrik e ki pe reprezant *US*, in plifere al asize al bwar dite lot kote dan zot lasanm laba.

Mr Speaker an dizan sa, mon le demann Lafors Lapolis pou annan en lapros en pe pli proaktiv avek sirtou bann Manm dan distrik. Mon le ki zot angaz zot, e mon'n fer sa resorti dan mon ladres Leta Lanasyon kot mon ti demann Komandan Lapolis Beau Vallon pou zwenn mwan.

E pou nou kapab travay lo en program *Community Policing* an vi ki koman en *MNA* e koman lofis *MNA* dan distrik e koman lofis *DA*, nou ganny bokou bann konplent atraver nou bann dimoun ki bor ki annan keksoz ki pe mal marse, ki bor ki lapolis i devret entansifye son travay.

Ziska prezan mon pa ankor ganny sans zwenn okenn sa bann zofisye Komandan Lapolis Beau Vallon. Me mon ti a voudre relans sa lapel avek zot akoz o paravan ler *ASP Jean* ti la sa ti mars tre byen akoz i ti en dimoun ki ti proaktiv. Ki ti vin ver nou bann *MNAs* dan distrik e annan bann *meeting* avek nou.

Gete ki fason zot kapab atak zot louvraz en pe pli efektiv, gete si i annan keksoz bann konplent ki zot kapab *ascertain*. Mr Speaker *community policing* i an liny avek bann stratezi operasyonnel, ki anmenn lakominote bokou pli pre avek lafors lord.

I enn bann fason proaktiv pou fer ki kominote i vin responsab, i responsabiliz son lekor ver son prop sekirite. Alor mon oule renouvle mon demann ozordi pou demann Lafors Lapolis pou pran en

lapros ki nou kapab travay ansanm.

Annou vwar keksoz dan en sel vizyon, pou nou kapab anmenn sa pli byen pou nou distrik. Beau Vallon par rapor nou ganny bokou bann ka kot touris i ganny vole. Angiz ki petet zot pe, zot pe vann serten ekskirsyon, zot pe vin vann koko oubyen menm sey vin vann lapoud drog avek bann touris.

Alor nou, nou kote distrik nou ti a kontan sa partisipasyon avek lapolis. Akoz vi ki nou konnen, oubyen nou tande nou gannyen sa bann konplent ki vin dan nou lofis.

Mr Speaker pou mwan enn ler mon vwar en pti pe tren lipye osi parey mon'n dir pou bann ki pa pe fer li, ki pa pe angaz zot bann zofisye ki pa pe angaz zot. Parske dizon Lekol Beau Vallon ki pa tro lwen ek lapolis, enn ler i bezwen serten sekour, serten led, kot i annan bann lager apre lekol ensidswit.

Kot zot telefonn lapolis la pou la, lapolis i nobou dir zot koumsa poudir i napa transpor pou li arive. Kan i en zistans forse en 100 met avek lekol.

Konmsi sa bann keksoz koumsa i pa akseptab, fodre nou get nou travay. Fodre lapolis i get son travay koman li osi en *civil servant*, ki en

serviter lakominote e konm tel i bezwen en pti pe pli serye dan serten lapros.

Mr Speaker in ler osi ler mon pe get bann *rules of engagement*, ennler ler ou vwar lo *social media* kot i annan lapolis ki pe al entervenir pou tir en lager. Pou sey met lord, ou war enn i asize lo telefonn, lot i sey bare e konmsi sa keksoz i *escalate* i kontinyen, i kontinyen, i kontinyen finalman ou war enn ki pe tap enn lot ankor menm prezans lapolis i la.

So, mwan ki mon pe demande se ki *the rule of engagement* i reganny gete. Parske i annan de fwa par egzantp ler ou get bann lapros serten lezot pei, ver *policing*, o moman ki i annan en bagar koumsa bann dimoun ki pe form parti sa bagar zot ganny mete dan minot.

Apres pli tar zot ganny dil avek, koz avek si fodre larg zot deswit apre i larg zot. Me selman ou war poudir zot ganny *restrain* dan en serten fason, ki sa keksoz pa *escalate* par vin dan lakominote, dan en fason ki lezot dimoun i pran par ladan en pti kou, i *go out of hand*.

So, mwan mon pe demande ki sa bann keksoz koumsa i reganny get ladan e nou anmenn en pti pe plis pou

nou dimoun, ki bezwen sa sekirite.

Mr Speaker fodre dir ki plis patrol dan distrik i enportan, parey mon'n dir i pou anmenn sa relasyon ant lapolis avek lakominote. I pou fer ki lapolis i ganny plis respekte par bann dimoun li menm, e osi i pou fer ki sa bann dimoun i pou annan plis konfidan dan lapolis.

Ler ou konnen poudir lapolis i vin kot ou i vin gete ki mannyer ou ete, i pou pare pou li koze *open up* avek lapolis poudir serten keksoz ki zot war pe arive dan zot kominote.

Mr Speaker avek sa mon pou siport sa Mosyon ki'n ganny anmennen par Onorab Samynadin, akoz mon konnen poudir i en Mosyon ki ganny byen kalkile. Ki pe demann lapolis pou fer en pti pe sa *extra mile*. E par kont parey mon'n dir nou rekonnèt zefor ki bokou bann zofisye lapolis pe fer ki pe byen travay.

Alor nou pe salye zot e nou dir zot koumsa, kontinyen sa bon louvraz e ki zot lorganizasyon i get dan sa fason pou *reward* zot en pe pli byen bann ki pe prodwir plis. Dan sa ka mon dir ou mersi Mr Speaker.

MR SPEAKER

Mersi Onorab. Onorab Doyace Porice.

HON DOYACE PORICE

Mersi Mr Speaker. Bonn apre midi Mr Speaker, tou mon bann koleg MNAs.

Mr Speaker mon pou siport sa Mosyon anmennen par Onorab Kelly, akoz mon santi ki i konsern nou tou dan lakominote. Mwan koman en Manm Komite Ladefans ek Sekirite dan Lasanble, mon'n ganny sans pou vizit bann kordgard Mahe, Praslin ek La Digue.

Kot mon'n ganny plis dyalog avek lapolis, sa in ed mwan konn bann defi ki anmenn, ki anmennen kot lapolis, ki konsern mendev, ki zwe en gran rol dan nou sosyete spesyalman Baie Ste Anne ek Grand Anse Praslin.

E mon pa bliy osi lo Zil Pros. Parey nou konnen ki laplipar lapolis lo nou zil i sorti Mahe, pou vin travay lo zil. I vreman *sad* ki pa bokou Pralinwaz ek Digwa ki pare pou pran sa karyer lapolis. Petet nou ti a kontan ki sa Minister konsernen, i vin fer *training* lo Praslin kekfwa nou a ganny plis zenn pou partisip ladan e ganny plis lapolis lo zil.

Mr Speaker kot i konsern nou zabitan dan vwazinaz, nou

bezwen donn sipor Lapolis pou kapab fer sa travay pli byen. Pou abes bann vol, aktivite kriminel, tranzaksyon drog eksetera.

Nou osi nou bezwen ini ansanm dan kominote. Nou konnen ki sa bann tranzaksyon i ganny fer dan kominote, petet mon pou demande ki fodre i annan 2 lapolis omwen, pou vizit dan kominote, pou kapab kouver plis landrwa dan distrik.

Nou bann zonn ek fanm dan lapolis lo nou zil pe vreman debourye, menm si napa ase, ase zot. Zot pe kordin byen ansanm. Tou lede distrik sa 2 kordgard sa bann lapolis ki travay laba zot travay byen ansanm.

Sirtou dan, avek zot dimoun ki ansarz zot, nou annan ASP Sophola ek SI Jules pou Grand Anse. E SI Esther pou Baie Ste Anne, mon felisit zot pou sa bon travay ki zot pe fer pou Praslin. Nou osi annan seksyon CID, ki donn en koudmen e pou sa mon osi dir li mersi.

Me serten nou bann lapolis par lenfliyans serten manm piblik, i fer zot pa fer zot travay byen. Sirtou kot i konsern disiplin, respe. Fodre nou lapolis i pa les zot ganny enfliyanse. Fer sa travay ki zot in ganny *training* lo la.

E kontiny zot travay pli byen, me mon konnen ek letan tou pou fer pli byen. La ki byento Baie Ste Anne ek La Digue pou ganny zot kordgard, ki pou anmenn plis sirveyans par nou lapolis, sa i montre nou ki Gouvernman *LDS* pe fer zot mye pou met nou lapolis dan konfor.

I annan bokou ankor pou fer, me nou lapolis pe annan bokou pasyans anver sa transformasyon ki Gouvernman *LDS* pe anmenn.

Sirtou nou lapolis lo Praslin ek Zil Pros. E mwan - mwan apre pou donn zot mon sipor anver zot travay e pare pou ekout zot, e mon anvoy en lapel ek bann zenn Pralinwaz pou vin devan, zwenn sa karyer lapolis pou ed nou distrik e osi dan lakominote.

Avek sa 2 mo mon pou siport sa Mosyon anmenn par Onorab Kelly. Mersi.

MR SPEAKER

Mersi Onorab, Onorab Wavel Woodcock.

HON WAVEL WOODCOCK

Mersi Mr Speaker. Mon lentervansyon pou ase bref. Mr Speaker mon pou kontiny en pti pe dan laliny ki Onorab Porice in entervenir dan sa Mosyon.

Parey Mosyon pe demande, pe demann Gouvernman pou entansifye patrol ek vizibilite bann zofisye lapolis dan lakominote.

En Mosyon ki dan mon lopinyon i vreman enportan, akoz vre nou tou nou santi si sa Mosyon in ariv devan Lasanble Nasyonal, se ki nou war lenportans ki annan plis vizibilite, plis patrol bann zofisye lapolis dan distrik. Me an menm tan nou osi konnen poudir i annan serten defayans kot lapolis i konsernen.

Sirtou kot i konsern resours imen, nou tou nou konnen poudir i annan en mank zofisye lapolis dan nou pei. E nou'n vwar dan lepase menm Gouvernman oparavan, kot nou'n war kot nou'n bezwen rod bann zofisye lapolis sorti aletranze pou vin travay Sesel.

Nou'n war bann ka kot nou'n bezwen Gouvernman avan in bezwen fer vini *Nepale*, e nou'n war Morisyen in ganny anmenn Sesel. Sid Afriken, Irlande ki'n kit en move gou dan nou labous. E nou'n osi annan bann lezot si mon pa tronpe *Kenya* osi mon krwar, Tannzanyen wi ase resaman, in bezwen ganny anmenn pou vin ede ranforsi nou Lafors Lapolis.

Akoz i annan sa mankman resours imen. E sa i pli vizib lo zil ki bokou fwa ler nou annan bann levennman bann aktivite nasyonal ki nou organize, menm bann levennman lo nivo distrik nou bezwen *request* avek Mahe pou anvoy plis zofisye lapolis pou ede sirtou pou gard nou lord ler i annan bann aktivite.

Akoz ennler nou konnen ki arive ler bann aktivite in fini, e dimoun i konsonm serten lalkol.

Mr Speaker nou konnen poudir i annan sa mankman zofisye lapolis dan nou pei.

E zisteman ti annan en propozisyon pa bokou letan pase, parmi plizyer propozisyon pou annan ankor petet en lot Lakademi Lapolis lo Praslin. Pou ankouraz plis zenn, aköz *challenge* se lo Zil Pros nou pe ganny difikilte ganny bann zofisye ki nou bezwen *misplace* bann zofisye sorti Mahe pou vin travay Praslin.

E i deza annan en mank zofisye lo Mahe. E petet annan sa lakademi anefe ti annan en landrwa ti'n ganny propoze, kot *Dove Center* ti pou fer en *sort of* en pti lakademi. Me apre ti annan en irzans pou annan en *Juvenile Detention Center*, pou an konformite avek bann lobligrasyon enternasyonal.

La nou travay pe ganny fer pou nou fer sa *Juvenile Detention Center* kot *ex-Dove Center*, e alor Mr Speaker sa petet i annan en lide ki nou Gouvernman i kapab ankor *still* konsidere. Petet annan en landrwa kot nou kapab donn formasyon bann zofisye, bann zenn ki sorti lo Zil Pros i kapab ganny sa *training* pou zot vin bann zofisye lapolis.

E Mr Speaker mon bezwen fer resorti poudir i annan, i enportan ki Lasanble osi i donn en sipor dan sa demars. Donn en sipor pou nou ed nou bann zofisye lapolis, e sa nou kapab fer li an plizyer fason. Atraver Bidze e osi atraver sipor ki nou donn zot dan Lasanble.

Sirtou ler i annan bann serten lensidan ouswa bann landrwa ki nou apel sa bann *hotspot*, kot i annan bann aktivite delenkan. Bann aktivite parey trafik drog, bann aktivite ilegal pe deroule i enportan ki bann *MNA* osi i donn en sipor lapolis.

E mon en pti pe dezapwente, en pe parey *LGB* in fer resorti ki lo en Mosyon sitan enportan pou nou donn sipor lapolis. Bann Manm *US* pa la ozordi ki enkli bann Manm ki'n ganny elekte dan distrik, ki osi annan nou ki menm bann zofisye lapolis in elekte nou met

nou la pou nou osi vin en lavwa pou zot.

Pou zot ganny sa sipor ki zot bezwen pou zot kapab fer zot travay. Nou'n osi war plizyer lenstans dan lepase Mr Speaker, nou Gouvernman ozordi pe met lanfaz pou ekip lapolis avek bann zouti ki zot bezwen.

Donn zot plis sipor, donn zot plis lankourazman e nou'n war nou'n entansifye nou lalit kont drog, me i malere ki ler enn de bann travay ki lapolis in sey fer pou met en serten lord, dan serten bann landrwa.

Parey mon'n dir sa bann landrwa en pti pe mon kapab dir enn pti pe serye. Onorab *Leader of Government Business* in koz lo sa lensidan ki ti arive *Eden Village* ki nou konnen koman Kosovo.

Kot ler lapolis ti fer en *raid* pou sey met en lord laba, ti malere ki olye nou war Lopozisyon pe vin devan pou siport travay ki lapolis pe fer pou met lord dan nou pei. Ki nou ti war en Manm Elekte ti anmenn en kestyon dan Lasanble pou kraz lapolis.

Pou koz kont lapolis ki ti pe fer zefor pou ede tir sa bann kalite akt illegal ki ti pe arive dan lakominote e i pa fer premye fwa Mr Speaker. A plizyer repriz nou'n war bann

lensidan kot olye Lopozisyon donn sa sipor lapolis, zot in plito vin lager kont lapolis.

Nou'n war kot kestyon in ganny anmennen pou defann, defann en trafikant. Pou deport sa trafikant dan pei, kestyon ti ganny anmennen pou defann sa bann kalite aksyon koumsa Mr Speaker.

E i enportan pou nou koman bann Manm Lasanble Nasyonal pou nou donn sipor lapolis, pou demann nou Gouvernman pou donn zot sa bann sipor finansman, lekipman ki zot bezwen.

E ozordi nou Gouvernman pe fer bokou, pou ozordi elev standar lapolis. Parey nou'n war dan lepase i annan bokou bann stasyon ki ti'n ordeta, la mon pe koz lo stasyon Baie Ste Anne ki Onorab Porice fek koz lo la.

Si ou ti war sa stasyon ti parey en nespes kazo poul Mr Speaker. E ozordi nou Gouvernman in vini in fer demars e mon osi mon ti *involve* ladan, pou nou diskite pou nou ganny en landrwa kot Baie Ste Anne kot nou kapab fer en *proper* Stasyon Lapolis ki pe ganny fer la koman mon pe keze Baie Ste Anne. Ki pou konplete sa lannen.

Onorab Arissol in koz lo lezot landrwa ankor kot nou'n

war bann Stasyon Lapolis pe ganny *renovate*, Baie Lazare, La Digue;- erezman safwasi ti napa en petisyon pou anpes renovasyon lo sa Stasyon Lapolis La Digue. E dan lezot landrwa Glacis partou, kordgard Santral nou war nou Gouvernman pe met lanfaz pou fer sir ki nou bann zofisye i ganny en landrwa ki *conducive*.

En lanvironnman kot zot santi zot konfortab, konfortab pou zot travay ladan. Mr Speaker nou konnen sityasyon lo Praslin.

Dan lepase in annan bokou difikilte ki bann zofisye in menm apros mwan. Kot in konplent mank resours imen kot zot bezwen servi *car hire* ki annan transpor pa neseserman an bonn eta.

E bann lekipman ki'n manke dan lepase legan, minot, tors, *police duty belt*, *police baton* e la i annan serten resours ki pe ganny donner. Me i petet kapab annan zefor *extra* i a ganny fer pou kontinyen ekip nou bann lapolis lo Praslin, avek bann zouti bann lekipman ki zot bezwen pou zot fer zot travay.

En keksoz ki mon bezwen fer resorti Mr Speaker, se sa eleman konfidansyalite. Mon krwar i enportan pou lapolis e *rebuilt* sa *trust* avek kominote, e

kominote osi i enportan pou li annan sa raprosman avek lapolis.

Pou nou kre en *partnership* ant sivilyen ek lapolis, pou nou kapab travay ansanm pou nou kapab ed kanmarad pou fer ki, ki nou kapab osi ede sivilyen ede dan en fason pou *curb* en pe sa bann aksyon ilegal, *illicit* ki pe arive dan nou kominote.

E en keksoz ki mon bezwen fer resorti ki plizyer manm piblik in met devan mwan, se lo sa laspe konfidansyalite. Petet kot ler en dimoun i *call* lapolis as en *witness* in war serten dimoun pe fer tel aksyon ilegal, endesan ki ler in met devan lapolis.

Me apre ler lapolis in vini sa dimoun apre in konnen lekel sa dimoun ki'n *call* lapolis, ki'n enform lapolis sa bann aksyon ki zot in *witness*. Sa petet i en keksoz ki nou kapab travay lo la, pou ede re batir sa konfidans ant lapolis ek manm piblik.

Akoz nou konnen dan lepase konfidans in ganny brize dan lapolis, aköz bokou bann aksyon bann keksoz ki'n arive dan lepase. Ki ozordi nou Gouvernman pe sey re ankadre lapolis, re organiz sa, remet sa disiplin.

Rekre sa laprosman ant lakominote avek lapolis. E

parey mon'n dir i enportan pou lapolis angaz lakominote, e kominote osi angaz lapolis. E dan bann aktivite lwazir sosyal ki ganny fer parey bann konpetisyon *sport* dan distrik, bann keksoz koumsa, petet i enportan pou nou vin ansanm, annan sa laprosman devlop sa rapor, devlop sa lanmitye. Me selman *obviously* ler travay i konsernen nou travay drwat, me selman petet i enportan pou nou redevlop sa respe sa fason viv. Sa linite, sa ant lapolis avek lakominote.

Mr Speaker sa louvraz ki bann zofisye lapolis in fer, i en louvraz ki vremen difisil e mon salye zot pou sa travay ki zot pe fer e parfwa i vremen danzere.

Pa bokou letan lepase mon ti war en portre pe sirkile lo rezo sosyal, kot bann zouti ti ganny sezi kot, kot en landrwa *entertainment*, kot kannif, kouto, e ti vremen alarman.

E i fer ou mazineen poudir ozordi bann zofisye lapolis ler i pe dil avek bann dimoun.

I annan ka kot bann dimoun i agresiv, zot annan zouti avek zot, zot annan kouto, zot annan kannif e sa bann zofisye lapolis zot pe met zot lavi an risk. E mon konnen pou dir ozordi bann zofisye lapolis pa pe ganny en *risk allowance*.

Petet sa i en keksoz ki nou kapab konsidere pou le fitir osi. Mr Speaker mon osi bezwen fer resorti sa i en konsern ki plizyer zofisye lapolis in met devan mwan, se ki dan lepase promosyon i pa'n baze lo merit.

In baze lo lezot kriter ki pa neserman bann kriter akseptab, i annan bann konstab ozordi i annan bann zofisye ki'n travay pou plizyer lannen dan lapolis, 14an, 15an, 16an zot ankor konstab e bann ki'n vin apre zot menm si zot in prouv zot lekor zot pa'n ganny regarde.

Zot pa'n gannyen dan lepase e petet sa i en keksoz ki nou Gouvernman i kapab fer pou fer evalyasyon lapolis, lekel bann zofisye ki'n travay pou tan kantite letan. Get zot performans e si zot in *deliver* lo zot travay, *then*, konsidere pou donn zot en pti promosyon pou rekonnnet zot zefor, zot travay pou tou bann lannen.

Ozordi Mr Speaker, an konklizyon i annan plis lord ek striktir dan lapolis. Lapolis pa pe donn lanmen fer dimoun disparet Mr Speaker. Lapolis pa pe donn lanmen met dimoun dan prizon san zize. Parey nou war, nou'n kapab vwar dan rapor *TRNUC* ki fek sorti, kot menm bann *interview* ki ti ganny fer *off-mic* ki pa'n pas

live, off camera ozordi, i vizib i dan piblik.

E nou konnen ki mannyer dan lepase bann zofisyé lapolis in ganny servi pou fer bann move aksyon.

Annefe menm pran lavi dimoun, bat dimoun, tortir dimoun e bann keksoz ki mon pa anvì al lo la, Mr Speaker. Me ozordi nou war poudir nou pe, nou Gouvernman pe sey fer sa zefor pou *rebrand* lapolis. Redonn li sa limaz, sa respe ki i merite.

E i kler Mr Speaker poudir i annan serten *improvement* dan lapolis par lefe ki ozordi, nou war ki lalit kont drog sirtou bann *hard drug* in entansifye. Plis drog pe ganny sezi, plis entersepsyon bann dav dan nou lanmer e i annan en kantite pozitiv ki pe arive dan Lafors Lapolis.

E bann zofisyé lapolis i bezwen sipor. I bezwen sipor Lasanble. I bezwen sipor tou nou bann Manm. I bezwen sipor tou Manm lo tou lede kote latab;- *LDS, US* nou bezwen la. Nou bezwen donn sa sipor.

Ler Bidze i vini osi nou pou pare pou donn sa sipor, akoz nou anvì ki Lafors Lapolis i move lo en lot standar. E nou pou toultan pare pou donn sa sipor pou elev parey mon'n dir

standar servis lapolis dan nou pei Sesel.

Avek sa 2 mo Mr Speaker, mon dir ou mersi.

MR SPEAKER

Mersi Onorab. Mon ava apel Onorab Kelly Samynadin pou donn son repons lo deba e son konklizyon.

HON KELLY SAMYNADIN

Mersi Mr Speaker. Mr Speaker mon ti a kontan ava tou remersye tou mon bann koleg Onorab ki'n entervenir lo sa Mosyon. E lamazorite nou nou'n rekonnet ki vizibilite lapolis ensi ki nesosite pou travay kolektivman dan distrik i enn ki tre esansyel.

Mr Speaker *community policing* i en filozofi ki promot bann stratezi organizasyonnel ki annan pou bi pou trouv solisyon pou bann diferan problem. Afen ki bann sityasyon ki merit ganny adrese dan limedya i ava ganny fer dan en fason ki pli proaktiv.

Par konsekan, bann kondisyon pou konbat bann problem ki annan pou fer avek sekirite dan kominote, tel ki krim ek *social disorders* i ava kapab ganny remedye.

Mr Speaker parmi bann diferan lentervansyon, bann pwen for anterm

rekomandasyon ki'n ganny fer resorti i konm swivan;

1) Ki Gouvernman i fer provizyon lasirans ensi ki *risk allowance*, pou kouver bann zofisyé anvi ki zot fer fas avek plizyer defi sirtou letan zot al lo en *scene*.

2) Ki en program ledikasyon e promosyon i ganny fer dan bann lekòl, avek bi pou sansibiliz bann zenn lo bann benefis travay koman en zofisyé lapolis.

3) Ki i annan en revizyon dan serten Lalwa tel ki *Criminal Code* ensi ki *Misuse of Drugs Act*, pou kapab larg lanmen nou bann zofisyé pou delivre zot travay pli a laoter.

4) Ki Gouvernman i investir dan plis resours ki pou an retour fasilite e elev nivo performans bann zofisyé.

5) Ki lakominote i travay pli byen ansanm avek bann zofisyé lapolis, e donn zot sa respe e sipor ki zot merite. Avek bi pou promouvwar lape ek stabilite dan kominote.

6) Entansifye patrol dan bann *hotspots*, ensi ki dan bann landrwa kot dimoun i rasanble pou fer bann diferan aktivite ilegal.

7) Ki lapolis i tret sivilyen ki dan zot larestasyon avek dinyite e respe, e ki sak Seselwa i pran son responsabilite

personnel. Pou asire ki zot pa soutir krim dan kominote, afen ki plis sipor a ganny anmennen pou bann zofisyé.

8) Ki Gouvernman i konsider enplimant letablisman bann *police box system* dan bann distrik, ki pa ekipe ek en Stasyon Lapolis, avek bi pou ogmant vizibilite lapolis.

9) Ki lenplimantasyon *rule of engagement* i ganny revwar dan Departman Lapolis.

10) Ki Gouvernman i investir dan *training* e *retraining* bann zofisyé ensi ki anterm lenfrastruktir avek bi pou amelyor deploymen resours imen atraver pei.

11) Ki Gouvernman i rekonpans bann zofisyé pou zot long servis dan lafors.

12) E finalman ki sak distrik i adopte linisyativ *Neighborhood Crime Watch*, avek bi pou ed lapolis dan zot travay, ensi ki pou ede redwir bann ka aktivite ilegal ki ganny raporte.

Mr Speaker malgre ki mon'n deza met lanfaz lo la pli boner, me pou konklir mon ti a kontan met devan ki pou kapab annan en lafors *community policing* ki efektif i pou depan lo obtimizasyon bann kontak pozitiv ant bann zofisyé ki lo patrol, ek bann sitwayen dan kominote.

En pwen for ki mon bezwen fer resorti se sa laspe *PR* dan Departman Lapolis kot nou'n vwar en gran amelyorasyon. Dimoun i kapab ganny lenformasyon konkret e vitman e mon felisit sa departman pou en tel linisyativ.

I neser ki konfyans mityel i ganny etabli e mentenir, e sa i devret reste koman bi prensipal dan sa partenarya kominoter. Ankor enn fwa mon salye zefor e devouman sak zofisye pou travay eksepsyonnèl ki zot pe fer.

E mon oule remersye sak dimoun dan kominote ki pe zwe en rol entegral, pou asire ki son lakour. Lakour son vwazen ek son kominote an zeneral i reste enn ki sen e an sekirite pou viv e epanouir.

Avek sa Mr Speaker, mon soumet sa Mosyon avek Lasanble pou laprouvasyon. Mersi.

(APPLAUSE)

MR SPEAKER

Byen, mon ava apel bann Manm pou vot lo Mosyon.

Manm ki an faver lev lanmen silvouple? Tou dimoun in vote.

Okenn Manm ki'n vot kont? Non.

Vot lo Mosyon prezante par Onorab Kelly Samynadin ozordi, 24 Manm in vot pour, 0 kont e 0 abstansyon. Donk, Mosyon in aprouve par Lasanble.

Byen nou a termin travay pou ozordi la, mon remersye bann Manm pou zot partisipasyon e mersi bann zofisye pou asiste Lasanble.

Lasanble i ava *adjourn* e nou a rebran travay demen *matin* 9er.

(ADJOURNMENT)